

NYÒÒTÀ



Twasàkidila, Mwanèètù Vayle. [Katùpà kàà mukàbà wà mēyì munda mutupù—Muf.]

Mwoyi wènù awu dilòòlò edi, balundà bàànyì. Ndyèsè dyà kwikala kaaba aka dilòòlò edi. Ewu mmusangu wànyì mwibìdì wà kwikala kaaba aka mu Disangisha dyà ku Grantway edi, nè mwanèètù munanga, Mack, nè musùmbà wònsò mulenga ewu, nè didisanga dyà beena Kilistò bàà mu èkèleeziyà mishìlèshìlàngàne, Mwanèètù Lee Vayle. Nè ndi mfùma ku ditwilangana nè mwanèètù kampàndà kaaba aka, mwinè awu, mmulundà wa—wa katàpùlà—katèèka wa Mwanèètù F. F. Bosworth, nè kàvwa nànsha mumanyè nè Mwanèètù Bosworth úvwa muyè bwà katwilangana nè Mukalenge to. Mémè kwamba nè: “Ndi ndyùmvwa ànu bu mutwilàngàne nè Elishà uvwa mupòngòlwèlè mâyì pa byanza byà Eliyà awu,” pàvwàbo kubaabèndè kàdi kayi mumanyè nè Mwanèètù Bosworth ùkaavwa muyè bwà katwilangana nè Mukalenge to, nè bidimu makùmi mwandamukùlù nè binaayi.

² Mpindyewu ndi muswe kwelaku mwoyi bisùmbù byà bantu bàdì neetù ku nshinga dilòòlò edi, mu ditùnga dijimà, kuumukila ànu ku Californie too nè ku New York, nè ku Texas nè— nè mu bitùpà bishìlèshìlàngàne byà ditùnga, kuumukila ku Maine too nè ku Californie. Pa nànkù, tudi nè—nè ndongolwelu wa ditwangaja tèlefonè eyi, udi dibènesha dinène. Nènku mpindyewu tudi tuumvwa, kupicila kùdì mulundà wetù mwimpè, Mwanèètù Peary Green, nè bàdì nè—nè kaacyamù kakesè kàdìbo mwà kwasa ku ntèlèviziyò webè, nènku kabyàkwikala ànu ku tèlefonè nkààyaakù to kàdi nebipicilè too nè ku ntèlèviziyò webè aku, kàbidì. Nènku bàdì munkaci mwà kutàngila bwalu abu mpindyewu.

³ Nènku, Mwanèètù wa bakàjì Mack, ndi nè disànkà dyà kukumòna umwèka bimpè, musòmbe kaaba aka ku cisanji cyà orgue, dilòòlò edi. Nè ndi mmòna balundà bàànyì bààbùngì bàà ku Sierra Vista kwàka, nè Mwanèètù Borders . . . anyì Mwanèètù Roberson’s wè, wa mu Indiana; bààbùngì. Ndi muswè kwambila bantu bàdì ku tabernacle kwàka, dilòòlò edi nè, bìdì bimwèka bu nè cyàbìbidì cyàbò ncipwèkè mùnwemu, nè buumùkile ku tabernacle ku Jeffersonville.

⁴ Nè kùdì mulundà wanyì udi kuntu kwàka, Mwanèètù Koontz, bwà dibìikila bwà bwalu abu, pa bìdì bitàngila mubèèdì awu, bwà dilòmbà adi. Ndi nsambidila bwalu abu, Mwanèètù Koontz. Ikàlà wèwè ànu nè diitabuuja. Kùditàcishi to. Nebikumbanè.

⁵ Nènku mu Texas mwàmwa, Mwanèètù Blair, wèwè utèèleja dilòòlò edi, mwanèètù wanyi, ùvùlukè ànu eci; nè Nzambì Wákakusùngila musangu wà kumpàlà awu, ùdi mwà kukusùngila musangu mwibìdì. Nènku tudi twitabuuja nè Nzambì neàkupuèshèci. Nènku kwàngacikù mashimi à dyabùlù pa cintu nànsha cimwè to. Vùlukà wèwè ànu nè Nzambì ùdi Nzambì, nè kùdi. . . nè Yèyè ùcidi ànu umweumwe awu makèèlèlè, leelù, too nè kashidi. Nè tudi baMunangè nè tuMwitabuuja, nè tudi munkaci mwà kukusambidila.

⁶ Kùdi balundà bèètù bônso bàdi mu Californie; kùdi Mwanèètù Mercier nè bakwàbò abu mu Arizona amu, mu myaba mikwàbò yàbùngì, mu Phoenix amu; nè Mwanèètù Williams, nè nwènù bônso bàdi ku nshinga nutèèleja dilòòlò edi, eku nè eku kônso, ncyà bushùwà nè tudi nè kusàkidila; nè mu Géorgie mwàmwa. Nè ncyà bushùwà nè tudi nè kusàkidila bwà muntu nè muntu wa kunùdi. Mukalenge ànùbènèshè.

⁷ Ndi nè njiyà yà mwakidilu mulenga mulelèlè mwab'ewu dilòòlò edi, mu èkèleeziyà mulenga ewu, Assemblée de Dieu wa ku Grantway eku, nè pàmwè nè Mwanèètù Mack, mulundà wanyi mwìmpè. Nzambì mmubènèshe Mwanèètù Mack. Ndi mvùluka musangu kampàndà mu Canada mwàmwa, nè yèyè ùvwa. . . Mvwa ngènda ndonda kajila, mubànde pa kàbalù, lwà mu ndekeelu mwà bisuku nè meetu mwàmwa, ke Nyumà Mwìmpè kwakula naanyi bwà kutùluka nè kusambidila Mwanèètù Mack. Mu diinè dîbà adi yèyè ùvwa mu bwalu bwà lùkàsàlùkàsà, ke Mukalenge kumwondopa. Nè pa nànkù ndi nè kusàkidila kwàbùngì bwà bwalu abu, nè bwà kudìsangisha pàmwè nendè kaaba aka dilòòlò edi, bwà kukuukwila Mukalenge mu Bulelèlè bulenga ebu.

⁸ Muntu kampàndà musòmbe pa cibùmbà cyà ku cyambilu apa, paanyimà pàanyi, nyewù wamba nè: “Ncyèna ngèèla meeji nè wèwè udi mummanyè to.” Kwambayè nè: “Cikondo kampàndà wàkangambula, ànu bu mwimanyiki wa màshinyi,” nènku, ncyèna mumanyè to, mwaba kampàndà mu Boston anyi mwaba kampàndà nè: “mu Detroit, munkaci mwà kwimanyika màshinyi.”

⁹ Ki mèmè nè: “Èè, pa ciibidilu ntu nteeta kwikala nè cyanza cyolola, pàndi nè mùshindù, bwà aba bàdi mu lukèngelu.”

¹⁰ Nè pa nànkù, dilòòlò edi, tudi bônso mu lukèngelu. Nènku tudi tulòmba bwà Nzambì àtùtwishè mabòkò dilòòlò edi, à dikwàcisha, à mabènèsha, nè à ngàsà Wendè nè luse.

¹¹ Mpindyewu, ndi nè ciibidilu cyà kwakula ntàntà mule, kàdi nènteetè bwà kubènga kwenza nànkù dilòòlò edi. Bwalu, bantu bàà mu Ohio mwàmwa mbabiikile, Màndàmù Dauch nè kasùmbù kàdi kuntwaku aku, Mwanèètù McKinney nè Mwanèètù Brown, nè bônso abu bàvwa neetù ku nshinga mu Ohio mujimà amu. Tudi tunùtùmina myoyi, nwènù pèènu. Dîbà

dikaadi dimanè kupìta mu New York mwàmwa, nè ndi ngèèla meeji nè tukàadi pa díbà dikùmi nè dimwè anyi dikùmi nè ìbìdi jaajaaja, pa díbà edi, mu New York. Nènku maèkèleeziyà mmalwe nè mindilè too nè pa díbà edi, ànu bwà disangisha. Tudi nè kusàkidila bwà balundà balenga abu eku nè eku myaba yònsò.

¹² Mpindyewu kumpàlà kwà twètù kubuulula Díyi, twänjàayi kwakula nè Mwenadi, katanci kakesè, patùdi twinyika mitù yètù apa.

¹³ Taatù wa mu Dyulu munanga, tudi...myoyi yètù yidi nè disànka diyila nè panshi, bwà dyèsè ditudi naadi dyà kwikala nè mwoyi kaaba aka dilòòlò edi, nè kudìsangisha pàmwè nè cisàmbà Cyèbè. Bantu...nè batùdi twitabuuja nè netwikale naabò nè mwoyi kashidi. Tudi mpindyewu nè Mwoyi wà Cyendèlèlè, bwalu: “Wèwè wakafila Mwan’Èbè umwèpelè mulela, bwà ewu yònsò udi uMwitabuuja kàfu to, kàdi ìkalè nè Mwoyi wà kashidi.” Mu lwendu Lwèndè lwà bwenyi pa buloba apa, Yèyè mmutùlongèshe nè: “Ewu udi umvwa Díyi Dyànyi nè wìtabuuja Ewu udi muNtùme, ùdi nè Mwoyi wà kashidi; nè kààkupìcila ku cilumbulwidi to, kàdi wàmanyi kuumuka ku lufù wàyi ku Mwoyi, bwalu tuvwa biitabùtùje Mwanà wa Nzambi mulela umwèpelè.” Mùshindù mwinè wutùdi tuKusàkidila bwà Musùngidi munène ewu’s wè! Nènku tudi tulòmba, dilòòlò edi, bwà Bwikadi Bwèndè bunène bütübèneshe pàmwè kaaba aka, patùdi tubala Díyi Dyèndè nè twakulapù apa. Nyumà Mwimpè àfikishè aci kùdi mwoyi wònsò mu ditùngà dijimà, Mukalenge, mwaba wònsò wùdi bantu badìsangìshe awu.

¹⁴ Bènesàku bambi bakwàbò bàdi mu cyambilu. Tudi tulòmba, Taatù, bwà Wèwè kubènesha Disangisha dyà ku Grantway edi; mpaasàtà wadi, mukàjèndè, bàna bèndè; balami, balubuludi, nè kasùmbù kònsò kàà balombodi. Nènku, Taatù, bònsò pàmwè swàkù bwà tükwatè mudimu bwà Bukalenge bwà Nzambi, pàcidìbu Bukènkè bukùmbane bwà kumòna mwaba wutùdi twenda tunyùnguluka apa, bwalu díbà dilwalwa diikalà muntu nànsha umwe kàyi mwà kukwàta mudimu to. Nènku, Taatù, patùcidi ne dyèsè edi apa, swàkù bwà twètù—swàkù bwà tubwelelè mu cikondo eci, Mukalenge. Swàkù bwà twètù, aci citùpèèshiibwe. Ondòpàku babèèdi nè beena ntàtu mu ditùngà dijimà. Swàkù bwà Bwikadi bwà Nzambi bùumvwikè mu mutanta wònsò nè mu ditumba dyònsò dyà ditùnga, dilòòlò edi.

¹⁵ Tudi tufika ku dyumvwa nè cilumbulwidi cidi cituuta. Mitanta minène yidi munkaci mwà kweleka mu buloba, nè ditùnga didi munkaci mwà kunyùkishiiibwa, nè dizakala dyà buloba mu myaba mishiièshiiilàngàne. Bintu binène byà maalu malonda bitùdi bùmvwe byà mu matùkù àkaadi mapite, byà cilumbulwidi, mu Bible mujimà, nèku tudi tubimòna munkaci mwà kwenzeka cyàkàbìdi leelù ewu. Cipròfetà cyàmba nè: “Ànu mwàkadibi mu matùkù à Noà, ke mwìkalàbi kàbìdi ku dilwa dyà Mwanà wa muntu. Ànu mwàkadibi mu matùkù à Lotà,

ke mwikalàbi kàbidì ku dilwa dyà Mwànà wa muntu,” nè tudì tucimòna cyènzeka mpindyewu. “Myoyi yà bantu yàmba kwimana; dipampakana dyà cikondo; dikènga munkaci mwà matunga.” Nzambì, tudì bamanyè nè tudì ku cikondo cyà nshìikidilu.

¹⁶ Tùkwàcishèku, Mukalenge, bwà—bwà kufikisha Mukenji ku mutanta wònsò nè ditumba dyònsò, kùdì mwànà yònsò Ûdì mulongòlwèle Mwoyi awu. Enzàku nànkù, Mukalenge. Tudì tulòmba nùnkù mu Dìnà dyà Yesù. Amen. Mukalenge, àbèneshekù mpindyewu kubala kwà Dìyì Dyèndè.

¹⁷ Mpindyewu bààbùngì bàà kunùdì bàtu baswèku kutàngila mu Bible, mwaba wùdì mwambi munkaci mwà kubala. Nènkù ndì muswè kubala dilòlò edì, ndambù wa mvensà, yisàtù mu Misambu, Musambu wa 42, ànu bwà mùshindù wà kupeta cyena-bwalu. Nènkù ndì nè ndambù wa Mifùndu mifùnda kaaba aka, nè ndì muswè kuyitèèla, bu mèmè nè mùshindù, patùdì twenda tuya mu tusunsa tukesè tùdì tulongdà etu, bwà kwakula pa cyena-bwalu eci. Musambu wà Davidì. Davidì ngwàkafùnda Misambu.

¹⁸ Mpindyewu panùcidì nwenda nubuuulula apu, ndì mufwànyine kwamba nùnkù. Bantu bààbùngì bàtu bàmba nè: “Èè, Misambu misonsoala anyi?” Cyà bushùwà’s, mmisonsoala. Yidi . . .

¹⁹ Cintu kanà cyònsò cìdì—cìdì mu Bible ewu ncisonsoala, nànsha ciikàle maalu-malonda, nànsha ciikàle misambu, nànsha ciikàle cinyi. Ncisonsoala. Yesù wàkamba nè: “Kanùtukù babalè cìdì Davidì mwambè mu Misambu anyi?” Nè pashìishe ndì ngèèla meeji nè, Misambu, mu bushùwà bwà bwalu, s’misambu. Nènkù piikalà misambu misonsoalibwe kùdì Nzambì, bu mùdìbi nè, ndì ngiitabuuja nè mmisonsoala, nè nyà cipròfetà kàbidì, Ndi ntèkemena nè nèngiikale mwimàne mu ditùkù adi dyàkùmbanà musambu ewu:

Nekwikalè disangila mu mpeepèlè,
 Mu lutùùlù, lutùùlu àbidì àdì panshì aa;
 Nèntwilanganè neebè, nè nkusekèlèlè kwòkò
 aku
 Mu Nzùbu awu dyàmwàmwà dyà dyulu;
 Ngimbilù utukù kàyì mwànji kuumvwa, kàyì
 mwanji kuumvwa kùdì maci à cifwàkà to,
 Neciikalè cyà butùmbi, mùndì ngàmba
 patòòke’s!
 Nènkù Mwànà wa Nzambì Sungasunga ke
 wìkala mulombodi Awu
 Mu disangila dyà mu mpeepèlè adi.

Kaa, ndi—ndi muswè kwikala kuntwaku pa dìbà adi!

²⁰ Mpindyewu Musambu wa 42:

*Anu mùdì ngulungù ùjinga kasùlù kàà màyi amu, ke
 mùdì kàbidì musùukà wányi wukujinga, Eyi Nzambì.*

Musùùkà wànyì wùdì nè nyòòtà yà Nzambi, yà Nzambi udi nè mwoyi: ndìbà kaayi dīngāālwa nè kumwēneka kumpālā kwā Nzambi?

Bīnsōnji byānyì bikaadi cyākudyā cyānyì muunyā nè bufūkū, pāvūā cyānyì. . . pādībo ānu bāngambīlā ku musangu nè ku musangu nè: Nzambi webē ùdī penyī?

21 Ndi ngèèla meeji nè, Davidi, mu difùndà dyā Musambu ewu, ùvwa nè cyā kwikala mu dikēnga. Nè pa ciibidilu bitu bikēngela dikēnga bwā kulòpola citāmba bwīmpè cìdì munda mwā muntu. Cidi, menemene, aci mpādì Nzambi . . . ùpweka dībā ditùdì tujīlā byākudyā, misangu yābūngì, bwā twētù kudītēēka mu ngikādīlu wa bāfwānyīne kuumuka twētù biinè mu njīlā. Nè ndi ngèèla meeji nè, pāākabwelā Davidi mu myaba eyi, dībā adi wākabanga kwela meeji pa Mukalenge, wākabanga kwela meeji pa maalu aa.

22 Misangu yābūngì, Nzambi ùtu ùtùbweja mu—mu matumba mabùmbākāne mutùdì nè cyā kutāngīlā muulu. Mīngā misangu bitu bikēngela mene bwā twētù kulāāla bēle cyādì muulu mu lùpitaadi, anyi mu bulāālū mwaba kampāndā, bwā twamōna mwā kutāngīlā muulu bwā kumōna kùdì mabēnesha manēne à Nzambi āfūmina.

23 Mpindyewu mwākù wūndì muswè kwakulapù dilòlò edi, mwākù wūmwè wā mu Bible, nè awu wùdì wūsanganyīibwa mu mvensā mwi2: “nyòòtà,” mwākù awu: *Nyòòtà*. Mvwa ntāngīlā mu nkōngamyākù pāmvwā nkeba mwākù ewu apu.

24 Mvwa munkaci mwā kwela meeji bwā di—dīyīsha musangu kampāndā, mvwa muyīishè pa *Kwikala nè Nyòòtà Bwā Mwoyi*. Nè mvwa muwangācīle mu Misambu, kàbīdì, pāākambā Davidi nè: “Mēyī nè mikāndū Byēbē,” ngèèla meeji, “ādī nè mushinga mukolè kūndì kutāmba nè mwoyi.”

25 Dībā adi mvwa ntāngīlā nè ngèèla meeji ku mwākù awu “nyòòtà,” ke mēmè kutāngīlā mu nkōngamyākù, bwā kumōna cīdiwu wūmwījā. Kādì cīdì Webster wāmba ncyōcī eci: “Ndiyinga dyā disaama ku mwoyi,” dīdì disaama, paùdì muswè cintu kampāndā byā bikolè menemene mu mūshīndū wā nè bikaadi bikusaama ku mwoyi.

26 Mpindyewu, kī—kī ncintu cyā cībēngangana nè bufūki to, bwā kwikala nè nyòòtà. Nyòòtà ncintu cyā—cyā mu bufūki. Cīdì ānu cintu kampāndā cīdì Nzambi mutùpēēshe, citùdì mwā, bwā kutùpēēsha di—dīyinga dyā cintu kampāndā. Mīngā misangu Nzambi ùtu, kàbīdì, mmukupēēshe bu—cībùmbā cyā bukōntononyi, cintu kampāndā cīdì cīsanganyīibwā munda mwēbē amu, cīdì—cīdì cīkōntonona majīngā mashiilēshīlāngāne aa. Nè nyòòtà eyi, cībùmbā cyā bukōntononyi cīdì cīsanganyīibwā mu mwoyi wā muntu eci, ncintu kampāndā cīdì Nzambi mumupēēshe bwā—bwā kumudīmījā ku majīngā ādiye ùkēngela.

27 Mpindyewu kùdi mishindù yìbìdì mishìllàngàne yà nyòòtà. Kùdi nyòòtà, yà mu mubìdì emu. Nè kùdi kàbìdì nyòòtà, yà mu nyumà. Ndi muswè kubala, cìdì Davidì mwambè eci, cyàkàbìdì.

Musuùkà wànyì wùdì nè nyòòtà yà Nzambì, bwà Nzambì udi nè mwoyi: . . .

28 Kì mbwalu kampàndà bwà maalu-malonda, anyì cintu kampàndà cyàkenzekà kùkaadi bidimu to, anyì—anyì lusùmwinù kampàndà lwàkalondàbo kùdi muntu kampàndà nànsha; kàdì, “bwà Nzambì udi nè mwoyi,” Nzambì udiku dìbà dyònsò edi awu. Nè musuùkà wèndè wùvwa nè nyòòtà yà Nzambì awu, kì mbwà cintu kampàndà cyà maalu-malonda to.

29 Mpindyewu tudi tusangana nè, Nzambì ùdì ùkupèèsha cibùmbà cyà bukòntononyi aci, bwà kukupèèsha bintu byùdì naabi dijinga. Mpindyewu, cibùmbà cyà bukòntononyi munda mwèbè ke cìdì cikuludika. Nènku yòyì nyòòtà eyi yìdì yìnyùngulukila pa ci- . . . cibùmbà, cibùmbà cyà bukòntononyi, nè yìkwambila cyùdì ukèngela aci, mu ngaakwilù wa nyumà. Cibùmbà cyà bukòntononyi mu mubìdì, nè mu musuùkà, kàbìdì. Kùdi cibùmbà cyà bukòntononyi mu mubìdì awu, cìdì cìkwambila dikèngela dìdì dikèngela mu mubìdì wèbè, nè ndikutwàdila kùdi nyòòtà. Kàbìdì, kùdi cibùmbà cyà bukòntononyi mu musuùkà wèbè, cìdì cìkwambila bintu byà nyumà byùdì ukèngela, cintu kampàndà mu nyumà wèbè, nè, nènku wèwè ku cyòci eci udi mwà kumanya nè mmwoyi wà mùshindù kaayi udi ukukòntonona.

30 Paùdì—paùdì mwà kumòna cìdì majinga èbè, dìbà adi udi mwà kumanya, ku cyòci aci nè, ncintu cyà mùshindù kaayi cìdì munda mwèbè, cìdì munkaci mwà kufùka dijinga dyùdì naadi edi. Nwamònu’s, kùdi cintu kampàndà cyùdì naaci nè nyòòtà, nè cìdì—nè cìdì mwà kukwambila mu musuùkà wèbè cìdì dijinga edi, ku ngiikàdìlù wa nyòòtà yùdì naayi ayi. Ndi ntèkemena nè nudi mwà kuumvwa cyòci aci.

31 Kùdi ci—cibùmbà cyà bukòntononyi cyà musuùkà, nè cìkwàbò bwà mubìdì, nè cibùmbà cyònsò ncibìikidì cyà didìmwisha bwà majinga à mukwàbò. Cyònsò cyà kùdìbì cìdì cìbìikila ku dijinga dyà cìdì mubìikidì awu munkaci mwà kubìikidila, cìdì cìtùma nkwaka wa didìmwija.

32 Cileejilu, mu—mubìdì ùdì nè nyòòtà bwà kusànkisha majinga àdì munda mwà mubìdì, nè nyumà pèndè, ùdì ùjinga bintu bìdì dijinga dyà munda mwà musuùkà, nè misangu yàbùngì òwò aa àdì àlwishangana nè makwàbò. Tudi tusangana mwaba awu nè, lutàtù lunène leelù ewu lùdì nè, bantu bapite bùngì bàdì bàteeta kwikala nè mwoyi pankaci pàà majinga àbìdì awu. Bwalu, umwe wa kùdìbo ùdì ùjinga bintu byà pa buloba, mukwàbò ùjinga bintu byà mu Dyulu.

33 Bu mwàkambà Pòlò, ùmvwija mu Loomò 7.21 nè: “Pàndì njinga kwenza bimpè, bubì bùdì pabwìpì.” Panùdì nuteeta,

nukààvwakù bacipetèle mu dilabula anyi, nwênù beena Kilistò? Bwà nè paùdì uteeta bwà kwenza cintu kampàndà cyà mushinga, ukèba kuditàacisha bwà kwenza cintu kampàndà cidi cimpè, pashiishe udi ujandula nè kùdi dyabùlù, ku nseke yònsò, ànu bwà kukulubakaja, mu byònsò byúvwà mufwànyine. . . Nènku aci's ncintu cimpè, aci's. Ndi muswè kwamba nùnkù ewu, bwà beena Kilistò bààmòna mwà kumanya. Bwà nè paùdì—paùdì ubanga kwenza cintu kampàndà, nè kwòku cintu kampàndà misangu yònsò munkaci mwà kuteeta bwà kukulubakaja mu dicyènza amu, wèwè cyenzà ànu dicyènza. Awu ke dyabùlù awu's, uteeta bwà kukupangisha bwà kwenza cidi cijaalàme.

³⁴ Mpindyewu, misangu yàbùngì, ntu ntwilangana nè bantu bàdì nè meeji matùma ku diikala babìndùlùke ndambù. Pàdìbo bàjandula nè bàdì bàteeta kwenza cintu kampàndà, nè—nè bintu byònsò biikàle ànu bìcikàngila njila ku nseke yònsò, bàdì bàmba nè: “Ncifwànyine kwikala kacyi diswa dyà Mukalenge to.” Nwamònu anyi? Mpindyewu kùlekedikù dyabùlù ùkushima mùshindù awu to.

³⁵ Cintu cyà kumpàlà, nkujandula nè ndiswa dyà Nzambì, anyi kî ndyòdì. Nè pashiishe wèwè muswè kumanya nè ndiswa dyà Nzambì, tàngilà mu Bible. Ke cintu cidi—cidi cikululamija ncyòci aci, n'Diyi dyà Nzambì; nè pashiishe wèwè mumòne nè cidi mu Diyi dyà Nzambì, bwà wèwè kucyènza.

³⁶ Bu mùdì, cileejilu, kukèba kwà dibàtiiza dyà Nyumà Mwímpè. Misangu yàbùngì, ntu ntuutakeena nè bantu, bàmba nè: “Èè, ndi mukèbe Nyumà Mwímpè, kàdi nciyi ànu mwà kuMupeta to. Ncyèna ngiitabuujà nè Ùdi bwànyì mèmè to. Musangu wònsò wùndì mpweka ku binù, ndi nsaama. Nènku ndi nditwa mu disambila, mèmè mujilè byàkudya, ndi nsaama. Kàdi mèmè muteetè bwà kushààla bufùkù bujimà, nshààla bwà kuciisha, ndi ndyùmvwa nè tulù twà menemene. Ncyèna—ncyèna mwà kujuukila kuulu to.” Vùlukàayi nè, awu's ndyabùlù. Bwalu, meeji à Nzambì mbwà wèwè kupeta Nyumà Mwímpè. Ùdi bwà ewu yònsò udi muswè awu.

³⁷ Misangu yàbùngì udi usangana nè, padìbo bàkusambidila, mu disangisha kampàndà, bwà dyondopa dyà kùdi Nzambì, pashiishe ditùkù didi dilondà neujandulè, kakùyì mpatà to nè, dyabùlù neénzè bwà ùdyumvwè bibi misangu yibidì kutàmba mùvwàbi ditùkù divwà didyànjlè adi. Nwamònu anyi? Vùlukàayi nè, aci cidi ànu Sàtaanà uteeta bwà kukusàka kule nè dibènesha didi Nzambì naadi bwèbè wèwè adi. Nwamònu anyi? Kùtèèlejìkù mulùmyàna awu to. Nwamònu anyi? Misangu yònsò tùngunuka ànu nè kuya.

³⁸ Mwà mwenze dilabula nè cyòci aci ànu àbìdì àdì panshì aa mu njila mutàngile ku Àfrikè. Pangiikalà nkàadikù mupetè cikondo citù dyabùlù mumfinakàje, ciwà mbwà kuya mu Àfrikè musangu mushààle ewu. Cyàkalwa òmwe dyà ku—

ku masangisha à matàmbe bwîmpè nè bikondo bînkaadiku muyè dyàmwàmwà dyà mbù. Ndi mupetè, ngèèla meeji, bintu byàbûngì byàkenjiibwa mu cikondo cikesè cîmvwà kuntwaku aci, pa kuumusha lwendu lwànyì lwà bulembi, kutàmbe mùmvwàku mwenzè pa dîbà kanà dyònsò. Mwya misangu yònsò ànu ngèèla meeji nè èkèleeziyà ayi kayivwa miswè bwà mêmè kuya kuntwaku to, ke mêmè kufika ku dijandula nè. . . Mwya mupetè mukàndà mumfùndila kùdì muntu kampàndà, bwà nè cîvwa, kaa, kabàvwa baswè bwà mêmè kuya kuntwaku to, kasumbu kajimà aku; kàdi kulwa kujandula nè úvwa mmuntu umwèpelè, mwikàle nè mutù wà mukàndà wà ùmukila kùdì bulongolodi kampàndà, uvwa wamba nè: “Katwèna bakuswè to,” úvwa úswa kwamba yéyè nè dîkù dyèndè. Nwamònu anyi? Nàнку dîbà adi pangàakafikà kuntwaku. . . Nwamònu’s, ànu “twètù,” s’úvwa nyéyè nè dîkù dyèndè; kàdi kacivwa bantu to, nànsha kakesè. Nàнку, mpindyewu mbudimi bunène butùkàngwila.

³⁹ Nudi numòna’s, pàakambà Pòlò nè: “Pàndì njinga kwenza bîmpè, dîbà adi bubì bùdì pabwîpi.”

⁴⁰ Nùlekelèbi muntu ucidi ùkùdimwinakù mucìma àlwe dilòòlò edi ku cyoshelu, mwaba kampàndà mu tabernacle emu, anyi—anyì mu ditùnga dijimà emu; kàdi vùlukàayi ànu nè, màalaba, maamù neàfikè munda menemene kutàmbe mùvwàye kònsò eku, papa neikale mubindùlùke yéyè yònsò, nè bânà bònsò bàà mu tulaasà. Nè bintu byònsò bìdì byènda ànu bibì, bwalu n’Sàtaanà munkaci mwà kuteeta bwà kukubèngesha. Údi ùteeta bwà kuumusha mu Kajila aku. “Pàndì njinga kwenza maalu mîmpè, dîbà adi bubì bùdì misangu yònsò ànu pabwîpi.”

⁴¹ Mpindyewu tütangilàayibi ku nyòòtà ayi, bwà tùmònèbi mu bushùwà bwà bwalu nyòòtà ní ncintu cyà mu bufùki anyi. Bantu bàkaadikù bangambile nè: “Kaa, kacya ncitukù mêmè mwanji kuswè to. Ndi ngèèla meeji nè cidi ànu bwà bàmwè bantu bwà kuswa kwikala beena Kilistò.” Kaa, to. Aci ncyà mafi. Ncyà bushùwà nè ncintu kampàndà cidi ciswikàkàne nè muntu yònsò. Ncyà bushùwà nè ncilèlèlè. Patwàkafikà mu ditùngà edi mu matùkù à ku cibangidilu, tudi basangàne ba-Indiens kaaba aka. Nè ba-Indiens, nànsha mùvwàbò bampàngaanù musangu awu amu, bàvwa bàkuukwila dîbà anyi cintu kampàndà. Bu mùdibi ànu nè bôbò mbantu, kùdì cintu kampàndà munda mwàbò amu, nyòòtà yà mu bufùki, yìbiikila Nzambì, mwaba kampàndà.

⁴² Mu bisuku nè meetu amu, ànu àbìdì àdì panshi aa paanyimà pààpa, mu ntàntà wa kilòmèètà nkàmà mwandamutekète nè makùmi mwandamutekète kule nè dishidimuka òvwà ditàmbe kwikala pabwîpi, kaacimenga kakesè, kakesè kàà bantu batwè ku binunu bisàtù, bàà mu Beira, mu Mozambique. Tudi tusangana beena kalaba bàvwà kabàyi nànsha. . . kabàyiku bânji kumòna muntu mutòòke to. Mêmè kusangana mwànà wa bakàji wa beena kalaba, kàvwa nè bilàmbà pambidi to,

(mbakesè bàvwàku nè bilamba biinè), nè yéyè ùwva musòmbe kuulu kwà mucì. Nènku mvwa munkaci mwà kudimbatangana nè nyama wa ntambwe awu, nènku kùwva . . . Mémè kuumvwa cintu kampàndà bu muntu, cyèla mbilà mikolè. Mwànà wa bakàji wa beena kalaba ewu musòmbe kuulu aku, nè bwòwà bwà dikèma, mwambùle mwànà mutòòke wa mu mabòkò. Kàdi cìvwàye ùmvwila bwòwà . . . Ke dikùbiibwa dyèndè òmwèpelè ndyòdi adi, nkubànda ku mucì kampàndà, ùnyeema nyama wa ntambwe, nyama wa nkàshààmà anyì cintu kampàndà, anyì nyama kampàndà. Nè yéyè ùkaavwa mummòne, nè muumvwe nè ùwva mmuntu wetù ewu, kàdi pààkatàngilàye è kumònayè muntu mutòòke! Kacya kàvwakù mwànji kumòna mutòòke kacya bààmulela to, nwamònu's, kàdi kumvwayè bwòwà bwà lufù. Nwamònu anyi?

⁴³ Kàdi patùdi tusangana bantu abu, nànsha mene mu ngiikàdilù wa bashààdìle awu, bàvwà ànu bàkuukwila. Kumpàlà kwà twètù kubiikila nyama wa ntambwe, bàvwà bàpòngolola bukula bwà matalà panshi (ke bùdibo bàdya) bwela pa kabèji kakesè kampàndà, nè bàtuuta bikàshi, nè bàsòka mukishi wà cintu kampàndà cinène cìvwàbo kabàyi bamanyè kùvwàci to (bu mùdi munsantu wa kale anyì cintu kampàndà, bwà mwena Kàtòlikè), bwà kubàkùbayi, bwà kabàlù kushebeyiibwa mu cikondo cyà divuma dyà nyama wa ntambwe ewu nànsha.

⁴⁴ Nwamònu's, ncintu cyà mu bufùki. Kí ncintu cidi kaciyi cyà mu bufùki bwà kwikala nè nyòòtà yà Nzambi to. Ncintu cyà mu bufùki's. Cidi ànu ncintu kampàndà cìvwà cikèngela bwà wèwè kwenza. Nzambi ngudi mukwenzè mùshindù awu. Kàdi kí mmuntu mutàmbe bakwàbò to, ùdi ànu bulelèlè muntu bu bantu bònsò. Kí ncintu cyà pabwàci bwà bantu kampànda to.

⁴⁵ Bàdi bàmba nè: “Èè, ndi mumòne bàmwè bantu biikàle nè nsòmbelu wa—wa bucìmunyi, mu mùshindù wà nè bàdi dībà dyònsò ku mùsongà wà nzùbu, bàdi munkaci mwà kutùmbisha Nzambi. Mvwa kujinga ngikalakù nàнку awu.” Èè, cidi cyènza nè udyùmvwè mùshindù awu, nyòòtà yidi munda mwèbè. Nènku cidi ànu cintu cyà mu bufùki. Mbwà muntu yònsò, bwà kwikala nè nyòòtà yà Nzambi.

⁴⁶ Mpindyewu netwàngatè yimwè yà ku nyòòtà yà mu bufùki kumpàlà. Twàngatàayi, cileejilu, kwikala nè nyòòtà yà màyi. Bu mwàkambà Davidi kaaba aka, mwikàle nè nyòòtà yà, yà “màyi.” Kwikala nè nyòòtà yà màyi, mubidi wùdi wùjinga màyi. Kàdi wèwè kùyì mumanè nyòòtà ayi to, nèubutukè. Màyi nèakujike mu mubidi, nè newikalè—kwàkwikala nè mwoyi to. Wèwè kùyì mwà kupeta màyi bwà nyòòtà ayi to, bwà kumana nyòòtà yà mubidi wà mu bufùki awu kwàkunènga to nèubutukè. Kwàkushàala nè mwoyi ntàntà mule to. Udi mwà kwikala nè mwoyi ntàntà mule kùyì nè byàkudyà to kupita mùdi mwà kwikala nè mwoyi paùdi kùyì nè màyi to. Bwalu, udi mwà

kujila byàkudyà munda mwà matùkù makùmi ànaayi (Yesù wàkacyènza), ngèèla meeji, kakùyì—kakùyì cyàkudyà to, kàdi kwènà mwà kushààla ntàntà bule nàнку kùyì nè mâyi to. Udi mufwànyine ànu kuuminyina nè kufwà. Udi nè cyà kupeta mâyi. Nè—nè nyòòtà yidi yikusùma ayi, mòna's, mbwà kuleeja nè mubidi wùdi wùkèngela cintu kampàndà, bwà kuwùlama nè mwoyi. Mubidi wùdi nè cyà kupeta mâyi, bwà kushààla nè mwoyi. Udi nè byà pa lukàmà makùmi mwandamukùlù nè byà mu njila byà mâyi nè mpiitùloolù, nànsha bishi, nènku bidi bikèngela bwà wikalè nè mishimì eyi munda mwèbè, bwà kukulamayi nè mwoyi. Ànu mûmvwà mwambè, wèwè mucilèngùlùle udi ubùtuka.

⁴⁷ Nyòòtà yitu kàbìdi mudìmwiji. N'ngonga mudìmwiji, kwikala nè nyòòtà aku. Musùuka wùdi wùdidisha ngonga wa didìmwisha, nkaa cimanyishilu kakesè munda mwèbè amu kàdi kàkwambila nè lufù lùdi munkaci mwà kukubembela pabwìpì apu. Bwà nè, wèwè kùyì mupetè mâyi pa lùkàsà to, udi nè cyà kufwà. Nènku ùdi ùdila bikolè byà menemene, too nè mùdi ndekeelu wa byònsa paùdi utùngunuka ne kuyìpùwisha ki wèwè kufwà, bwalu nngonga wadidìmwisha.

⁴⁸ Bu mwàkacyùmvwijà Davidi mwaba ewu mu Misambu, “Ànu mùdi ngulungù ùjinga kasùlù kàà mâyi amu, ke mùdi kàbìdi musùukà wànyì wùKujinga, Éyì Nzambi.” Ànu mùdi ngulungù ùjinga kasùlù kàà mâyi amu!

⁴⁹ Ntu ànu misangu yàbùngì ndyàmbidila nàнку, pàndì mbala Davidi mu eci. Davidi ùvwa muntu wa mwitu, cilembi. Nènku ùvwa ùlembangana nè tushà, mu bushùwà bwà bwalu. Nè bààbùngì bàà kutùdi, mu ditùkù edi, tutu tulembangana naatù. Ngulungù's nkashà.

⁵⁰ Nènku tudi tusangana nè, ní nukààdikù bamòne mbwa, mbwa ya diitu neyìpye kashà. Nènku pa ciibidilu, bu mùdi mubwàbwà, yitu nè mènù male. Nènku wùdi mwà kwela kupyà kashà ànu lwà kunshìngù pamutù pàà boyà bwà pa dici, *apa*, nè kumunyùkulula. Udi ùkòsa muminu wà kashà, nènku kashà kakèèna mwà kupànda díbà adi to. Kàdi misangu mikwàbò mbwa awu—awu—awu, bu mùdi mu Àfrikè mwàmwa, mbwa wa diitu neàpye kashà ànu lwà mu mbadi emu, yèyè mupangile mu diminu. Neàkàpyè, musangu mwibìdi, mu lubadi. Kàdi kashà kòkò kiikàle nè dikàndà dikùmbane nè lubilu lukùmbane, kàdi mwà kudìnyùkula kupyànda mbwa awu panshi.

⁵¹ Kashà kàtu nè lubilu lutàmbe. Mbwa ùdi ùkàbembela pàdikù kakàyi kamòne to, pàdikù luseke lùdi lupeepà lùfùmina, nè—nè kòkò—kòkò kakàyi kamanyè nè—nè mbwa wùdi pabwìpì to.

⁵² Nènku díbà adi, pàdi mbwa wa diitu awu wùkàpyà, kòkò kiikàle nè lùkàsà lwà menemene, kàdi mwà kumubyànkula panshi. Nènku, kàdi pàdi mbwa ùtùuka ku luseke aku, wùdi

wùdyàpulamù dibùlu dinène dyà munyiinyi wà kashà aku. Anyi pàdiye wùmupya mu nshìngù misangu mikwàbò, neàkoselè pabwìpì nè mujilu munène wà mashi awu, kàdi kuwùpangila. Nènku kashà, mu dimunyùkusha, kàdi mwà kutùùla dibùlu dijimà dyà munyiinyi mu dibòdi dyà kashà aku, dībà adi mashi àtwàdija kuzòntza.

53 Nè pashiishe mbwa neàbwelè buludì mu mupwa wà mashi awu, wùdimbatangana nè kashà aku. Nènku pàdi mwoyi wà kashà wùbanga kusheeta kakesè kakesè, pàdi mashi, àdi mushimì wà mwoyi bwà mubidi awu, pàdìwù àbanga kusheeta kakesè kakesè àya panshì, kashà kàdi kàtamba kupòyoyonga. Nè mbwa dībà adi, anyi mbwa wa diitu, wùdi ànu wùditwa paanyimà pàà kashà apu.

54 Mpindyewu, kashà aku kòkò kakàyi mwà kupeta màyi to! Mpindyewu, màyi àdi nè cintu kampàndà mu òwò amu, cyà nè, pàdi kashà kànwà màyi, àdi ìmanyika dinzòntzà dyà mashi adi. Kàdi kòkò kakàyi kapetè màyi bwà kukàpèèsha citaleela to, dība adi ma—mashi àdi àtùngunuka nè kutuuta nkòkà nè lùkàsà lwònsò; bwalu kàdi munkaci mwà kunyeema lùbilu, mwoyi wàku awu munkaci mwà kupwìdija mashi. Kàdi bu yèyè ànu mwà kufika ku màyi, kashà aku nekìikalè nè mwoyi.

55 Mpindyewu kùdi dìleesòna dinène mwaba awu, nwamònu's, ke Davìdi kwamba apa nè: “Ànu mùdi ngulungù ùjinga kasùlù kàà màyi amu, musùukà wànyi wùdi wùKujinga, Èyi Nzambì.”

56 Mpindyewu kashà aku nkamanyè, kòkò kakàyi kapetè màyi to bwàkù mbutùùke. Kakèèna ànu mwà kwikalala nè mwoyi to. Nkààtu mudimbàtàngàne naatù misangu yàbùngì paanyimà pàà tumanè kutàpiibwa mpùtà. Pàdiku kàlenga ànu mushimì wà màyi, kàdi kàdituutamù nè kàbikula màyi, kàya kabànde ku kakùnà; kàpweka kwìnshì, kàkòsolola, kàbikula màyi nè kàbànda. Kwakukàpetakù to, pìikalàku ànu munkaci mwà kwenda kulonda mushimì wà màyi awu. Kàdi pàdiku ànu kuumuka mu mushimì wà màyi awu, kòkò kakàyi kapetè kasùlù kakwàbò kàà màyi mwaba kampàndà to, udi ukàbàkulà dyàkàmwè. Nènku mpindyewu kashà nkamanyè aci, pa nànkù nekàshaalè ànu ku màyi aku, mwaba ùdiku mwà kufikakù nè lùkàsà lwònsò. Mpindyewu udikù mwà kudifwànyikijila kashà nè dyùlù dyàkù dyela muulu, kakwàciibwa mu mwaba wùdi kawùyi màyi anyi?

57 Nè yèyè ùdi wàmba nè: “Ànu mùdi ngulungù nè nyòòtà yà anyi ùjinga (cintu's n'nyòòtà) tusùlù twà màyi, musùukà wànyi wùdi nè nyòòtà Yèbè, Èyi Nzambì. Mémè nciyi mwà kuKupeta to, Mukalenge, nèmbütukè. Ncyèna—ncyèna—ncyèna mwà kuya pàndì nciyi muKupetè to!” Nènku pàdi mulùme anyi mukàjì, mwàna wa balùme anyi wa bakàjì, ùpeta nyòòtà yà mùshindù awu bwà Nzambì, yèyè neàpetè cintu kampàndà. Nwamònu anyi?

58 Kàdi patùdì tuseemenakù, ànu bu nè mwoyi mukwàcidila nè: “Èè, nèngánji kutwà binù panshi bwà kumòna cidi Mukalenge wènza.” Nwamònu’s, kwèna ànu menemene mwanji kupeta nyòòtà to. Bikèngela cìikalè nyòòtà yà pankaci pàa lufù nè Mwoyi, nènku dībà adi cintu kampàndà cidi cyènzeka.

59 Kashà aku, kàbidì s’ke kòkò aka...Tudi tusangana nè kòkò kàdi nè cyumvwilu cikwàbò, cyà lununku, cidi cididisha kangonga kàa didimwisha munda mwàkù dībà didì mwena lukunà wakò pabwìpì. Kàdi nè, kacifùkiibwà kakesè aka, kàdi nè—nè cyumvwilu cyà kudikùba naaci. Nè kàdi nè—kàdi nè kangonga kakesè munda mwàkù, kantu kampàndà kakesè, kàa nè kàdi kèèla dyùlù dyàkù muulu pàdì mwena lukuna pabwìpì. Udi mwà kubwela mu lupeepèlè lwà mwena lukunà, nè yèyè mmumanyè nè wèwè udimù, nè yèyè mmuyè. Míngà misangu mu ntàntà wa metèlè nkàmà mwandamukùlù, ùdi mwà kuumvwa mupùùyà wèbè nè kuumuka kuya, anyì mubwàbwà anyì njiwù kanà yònsò. Kòkò kàdi nè dikùmbanyina dyà kucyùmvwà bwalu kòkò nkeinjùibwe mùshindù awu. Kòkò nkashà, ku bufùki. Nènku cyumvwilu cidi munda mwàkù aci cidi ànu cìmwèpèlè cidi Nzambi mukàpèèshe, byumvwilu abi, bwà kwikadilakù nè mwoyi.

60 Ke mèmè kudyàmbidila, pàmvwà mpàlakaja kashà nè muntu udi nè nyòòtà yà Nzambi, kumpàlà kwà mwena lukunà kufikayè kuntwaku. Kùdi cintu kampàndà bwà bìdì bitàngila mwànà wa Nzambi, bwà nè paùdì ànu ulediibwa mu Nyumà wa Nzambi, udi upeta dibàtiiza dyà Nyumà Mwímpè, kùdi cintu kampàndà pa bìdì bitàngila muntu awu cidi mwà kuumvwa mupùùyà wà mwena lukunà. Udi mwà kwangata muntu pàdiye wàngata Mufundu, nè munkaci mwà kubala Mifundu kàdi ùteeta kufinyika cintu kampàndà ku Mufundu awu, cidi cibèngangana nè Mifundu, muntu udi mùle tètè nè Nyumà Mwímpè ùdi mwà kuumvwa aci, lùkàsàlùkàsà. [Mwanèètù Branham ùdi ùtuuta cishòndò—Muf.] Kùdi cintu kampàndà cipàtùke mu njila. Pàdiye ùfika mu mwaba kampàndà, nè—nè cyumvwilu cikesè kampàndà muntwamu, aci ncyenza bwà kukùba mwoyi wèbè. Wèwè, kwèna nè cyà kucyènza to, kwèna nè cyà kuya ku cintu nànsha cìmwè pàdici kaciyi ànu Dìyì dyà Nzambi menemene to. Udi nè cyà kushààla ànu menemene nè Dìyì adi. Nènku, mpindyewu, nènku tudi bakùbiibwe nè cyumvwilu aci patùdì ànu mu Nyumà Mwímpè.

61 Nudi mwà kuditwa mu kubala, nènku bu mùdì cileejilu, muntu kampàndà wàmba, nè ndi nya kabala mu Maakò 16, ngàmba nè: “Nè bimanyinu ebi nebifilè aba bàdì bìitabuujà: Mu Dîna Dyànyì bóbò nebiiipatè baadémons; nebààkulè mu myakulu mipyamipya; anyì nebàkwatè nyòka nè byanza, anyì bóbò bànwe bintu bidì bishebeyangana, kabyàkubènzela bwalu to; bóbò batentèkèlè babèèdì byanza, babèèdì nebàsangalè.”

62 Mpindyewu, dībà adi, udi usangana muntu ùjuuka mwaba

awu wàmba nè: “Mpindyewu, aci cívwa mbwà cikondo cyà bàpostòlò.” Aci, mpindyewu, lùkàsàlùkàsà, pawikalà mwakìdile Nyumà Mwímpè, udi mupèèshìibwe cyumvwilu aci. Cìdi cìcibùndula. Kùdi cintu kampàndà cipampàlámùke mwaba awu. Nwamònu anyi? Bàdi bàteeta kucyùmvwija, bwà nè ncyà ditùkù dikwàbò, bulelèlè nè kwèna dìjinga nè bintu abi leelù ewu to. Kàdi Yesù wàkamba nè: “Bimanyinu ebi nebfilè aba bàdi bìitabuujà.” Nwamònu’s, kùdi kaacintu kakesè kàdi kàkùtuka mu wèwè amu, kaacimanyinu kakesè kadìmwiji, mu kumanya kwà nè mbìbì nè aci ke njila wa lufù awu.

⁶³ Bwalu, Yesù wàkamba nè: “Twètù basàkìdile dìyì òmwèpelè ku Cyòci eci, anyi buumùshìleKù Dìyì òmwèpelè, cyètù citùpà ncyumùshìibwe ku Mukàndà wà Mwoyi.” Nwamònu’s, Mufùndu nànsha wùmwe. Tudi nè cyà kuDyàngata ànu mùshindù ùdìDi difùndiibwe awu. Nènku Nzambì ùtu ùtàbaleela Dìyì Dyèndè, bwà kuDìkùmbaja, nè tudi bamanyè nè Dìdi nè cyà kwikala ànu mu dyòdì.

⁶⁴ Nànku ki bwà cinyì, èkèleeziyà nànsha yèyè mufwànyìne kwamba cinyì, cìdì muntu mukwàbò kanà yònsò mufwànyìne kwamba aci, wèwè mulediibwe kùdi Nyumà wa Nzambì, udi ulwa citùpà cyà Bible. Nzambì wàkambila Yèhezèkèlè, yèyè, mupròfetà awu. Yèyè kwamba nè: “Angàtà mukàndà muvùnga awu ùwùdyè,” pashìishe mupròfetà nè mukàndà muvùnga awu kulwàbò cintu cimwè. Nènku ke mwena kwitabuuja awu pàdiye ùpeta Nyumà Mwímpè; Nyumà Mwímpè ngwàkafùnda Bible, nè Nyumà wa Nzambì n’Dìyì dyà Nzambì. “Mèyì Àanyi àdi Nyumà. Ku cibangidilu kwàkadi Dìyì, nè Dìyì dyàkadi nè Nzambì, nè Dìyì dyàkadi Nzambì. Nè Dìyì dyàkavwijìibwa mubidi nè dyàkasòmbela munkaci mwètù.” Ebèlù 13:8: “Yèyè ùdi umweumwe awu makèèlèlè, leelù, too nè kashidi.” Nènku paùdì citùpà cyà Dìyì adi, kaa, díbà adi cintu kampàndà cijuukè cibèngàngàne nè Dìyì adi, kùdi kaacimanyinu kadìmwiji kakesè kàdi kàkùtuka nè lùkàsà lwònsò. [Mwanèètù Branham ùdi ùtuuta cishòndò—Muf.] Nwamònu’s, Cìdi mbwà kukudìmwija nè lufù lùdi mu njila. Kabìvwa bikèngela bwà twètù kwenza nànku to. Kùdi kàbìdì . . .

⁶⁵ Nyòòtà eyi yìdì ànu yà mu bufùki emu. Nyà mu bufùki bwà mwena Kilistò. Nyà mu bufùki kùdi muntu.

⁶⁶ Kùdi kàbìdì nyòòtà yà ditanta. Bantu bààbùngì leelù ewu, mutùdi tulonga bwà nyòòtà eyi’s wè! Twàfumu ku dimòna nè, bààkabanga nkònga-myandà. Nènku tuyààya kuntwaku, nè bantu bàtùùla binunu byà ndola bwà kutùma bânà bààbò mu tulaasà, nè—nè ku nkònga-myandà nè ku bilongelu bitùmbùke, nè bikwàbò, bwà kupeta dilonga dyà tulaasà nè: “Bwà kwikala kutuuta dyàkalenga,” mùdìbo bàcìbìkìkila, “mu mwoyi wà pànu.” Kàdi mpindyewu ncyèna naabì cilumbù to, mpindyewu, abi’s bidi ànu bímpè. Kàdi, bwànyì mèmè, udi mwà kupeta dilonga dyònsò dyà tulaasà dyà pa buloba adi, kàdi kùyì ànu

mwanji kupeta dyàkalenga dilelèlè to. Ncyà bushùwà. Bwalu, abi nebi kupeepejilèku wèwè ewu ànu maalu kakesè ndambù pànwapa. Nè kùdi. . . Kàdi paùdi ufwà, udi ushìya byònsò abi paanyimà pèèbè, nè cibucilu cyònsò mu kaabujimà citùdi naaci eci.

⁶⁷ Mvwa ncyàmba ditùkù adi, ku Phoenix. Cìdi cìkùmbana bwà kutèèdiibwa cyàkàbìdì, nè: “Dishidimuka dyònsò dyà cyena-leelù edi, ndongamu mujimà wa dilonga dyà tùlaasà, ndongamu yònsò mu kaabujimà wa maalu à mamanya, udi ùbèngangana nè Dîyi dyà Nzambi nè diswa Dyèndè.” Dishidimuka kakùyì mpatà to didi. . . Kakwàkwikalakù dishidimuka kampàndà pa buloba bucilwalwà, bu edi nunku to. Edi ndishidimuka dinyangakaja. Nzambi ùvwa nè dishidimuka Dyèndè dyà kumpàlà pa buloba, pàakaakulàYe Méyi Èndè nè kumwènekawò, dimiinu dyònsò dyà mùshindù wàdì, nènku mu dyòdì dishidimuka adi kamùvwa lufù, mabèèdì, anyì tunyinganyinga to. Nènku mpindyewu tudi twangata bintu bìdì mu beena maalu à mamanya, bìvwà bitèèkiibwe kaaba aka bwà kubilama pàmwè, nè kucinyangakaja kucivwija cintu kampàndà, kàdi aci cidi citwàla lufù.

⁶⁸ Bu mùdì bómbe bwà mushindà. Ncyèna mumanyè mùdìbo bènza bintu ebi to, nè ndi mwà kucyàmba bibì. Bàdi bàngata uranium, bwà kusùsulula ka—kasùsukilà, nè kasùsukilà kàbwayika mu tupwishipwishi. Cidi cyènza cinyì dîbà adi? Cidi ànu cibùtula bùtùbùtù, pàmwè nè cyònsò, ànu cibùtula. Cyònsò citùdi twenza aci!

⁶⁹ Tudi twangata bwanga, tutèèka *ewu* njila wa kulonda nè *ewu* njila wa kulonda ewu, bwà kwondopa *cikampàndà*, nè kucitèèka munda mwètù. Kàdi citùdi twenza ncinyì? Tudi tusùsulula cintu kampàndà cikwàbò.

⁷⁰ Mpindyewu ndi ngèèla meeji nè nudi babalè, nuvwa babalè cibèjibeji cyà *Reader's Digest* cyà ngondo mushààle ewu, ncyambè nè: “Mu cikondo citùdi nè mwoyi mpindyewu eci, nè, nsongàalùmè nè nsongàakàji bàdi mwà kufika ku bukùlumpè pankaci pàà bidimu makùmi àbìdì nè makùmi àbìdì nè bitaanu.” Anji elàayi meeji ku bwalu abu. Bàna bakesè bàà bakàji bàbwela mu dibènga kuya ku mashi, nè bidimu makùmi àbìdì, nè makùmi àbìdì nè bibìdì nè makùmi àbìdì nè bisàtù, bashindàme. Nudi numòna's, cìdi cicyènzè, cívwa mbyàkudyà bisopakaja ebi nè bikwàbò bitùdi munkaci mwà kudyà ebi. Nwamònu's, mbintàkanyì, byàkudyà nè—mwoyi wutùdi naawù ewu. Beena maalu à mamanya mbatùtwàdìlecì, nè, mu kwenza kwà nànkù awu, bàdi munkaci mwà kunùshebeya.

⁷¹ Mvwa nsanganyiibwa mu Àfrikè mùmvwà mumòne nsongàalùmè ayi yìvwà kacya kayiyiku minwè bwanga nànsha bwà kànà mu nsòmbelu wabò. Bàdi bàdya minyìinyi yìdì nè bikusù munda mwàyi. Bàvwa bànwa màyi à mu dijiba àvwà

àmwèka nè mmafàwànyìne kushebeya ngomba. Nènku mvwa munkaci mwà kwasa cintu ciludikila mu ntàntà wa metèle lukàmà nè makumi mwandamukùlù nè àsàtù, kàdi ncìvwa mwà kucimònakù nè tulòndò twà mmwènu yìbidì yà mupimbu wà mwandamutekète kuvudija ku makùmi àtaanu to. Nè muntu wa mvùlà yàànyì eyi ùvwa mwimàne mwaba awu, ùngambila mwàba wùvwa dizaji dibwèlè, kàyì nè bìnetà ku mèsù to. Mpindyewu, pùikalàbi nè nkolèshìlù yònsò wa cyena leelù ewu mmwènzè cintu kampàndà. . . Ndi ndyùmvwà nè bu nè mvwa nè mèsù èndè nè cìfù cyèndè, mvwa mufwànyìne kwikala muntu mwímpè be. Èyowà.

⁷² Kàdi's ke bwalu mbwòbù abu, nudi numòna's, ke cidi maalu à mamanya, dilonga dyà tùlaasà, dishidimuka, twètù tudi babùtudiibwe ku cyòci aci. Tudi tudibùtula twètù nkààyeetù. Byàkabangila mu budimi bwà Edènà, nè biikàle bitùngunuka too nè ku leelù ewu. Kàdi, biikàle nè nyòòtà yà ditanta!

Dìbà adi, tudi nè nyòòtà yà bwobùmwè. Tudi tuya, tudi baswè bwobùmwè.

⁷³ Mbyenzè ànu mùdì nsongàalùmè nè nsongàakàjì. Mpindyewu, kí mbipanga mushinga anyì (ndi nswa kwambà nè) kí mbipanga kwikala byà mu bufùki emu bwà nsongàlùmè nè nsongàakàjì ku—kunanganabò to. Cintu's nyootà yà dinanga. Ncikondo cyàbò, nè bóbò—bóbò mbanangàngàne muntu nè mkyèndè. Kí mbyà kabiyi byà mu bufùki emu to, aci's ncintu cyà mu bufùki emu bwà bóbò kwenza nàнку.

⁷⁴ Mpindyewu tudi tusangana bintu byàbùngì, mu nsòmbelu utùdì basòmbèle mu mubidi wà mu bufùki ewu, bitùdì naabi nè nyòòtà. Cidi ànu ncintu kampàndà cidi cisòmbè munda mwètù. Tudi baswè kucyènta, kakùyì mpatà to tudi tudyùmvwà nè bìdi nè mushinga. Nènku bìdi nè mushinga bwà twètù kucyènta.

⁷⁵ Tudi tusangana nè bakàjì bààbùngì, mu matùkù aa, bàdi nè nyòòtà yà bulenga. Mpindyewu kakwèna mukàjì. . . Ncintu cyà mu bufùki emu bwà mukàjì kwikalayè nè nyòòtà yà kwikala mulenga. Ke—ke disàkiibwa dyèndè difila kùdì Nzambì adi's nè—nè bulenga bwèndè bùdì Nzambì mumupèeshe bwà mulùme wèndè abu. Nènku mpindyewu tudi tusangana nè bakàjì mbaswè kwikala mùshindù awu. Bwà cinyi bìdi nàнку? Cidi ànu mbwalu ncintu kampàndà cidi Nzambì mumupèeshe. Nènku kí mbibì bwà bakàjì kwikalabò balenga to. Bìvwa bìkèngela kwikalabò nàнку.

⁷⁶ Nènku, nudi bamanyè's, bóbò ke cìfùkìibwà cimwèpelè cidi—cidi cikàjì aci cilenga kutàmba cilùme, mmu bukwàbantu. Nyama mukwàbò yònsò ewu, angàtà—ngombe wa dishìna nè wa mpànga, kashà kàà dishìna nè kashà kàà mpànga, cikuka cyà nzòlò nè citààlà cyà nzòòlò, mamwèndè wa nyuunyi nè tatwèndè wa nyuunyi, misangu yònsò nudi nusangana nè ntààlà mmunène nè mulengèle. Kàdi mu bukwàbantu, bìdi bileeja nè ke kùdì

dinyangakaja dilwila aku, bìdi bishintuluka; kàdi mbakàji ki bàdi—bàdi balenga, nè bàdi bàalakana kwikala balengèle.

⁷⁷ Kabiyi bu mùdi bimwè byà ku bifùkiìbwà byà macimbu bitùdi tumòna mu mùsèèsù byà ditùkù edi ebi to; to, to, kî mbulenga bwà mùshindù awu to. To. Aci's ncintu cyà mmwènekèlu wa ùtamba kukwàcisha bwôwà cínkaadiku mumòne kacya bândela. Èyowà's, mukalenge. Ke dinyangakaja ndyòdi adi didi dinyangakaja nyòtòtò milelèlè.

⁷⁸ Mpindyewu, nyòtòtò milelèlè yìvwà yìkèngelà bwà mukàji kwikalayè naayi, yìvwa mwà kwikala yà “kudilengeja nè mmwènekèlu wa didipwekesha, nè kwikala nè nyumà mufwànàngàne nè wa Kilistò,” Timòtè wa Kumpàlà 2.9. Mpindyewu ke mùshindù wùvwà mukàji nè cyà kujinga kwikala's. Mpindyewu wèwè muswè kwikala mulenga, mùshindù awu ke wùdi wùkuvwija mulenga, nwamònu's, n'nyumà mufwànàngàne nè Kilistò, nè kudilengeja nè mmwènekèlu wa didipwekesha.

⁷⁹ Kaa, ekèlekèlè, bàmwè bàà ku bantu aba leelù ewu bàdi mu misèèsù! Kwènà mwà kutàpulula mulùme nè mukàji to, nènku ciinè aci ke—ke cintu cidi cyà mmwènekèlu wa wènta bwôwà cyùdi mwà kumòna . . . Ncyèna mufwànyine, cidi—cidi . . . Ncitu—ncitu mwanji kumònakù cintu bu nànkù to, bu mùtù bantu's. Ncipite nè muntu's. Mèsù malaaba bilaabu mùshindù *awu*, nè, nudi bamanyè's, mèsù à mmwènekèlu wa lukutukutu bu à mùsodyà awu, nè tulàmbà tùdi nè mmwènekèlu wa lukutukutu twònsò atu. Nènku, mòna's, kacyéna nànsha . . . Byònsò nànkù kabiciyi mu byòbì to, kabàyi nànsha nè mmwènekèlu wa muntu nànsha. Nè bàmwè bàà ku nsongàalùme ayi pambèlu apa, nè nsukì yàbò misaamuna mipwekesha, nè bipya byà bàna bààbò bàà bakàji, bilembèlèle mumpàlà *emu*, nudi bamanyè's, mòna's, ndinyangakaja ànu dyètù dyà menemene edi's! Ncyà bushùwà. Cidi—cidi—cidi n'Sàtaanà, nè Sàtaanà ngudi munyangakaji awu.

⁸⁰ Pààkenzà Nzambi bintu byònsò mu budimi bwà Edènà, bìvwa bilenga, dìbà adi Sàtaanà kubwelayè nè kunyangakajayè. Sàtaanà kèna mwà kufùka cintu nànsha cimwè to. Kùdi Mufùki ànu umwèpelè, n'Nzambi. Kàdi Sàtaanà ùdi ùnyangakaja bufùki bwà ku cibangidilu. Nènku mpindyewu yèyè mmubwelè mu (cìndi muswè kwakulapù dilòòlò edi cyà) kunyangakaja bufùki bwà—bwà ku cibangidilu bwà nyòtòtò.

⁸¹ Mpindyewu, mukàji kampàndà, mungàmbi kumpàlà amu, mmuswè kwikala mulenga kwìsù. Kùdi cintu kampàndà munda mwèndè amu, cyà nè yèyè ùdi mukàji nè mmuswè kwikala mùshindù awu.

⁸² Kàdi mùshindù wùdìbo mu mùsèèsù leelù ewu, nè nsukì mikòsa bu muntu mulùme, bavwàle bilàmbà byà bantu balùme; nè pashiishe balùme bàkùdimuka, bàvwàla bilàmbà byà bakàji,

nè nsuki mikosa bu mukàjì. Nwamònu's, ndinyangakaja, cintu cyònsò mu kaabujimà's! Cyàkudyà cyèbè ncinyangakaja. Mwoyi wèbè mmunyangakaja. Nyòòtà yèbè, mminyangakaja. Dijinga dyèbè ndinyangakaja. Nditùkù dyà dinyangakaja's!

⁸³ Mwva ngààkula kaaba aka, ànu àbìdì àdì panshì aa, pa *Edènà wa Sàtaanà*. Nzambì wàkangata bidimu binunu bisambòmbò, è kwenzaYè Edènà mupwàngàne. Sàtaanà kulwa kuntwaku nè kumyamina mamiinu awu, nè kuàkònyangajayè. Mpindyewu yèyè mmupetè bidimu binunu bisambòmbò, nè ùkaadi mupetè wendè Edènà sungasunga wa maalu à mamanya, mwalùkile cyàkàbìdì ku dinyangakaja dyà maalu à cyà bushùwà.

⁸⁴ Nènku eci ncikondo cyà disopakaja dyà mamiinu, disopakaja dyà mamiinu. Bàdi mene nè—nè maèkèleeziyà leelù ewu, too nè mùdiwo masopakaja. Ncyà bushùwà. Bàdi bàbwela munwemu emu, bàdi ànu bàya mu èkèleeziyà, ndiswa pamutù pàà èkèleeziyà. Èkèleeziyà mmwaba wùdì bantu bàdisangisha nè bàkuukwila Nzambì mu Nyumà nè mu Bulelèlà. Nènku leelù ewu ndiswa. Tudi tuyamù nè tupicisha cikondo cikesè cyà kulabulangana ku cyanza, nè kubwela mu bwobùmwe, nè kunwà ndambù wa kààfe kafìlke kumfundu kwà nzùbu awu, nè kwalukila kumbèlu too nè ku lumingu lùlwalwà, nànkù awu's tudi bajikije mukiiyà wètù wà butèndeledi.

⁸⁵ Mpindyewu ncikondo cinyangakaja. Nè Sàtaanà ùdi munkaci mwà kunyangakaja nyòòtà eyi yidì Nzambì mutèèke munda mwèbè, bwà kupeta nyòòtà. Sàtaanà ùdi munkaci mwà kubinyangakaja. Mpindyewu nwènù baswè kumanya cidi cijaalàme, dinyangakaja . . .

⁸⁶ Panwikalà nwènù, bakàjì, baswè kwikala balenga, angàtaayi Timòtè wa Kumpàlà 2.9, mbwena kwamba nè “kudilengeja mu mvwàdilu mupwekèle—mvwàdilu, biikàle nè nyumà mufwànàngàne nè wa Kilistò, bapòle, bakòòkela baabàyaabò,” nè bikwàbò. Mùshindù awu ke wùvwàbì bikèngela bwà wèwè kwikala mudilengèje, nsòmbelu webè ùdi nendè awu.

⁸⁷ Yèyè ùdi ùnyangakaja ngiikàdilù mulelèlà wa Nzambì, nè nyòòtà milelèlà yà Nzambì, yà mubidi nè musùukà, ku dyalakana dyà mpèkaatù. Mpèkaatù, ndinyangakaja's! Mpindyewu tudi tusangana nè, muntu leelù ewu, mùshindù wùdibo bangàta dinyangakaja adi; nyòòtà yà Nzambì, nyòòtà yà kwikala balenga, nè nyòòtà yònsò eyi. Bwà, bwà màyi, mbashintùlùle aci mu diyisànkisha mu kunwà kwà maalà. Nyòòtà yà disànkà, muntu yònsò mmuswè kwikala nè disànkà; nyòòtà yà bwobùmwe; nyòòtà yònsò minène eyi yidì Nzambì mutèèke munda mwètù, bwà twamònakù mwà kupeta nyòòtà Yèndè. Nzambì wàkakwenza bwà wèwè kupeta nyòòtà Yèndè, kàdi tudi tuteeta bwà kuyisànkisha nè nyòòtà yà mùshindù mukwàbò, nè mùshindù kampàndà wà dinyangakaja dyà nyòòtà mijaalàme. Nudi numòna mùdibi mu mubidi anyi? Nudi numòna mùdibi mu

nyumà anyi? Tudi twela meeji nè, patùdi ànu tukashààla bàà mu èkèleeziyà, aci—aci ncikòse bwalu, ke cyònsò citùdi nè cyà kwenza. Èè, kakùyì mpatà to aci ncyà mafi. To.

⁸⁸ Nzambi mmuswè bwà wèwè kwikala nè nyòòtà bwèndè Yèyè! “Ànu mùdi ngulungù ùjinga kasùlù kàà màyi amu, musùkà wànyì wùdi nè nyòòtà Yèbè, Èyi Nzambi.” Nwamònu anyi? Nwamònu anyi?

⁸⁹ Mpindyewu, bu kashà aku kiikàle kàjinga kasùlù kàà màyi, ambà tǔng bu muntu mukwàbò mwà kulwa, bu kashà kalundà kààkò kakwàbò mwà kulwa, nè kwamba nè: “Ambà tǔng, nènkwambilè cìndì—cìndì mufwànyine kwenza. Ndi mumanyè mwaba wùdi ciinà cyà bitoci lwà kwínshì eku.” Èè, kashà aku kakávwa mwà kuswa aci to. Kòkù, aci kì ncifwànyine kukàkwàcisha to.

⁹⁰ Nènkù kakwèna cintu nànsha cìmwè cìdi mwà kumana nyòòtà yìdi mu muntu ayi to, ànu pàdi Nzambi ùbwelamù. Yèyè ùdi nè cyà kuCipeta, cyanààna ùfwafwa. Nènkù muntu nànsha umwe kèna nè bukenji bwà kuteeta kupùwisha anyi kusànkisha nyòòtà yà cijila, yìdi munda mwèndè ayi, ku bintu byà pa buloba to. To, mukalenge. Kwenza nànkù nkupanga kuneemeka Nzambi. Nènkù wèwè nè nyòòtà yà Nzambi, kùkalabùdi muyiishi ku cyanza nè kufunda dìnà dyèbè mu mukàndà to. Wèwè nè nyòòtà yà Nzambi, kùdi cintu ànu cìmwèpelè cyà kuyisankisha, ncyà nè, kutwilangana nè Nzambi. Pawikalà nè nyòòtà yà Nzambi, ke mùshindù wùmwèpelè wùdiku mwà kutwilangana Nèndè, ngwà kwenza nànkù.

⁹¹ Nè pashiishe kùdi kàbidi njiwù minène, wèwè kùyì utàbaleela cyùdi wenza mu cikondo aci to. Wèwè nè nyòòtà yà Nzambi, ikalà mutwishiiibwe nè n’Nzambi ùdi upeta. Wamònu’s, ikalà mutwishiiibwe nè nyòòtà yèbè ke yìdi misànkishiiibwe. Kàdi piikalà Sàtaanà mukùmbàne bwà kukunyangakaja, kuumukila ku nzala yà cìfùkìlu eyi, nè yèyè neènzè nànkù bu yèyè mwà kucyènzà, yèyè ne—neàkwenzèjè ànu bwà wèwè kuteeta bwà kwikala musànkishiiibwe.

⁹² Pàdi muntu kampàndà ùpàtuka, ncinyi cìdi cyènzà bwà muntu kampàndà kukwàcìkayè maalà? Mbwalu ùdi ùditàcisha nè mucibùlùke. Kùdi cintu kampàndà cipangìke munda mwèndè.

⁹³ Mvwa nsanganyibwa ku ba-Mayo, ànu àbìdi àdi panshì aa, nè mvwa nsanganyibwa kuntwaku mu muyiiki wà bàbìdi. Nè pashiishe bàvwa bambè mu cyòci eci, nè, bààkula bwà dinwà dyà maalà, mèmè è kubàmbila nè taatù wanyì ùvwa ùnwa maalà.

Yèyè nè: “Ncinyi cìdi cimufikìshe ku dinwà?”

Mèmè nè: “Ncyèna mumanyè to.”

94 Yèyè nè: “Mbwalu kùvwa cintu kampàndà cìvwà (yèyè) kaciyi cimusànkishe to, ke yèyè kudyàmbidila nè ùvwa mwà kunwàku maalà bwà kucipàtula mu meeji èndè.”

95 Mémè kucyùmvwà ànu dìbà adi mene, nwamònu’s. Wùvwa n’Nzambì cyà bushùwà, ke cintu cimwèpelè cìdì mwà kumana nyòòtà ayi. Nzambì Nkààyeendè ke cintu cimwèpelè cìdì mwà kusankisha nyòòtà yà muntu ayi, nkwitaba Nzambì.

96 Mpindyewu Sàtaanà ùdi wàngata bintu ebi, mungãmbi amu, nè ùbinyangakaja. Dìbà adi pawikalà—pawikalà. . . Wèwè kùyi mupèèshe nyòòtà ayi mwaba mujaalàme mu nsòmbelu webè, nè kùyi ujiinga nè wangata bintu bìdì Nzambì mulongòlòle bwà kwimanyika naabi nyòòtà ayi, bwà kuyimana, dìbà adi Sàtaanà neàkulombòle ku bimwè byà ku bijibajiba byèndè byà mâyi matèngèbèle byà pa buloba ebu. Udi nè cyà kucipeta mwaba kampàndà. Wèwè kùyi mwà kupeta cyàkudyà to, udi mufwànyine kudyà byà mu cipànza cyà bukooyà. Nwamònu anyi? Nènku bu wèwè—bu nè kùvwa mwà kupeta mâyi to, kàdi mwikàle ùpunga nè lufù, udi mufwànyine kunwà ku—ku ciinà cyà mâyi cyà mùshindù kanà wònsò, bwalu udi munkaci mwà kubùtuka.

97 Kàdi kakwènakù kabingilà bwà cyòci aci to, paùdi nè nyòòtà yà Nzambì, bwalu Nzambì ùdi Nzambì udi nè mwoyi, kî ncintu kampàndà cyà maalú malonda nànsha. “Musùùkà wànyì wùdi nè nyòòtà Yèbè, Nzambì udi nè mwoyi,” Cintu kampàndà cìdì cìfila mâyi àdì nè mwoyi, Cintu kampàndà cìdì cìsànkishà.

98 Kùdi ngiikàdìlù mukwàbò, wa mu bufùki, ànu nyòòtà yà mu bufùki cyanàànà, mu nyòòtà yà musùùkà ayi. Wèwè udi mufwànyine kwamba nè: “Mwanèètù Branham, nyòòtà yà musùùkà awu ayi, nyà mu bufùki anyi?” Èyowà’s, aci’s ncyà mu bufùki emu bwà musùùkà kupeta nyòòtà. Nènku cìdì, bwalu Nzambì ngudi mukwenzè mùshindù ewu, bwà wamòna mwà kupeta nyòòtà Yèndè. Yèyè mmuswè bwà wèwè kwikala nè nyòòtà Yèndè. Mpindyewu, Nzambì ngutu mukwenzè mùshindù awu. Kàvwa nè cyà kukwenza mùshindù awu to, kàdi Wàkakwenza nànkú bushùwà. Nènku bu Yèyè kàyì mukwenzè mùshindù awu to, bwà wamòna mwà kwikala nè nyòòtà, kùvwa kufwànyine kwikala kabingilà kampàndà ku Cibàsà cyà Cilumbulwidi, kwamba nè: “Mémè—mémè—mémè ncitukù mupeètè nyòòtà yà Nzambì to.” Kàdi, kakwènakù pà kubingila to, udi nè nyòòtà ayi. Neùyìvwijè cintu kampàndà; udi mufwànyine kuyìvwija bwà mukàjèèbè, udi mufwànyine kuyìvwija bwà kàshinyi kèèbè, udi mufwànyine kuyìvwija bwà cìngà cintu, udi mufwànyine kuya mu èkèleeziyà nè kuteeta kuyisànkisha. Pàànyì ncyènà nè cìndì mfwila nè kuya mu èkèleeziyà to, kàdi aci kî ndisànkishiibwa adi to. Dyòdì nkupeta Nzambì, Nzambì udi nè mwoyi, Nzambì wa mu Dyulu, mu musùùkà wèbè, aci cìdì cìsànkisha dijìnga dikolè adi nè nyòòtà yùdì ujìnga ayi.

⁹⁹ Mpindyewu, bwalu, Yèyè mmukwenzè mu mùshindù wà wèwè mufwànyine kupeta nyòòtà Bwèndè, bwà bwobùmwè Bwèndè. Mpindyewu, kùdi nyòòtà mishùwashùwàlè yà bwobùmwè. Mpindyewu tutu baswè kutwilangana muntu nè mukwèndè. Ke citùdì twenza dilòòlò edi. Tudi tudisangisha kaaba aka dilòòlò edi bwalu tudi baswè kwikala mu bwobùmwè, muntu nè mukwèndè. Tudi twenza nàнку bwà cinyi? Bwalu kùdi cintu kampàndà munda mwètù cidì cyènzà nè tudi baswè kutwilangana muntu nè mukwèndè. Aci cidì ànu cyà mu bufùki. Nèнку mpindyewu tudi tutwilangana pa cintu cimwèpelè apa, ciinè aci, mbwalu tudi bònsò nè nyòòtà yà Nzambì. Nwamònu anyi? Nè pashìishe tudi tutwilangana kaaba aka mu mwaba wà ciibidilu, pa bintu byà bwobùmwè ewu. Mu èkèleeziyà dilòòlò edi, kaaba aka, nkufwànyine kwikala mmwènenù mishìilèshìilàngàne yà cyena-màngumba, nè bikwàbò; kàdi pàkaadibi bikafika ku nyòòtà ayi, tudi mwà kutwilangana pa cintu cimwè, cintu cimwèpelè cyà nè: tudi bònsò nè nyòòtà. Bàmwè mbafwànyine kwitabuujà dimyaminangana dyà màyi, bakwàbò abu mu dibàtiiza, nè bakwàbò mu dipòngolwelangana dyà màyi, anyi bikwàbò; kàdi pàkaadibi bikafika ku nyòòtà yà Nzambì, twètù—twètù tudi tulwa ku cintu cimwèpelè citùdì tupetelangana. Nèнку Nzambì mmutwènzè bwà twamòna mwà kwenza cyòci aci, kupeta nyòòtà Yèndè nè bwà bwobùmwè Bwèndè. Ncyèna mumanyè cintu nànsha cimwè. . .

¹⁰⁰ Pàncìvwà mwànà mutekète, ndi mvùluka nè mvwa mukolèshìibwe mu dìkù dyà bapèlè bàà menemene. Nè ndi mvùluka misangu yàbùngì yìmvwà mufwànyine kupàtuka nè bakwètù. Ncìvwakù mwà kulwàta bu bwà kuya mu mwaba kampàndà wà ndoolò to. Kàdi, ncyèna—ncyèna mumanyè to, kùdi cintu kampàndà pa bìdì bitàngilà bantu, cìntù muswè. Mvwa muswè kwikala naabò. Kàdi mvwa, mu mùshindù kampàndà, cidìbo bàbìikila nè, mùkòòkò wà cikupi. Kàdi pangààkasungidiibwà nè kusangana Cintu kampàndà aci munda mwànyì, cìmvwà naaci nè nyòòtà, Mulundà kampàndà—kampàndà, Muntu kampàndà uvwa mufwànyine kwikala mulundà wanyi, Muntu kampàndà ùmvwà mwà kweyemena, Muntu kampàndà ùdì mwà kusòmba nendè nè kuyiikila nendè bwà ntàtù yèbè. Nèнку dìbà. . . dingàkapeta disànkishìibwa dilelèlè dyà menemene adi pangààkapetà Yesù Kilistò, Musànkishi mulelèlè menemene awu udi uumusha yònsò—yònsò. . . ùjikija nyòòtà yònsò ayi, nè ùkupèèsha Cintu kampàndà cidì—cidì cimwèka ànu bu nè kakwèna cintu nànsha cimwè bwà kwangata kaaba Kèndè to.

¹⁰¹ Nèнку mpindyewu mùshindù mwìnè wùdì Sàtaanà ùteeta bwà kunyangakaja disànkishìibwa dyà musùukà edi, nyòòtà yà musùukà ayi's wè! Ùdi ùteeta bwà kukupèèsha bintu byònsò bwà kuyisànkisha. Pèndè's mmutàmbe kwikala museeswishanganyi mu matùkù à dinyangakaja aa. Ebu's

mbuloba bunyangakaja. Ncisà cinyangakaja. Mbantu banyangakaja. Byònsò mbinyangakaja, nè mmutàmbe kunyangakaja ku kakesè ku kakesè too nè mùdici cilwè kushààla cikondo ciseeswishi citùtù. . . citù kacya muntu wetù ewu musòmbèlemù. Ncitàmbe kwikala ciseeswishi kutàmbe mùvwàbi kacya.

¹⁰² Mpindyewu nudi ànu—kanwèna ànu mwà kudifwànyìkijila mùshindù wùdì ditùnga dishààle diseeswishanganyi to, nànsha mene nè bânà bèètù bàà balùme, bu mùdì beena Àmèrike.

¹⁰³ Mvwa ngààkula kùkaadi cikondo kampàndà. Mvwa mu diitu kùkaadi ndambù wa mbingu nè kusangana dibùkì dyà—dyà—dyà mfwankà diikàle panshì mwitu amu. Nènku bambèpu nè: “Kataacilu kàà muntu udi wela meeji.” Ke mèmè kutùngunuka nè kupweka mu diitu amu ndambù, kàdi mèmè kwalukila; mutùngùnùke ànu nè kulama mu meeji nè: “Kataacilu kàà muntu udi wela meeji, nè mwenya wà munù wa mfwankà.”

¹⁰⁴ Èè, mvwa nsanganyibwa ku Cisalu cyà cinsangànsàngà, kùkaadi bidimu bibidì, ndi mvùluka pàvwà nè Yul Brynner nè bònsò abu kuntwaku, díbà òvwàbo bàleeja bintu bìvwà munda mwà mfwankà. Nè mùshindù wàkangatàbo mwìshì awu nè kuwùtèeka pa kapese kàà marbre, nè kwangatabò kààlusongo aku è kukoonabò bulùngù mwab’awu, nè kubùtèeka pa mwongu wà mpùku. Mu matùkù mwandamutekète, ùvwa nè kànsèrè búngì cyanààna mu mùshindù wà kàciyiku mwà kajuukila kuulu to. Nwamònu’s, kwangacila ànu ku mucì wùmwèpelè wà mfwankà! Nènku pashiishe è kuleejabò mùshindù wùvwàbi pàvwàbu bùbwela mu cisùlusulu cyà muntu. Bàmwè bàà kùdìbo bàdi bàmba nè: “Ncyèna ngùbweja munda to. Ndi ngùpàtwila mukana mwànyi.” Kuleejabò mùshindù wùdiwu wùbwela mu matè nè wùpweka ànu mùshindù wùmwèwùmwè awu, wùbwela mu muminu, nwamònu’s.

¹⁰⁵ Ke díbà adi muntu awu kwambayè nè: “Wèwè’s udi umòna bààkula byàbúngì be bwà kataacilu.” Yèyè nè: “Mpindyewu, wèwè nè dìjinga kampàndà,” kùdi nyòòtà, udi umòna’s, “dìjinga dyà kunwà mucì wà mfwankà, mucì wùmwèpelè wà mfwankà wà mu bufùkì ewu’s mmufwànyine kusànkisha dìjinga adi bwà mpindyewu. Kàdi wèwè nè kataacilu, bìdi bìkèngela micì yà mfwankà yìnaayi bwà kusànkisha,” yèyè nè: “bwalu udi munkaci mwà kwangata ànu cyà bìnaayi cimwè cyà mwìshì awu.”

¹⁰⁶ Ki yèyè nè: “Mwenya wà munù wa mfwankà”? Nwamònu’s, kwèna mwà kupeta mwìshì kùyi mupetè kaabùdìmbù aku to. Nènku paùdì nè kaabùdìmbù, udi nè kànsèrè. Pa nànkù ki bwalu mbwòbù abu’s, nwamònu’s, bìdi—bìdi ànu budimù. Nènku ndi ngèèla meeji ku kùmpànyì wa—wa mfwankà wa kàpòndà udi mu ditùnga edi, nè—nè ùdì nè mwoyi ku ditùnga edi, nènku díbà adi nè budimù bwà mùshindù awu, kakùyi mpatà to mbwà

kuseeswisha beena mwàbò bàà Àmèrikè, bwà kubàseeswisha. Kataacilu kàà muntu udi wela meeji? Kàdi ànu budimù bwà kusùmbisha naabù mfwankà yàbùngì.

¹⁰⁷ Pashìshe mémè kwela meeji ku cintu aci nè: “Kataacilu kàà muntu udi wela meeji,” mémè kudyàmbidila nè, “aci’s ncingènyingenyi címpè.” Pa nàнку kùdi Kataacilu kàà muntu udi wela meeji, s’ke Bible ewu. Kataacilu kàà—kàà muntu udi wela meeji wíkala mwà kwangata Kataacilu aka, neKàfilè mwenya wà muntu mwakàne. Nwamònu anyi?

¹⁰⁸ Mpindyewu, kwéna mwà kukòkela mpèkaatù mu mabèji à Bible ewu to. To, Ùdi ùmwimanyika. Ùdi ùmutaata ùmupàtula. Mpindyewu, udi mwà kuya mu èkèleeziyà, nè kwangata ànu cintu kanà cyònsò eci, kàdi kwéna mwà kupicila mu Bible ewu kàdi kwikala nè mpèkaatù to. Kàakucyènzakù to. Ùdi ùtaata mpèkaatù yònsò, nè Ùdi ùfila mwenya wà muntu wa cijila. Bwalu muntu awu yéyè wela meeji nè mmuswè kwikala wa cijila, nè kwikala bu Nzambì, nè kwikala mwànà wa balùme anyi wa bakàji wa Nzambì, dībà adi ùdi dijinga nè Kataacilu kàà mùshindù mujaalàme. Pa nàнку Yéyè ùdi wimanyika mpèkaatù yònsò elu luseke lwà Bible, nè Yéyè ùdi mwà kupicishila ànu Nyumà Mwimpè mu Bible, wàkafùnda Bible awu. Mmwenya wà muntu wa cijila, bwà kwikala nè Kataacilu kàà muntu udi wela meeji aka.

¹⁰⁹ Mpindyewu tudi tujandula mùdibi bìseeswishangana leelù ewu. Maataàyi 24.24, Yesù mmwambè nè: “Mu matùkù à ndekeelu, nè, nyumà yibidì ayi neyiikalè mifwànàngàne menemene mu mùshindù wà bafwànyine kuseeswisha nè Basungula mene bu nè bìvwa mwà kwenzeka.” Mmùshindù kaayi mwinè ùdibi bitàmbe kufwànàngana’s wè! Mùshindù mwinè, ndiseeswishangana kaayi dyà—dyà bwimpè nè bubì, ditùdi naadi leelù ewu’s wè!

¹¹⁰ Nànsha mene mu—mu bukalenge bwètù, mu cidiidì cyètù, katwèna—katwèna nànsha mene nè muntu utùdi mwà kutèeka bu mwena cidiidì, wíkala kakùyì mpatà to mwà kutwà cidiye wèla meeji nè ncilelèlà aci nyama ku mikòlò. Baa Patrick Henry bèètù nè baa George Washington, nè baa Abraham Lincoln bàà leelù ewu abu bàdi penyì? Anu mwàkambà Mfùmù wetù wa ditùnga mwaba awu nè: “Mùshindù awu, bòbò baswè communisme, bàdi mwà kumupeta, cyònsò cidi bantu baswè aci.” Awu yéyè kàyì mu—muntu udi kàyì mwà kwakula bwà ditwìshibwa dyèndè’s! Muntu kampàndà wímana pa díyì dikùlù, wímanyina cidi díyì dikùlù adi . . . bàdi bajinga ànu bwà kuya ku—ku—ku njila wa maalu mapeepeja awu.

¹¹¹ Nènku mùshindù awu ngùkaadi bantu, mu èkèleeziyà. Mbaswè kulwa kushààla bàà mu èkèleeziyà, nè bàmba nè: “Kaa, èè, aci—aci’s ke cyòci aci, ndi—ndi mukashààle wa mu èkèleeziyà mpindyewu.” Udi uteeta bwà kusànkisha nyòòta

minène yà cijila yidì Nzambì mutèèke munda mwèbè ayi, Cibùmbà cyà bukòntononyi cidi citeeta kukutàngija ku cintu cijaalàme aci, kàdi uteeta bwà kuyisànkisha nè diya kashàala wa mu èkèleeziyà, ditèèla dyà twitabàayi kampàndà, anyi cintu kampàndà cyà mùshindù awu. Pààci, kí ncíngà cintu to ànu Bwikadi menemene nè dyujiibwa dyà Nzambì Yèyè mwinè mu nsòmbelu webè, diikalà mwà kusànkisha cyòci aci.

112 Yèyè kàakusànkishiibwa nè twitabàayi to. Kwàkukòkelakù twitabàayi mu Bible awu to. To. Kakwèna nànsha Twitabàayi wa Bàpostòlò, mùdibo bàcibiikila, wíkala mwà kupicilaMù nànsha. Ndeejàayi mu Bible mwaba wùdi Twitabàayi wa Bàpostòlò wàmba nè: “Ndi ngùtabuuja èkèleeziyà Munsantu wa Kàtòlikè wa cyena Loomò. Ndi ngùtabuuja bwobùmwè bwà bansantu,” pàdi Bible wàmba nè: “Kùdi Mutwàngaji wumwèpelè pankaci pàà Nzambì nè bantu, nè mwinè awu m’Muntu Kilistò Yesù.” Kwàdyàkupicishakù aci mu Bible nànsha.

113 Kwàkukòkelakù maja ónsò aa, nè tùpùtulù, nè bintu bìdi bantu bènza leelù ewu ebi, didinyònda edi nè byà bàtusi ebi, nè bintu byònsò ebi, ku Dìyi dyà Nzambì to. Kwàdyàkupicishilakù mmwènenu wa cyena leelù wa dishidimuka ewu mu Bible awu nànsha. Ùdi ùbèngangana naabi. Nwamònu anyi? Nènku udi uteeta kumana nyòòtá ayi, kàdi, nudi numòna’s, neyiikalè. . . Bible ewu neàsankishè ànu mwenya wà mulùme anyi mukàji mwakàne. Nyumà Mwímpè ewu, udibò mwà kuseka awu, nè kwamba nè: “Udi mujimije lungènyi.” Kàdi Aci cidi cisànkisha dijinga adi, cintu kampàndà cidi bàà pa buloba kabàyi bamanyè kantu nànsha kàmwè pa cyòci aci to. Bàkaadi badinyangàkàje bóbò biinè, kuumuka ku dibàtiiza dilelèlè dyà Nyumà Mwímpè nè Dìyi dyà Nzambì, (kuya ku cinyi?) ku biinà byà bùcyafù, biinà byà bùcyafù byà èkèleeziyà, byà mēyi maswika nè twitabàayi, nè—nè tulumbùlumbù twà cyena-màngumba, nè bikwàbò.

Wamba nè: “Wèwè udi mwena Kilistò anyi?”

114 “Mémè ndi Méthodiste. Ndi Baptiste. Mémè ndi Presbytérien.” Aci kaciyèna nè cidici cyùmvwija kùdi Nzambì to, nànsha címwè. Kwèna mwà kupicisha bintu abi mu Bible wa Nzambì emu to. Kàdi udi ukèba bwà kusànkisha nyòòtá yà cijila yidì Nzambì ùkupèèsha ayi, bwà kwikala Nendè nyòòtá. Ncyà bushùwà anyi?

115 Mpindyewu, nudi bamanyè nè Davidi mmwambè mwaba ewu nè: “bwà Nzambì udi nè mwoyi.” Mpindyewu: “Ku cibangidilu kwàkadi Dìyi, nè Dìyi dyàkadi nè Nzambì, nè Dìyi dyàkadi Nzambì. Nè Dìyi dyàkavwijiilbwa mubidi nè dyàkasòmbela munkaci mwètù.” Dìbà adi kakwèna mwà kwikala disànkishiibwa to ànu pàdi Dìyi edi, didi Nzambì adi, dilwa nè mwoyi munda mwèbè, díbà adi udi umòna Nzambì Yèyè mwinè munkaci mwà kuuja milayi yàkafilàYe mu Bible.

116 Mpindyewu tudi nè buumvwija bashiilèshiiàngàne bàà Bible. Èkèleeziyà umwe ùdi ùMuumvwija mùshindù *kampàndà*, mukwàbò ùdi ùMuumvwija mùshindù *kansanga*, nè mukwàbò mùshindù *kankènga*. Bàmwè bàdi bàngata ànu ndambù Wendè mukesè; bàmwè bàdi bàngata *apa* nè *pàapa*, citùpà Cyèndè. Kàdi Nzambì m’Mudyùmvwijidi wa Yèyè Mwinè. PàdiYe ùfla mulayi nè ùwùkùmbaja, ke dyumvwija dyàwù ndyòdi adi.

117 Bu mèmè mwà kukulaya nè nèngìkalè kaaba aka dilòlò edi, kàdi’s ke mèmè ewu, aci’s ke dyula dyà mulayi wànyi. Mèmè mwambè nè nèntwilanganè neenù mu dindà, nè mèmè mwikàle mwab’awu, ke mulayi wànyi ngwòwò awu. Kabyèna nè mushinga bwà kufila tubingilà tukwàbò to, bikèngela ngìkalè mwab’awu.

118 Nènku pàdi Nzambì ùfla mulayi, nè pashiishe ùseemena nè ùkùmbaja mulayi awu, ke dyumvwija dyà mulayi ndyòdi adi. Nènku ndi mwà kwela muntu kanà yònsò ewu kadyòmbò bwà kukwàta Nzambì ku Dìyi Dyèndè, nè kumòna Dìyi dyònsò didi mu Bible awu ní kí m’Bulelèlè. Ncyà bushùwà. Ke cidi nyòòta ayi muntwamu.

119 Wèwè udi wamba nè: “Bu nè mwakù nè mwoyi mu matùkù à Yesù, nùnkù’s ndi mwenzè *cikampàndà*.”

120 Mòna’s, wèwè’s udi nè mwoyi mu matùkù Èndè. Citùdi twenza pa bwalu abu ncinyi? Citùdi munkaci mwà kwenza ncinyi? Wèwè udi wamba nè: “Èè?” Cyùdi mwènzè, pàmwàpa cìvwà Bàfaalèsà bènzè. Bàvwa bàà mu èkèleeziyà, kàdi bààkavila Yesù Kilistò.

121 Tutu misangu yònsò twamba leelù ewu, bantu bàtu bàteeta kwamba nè: “Tudi tupàlakaja. Bikèngela tupalakajè dibèjì dyà Bible nè dibèjì dyà Bible, Mufundù nè Mufundù.” Aci kí m’Bulelèlè to. To, kí m’Bulelèlè to. “Mwàkù wà mu cyena Ngelikà ewu wùdi wùmvwija *cikampàndà*, nè *cikansanga* cidi cyùmvwija *cikankènga*.” Beena Ngelikà bòbò mene, kale wàwa mu Nsangilu wa Nicée, nè bafundì bàà kale abu, bàvwa nè mmwènekèlu mishiièshiiàngàne. Umwe uvwa mwitabuujè mùshindu ewù, mumanyi wa dibàla wa cyena Ngelikà *ewu* uvwa uswa kwamba *cikampàndà*, nè mukwàbò wamba nè *cikansanga* cìvwà cyùmvwija mùshindù *ewu*. Nè bàvwa bàkòkangana pa Cyòci aci. Katwèna dijinga dyà dyumvwija dyà bamanyi bàà mabàla bàà cyena Ngelikà anyi myàkù yà cyena Ngelikà to.

122 “KuMumanya Yèyè’s ke Mwoyi,” Mupèrsonà awu, Kilistò Yèyè mwinè! Kaciyi kupàlakaja to. Ndibuulula òvwà Nzambì mwibàkilepù Èkèleeziyà Wendè. Nènku twètù katùyì biibàkile pa Èkèleeziyà umweumwe awu to... Bible mmwambè nè: “Abèlè, ku diitabuuja!” Nè diitabuuja ndibuulula dyà kùdi Nzambì. Nwamònu’s, diitabuuja ndibuulula dyà kùdi Nzambì. Èyo. Cintu cyònsò eci mu kaabujimà nciibakila pa dibuulula díbà adi, nènku ànu eci cyòci ciikàle cikubuulwila! Yesù

wàkamba nè: “Ndi nKusàkidila, Taatù, bwalu Wèwè udi musokòke bintu ebi kùdi beena meeji bàà pa buloba ebu, kàdi mubibuulwile bàna bakesè bu bàdi baswè kuyiila.” Nwamònu’s, mpindyewu, cintu cyònsò mu kaabujimà nciibakila mwaba awu, bikèngela ùmanyè Mupèrsonà awu!

¹²³ Kàdi kwèna mwà kusànkisha aci ku diya kashààla wa mu èkèleeziyà to. Bikèngela ùpete Mupèrsonà awu, Nzambi Yèyè mwinè, udi Dìyi nè—nè dyumvwija dyà Yèyè mwinè leelù ewu awu, milayi yàkafilàYe leelù ewu ayi. Bantu bàvwàYe nè cyà kwikala naabò mu ditùkù edi abu, “Èkèleeziyà udi kàyi katobà anyi mufudi,” kèna ùswa kwamba dingumba to; cidi cyumvwija nè bantu, bantu-nkààya bàdi kabàyi nè katobà anyi mufudi. “Nekwikalà bàbìdì mu bulaalu, Nèngàngatè umwe kàdi kushiya umwe; bàbìdì mu budimi, Nèngàngatè umwe kàdi kushiya umwe.” Kàdi pàdi Nzambi, nyòòtà yà cijila ayi bwà kwikala bu Yèyè, nè pashiishe udi umòna nè Dìyi Dyèndè didi munda mwèbè, diDishindika, nè wèwè udi musadidi wa Nzambi. Cyònsò cidi Nzambi wamba aci, wèwè udi ànu kacya wakwàtakù, dìbà adi udi ulwa mu njila mujaalame dìbà adi bwà kusànkisha nyòòtà yà cijila yidi munda mwèbè ayi.

¹²⁴ Kaa, mu bushùwà bwà bwalu, bantu nebàkusekè, bàmba nè: “Udi mujìmije lungènyi. Udi mupâlè.” Kàdi vùlukààyi kùdìbo bànwina aku, nwamònu’s. Tàngilààyi kùdìbo bàsanganyiibwa. Udikù mwà kudifwànyikijila ciinà cinène cyà màyi cidi cìfùkuka màyi malenga, nè muntu kampàndà kwìnshi kwà biinà kuntu kwàka, nè bivuba bifwè, nè twitabàyi, bintu byònsò bìsanganyiibwamù, ùnwa kwìnshi aku, wèla mèsù muulu munkaci mwà kukwelulwila anyi? Kaa! Mòna’s, yèyè kí mmumanyè to, kí mmumanyè cidi—cidi Musùlù wùdi wùjikija nyòòtà wùdi musòmbèlekù awu to. Ncyà bushùwà menemene.

¹²⁵ Tudi nè Nzambi udi nè mwoyi. Kí ng’ewu wakafwà kùkaadi bidimu cinunu nè nkàmà citèèmà nè mushààle mu lukità to, kàdi ng’Ewu wakabiika ku lufù awu. Ebèlù 13.8, ùdi wamba nè: “Yèyè ùdi umweumwe awu makèèlèlè, leelù, too nè kashidi.” Nyumà Mwímpè umweumwe wàkamata mu Ditùkù dyà Mpenta awu ùdi Nyumà Mwímpè umweumwe udi kaaba aka mpindyewu ewu. Yèyè ke Citùpà cidi cisànkishà, bwalu Yèyè ke Dìyi. Ncyà bushùwà. Nyumà Mwímpè ngwakafùnda Dìyi, Yèyè ùdi ùmvwija Dìyi. Bible mmwambè, mu Peetèlò Mwibìdì nè, Nyumà Mwímpè ngwakafùnda Bible: “Bantu bàà kale, basàka kùdi Nyumà Mwímpè, bàakafùnda Bible.”

¹²⁶ Mpindyewu, kwèna mwà kucyènza to, kwèna mwà kumana nyòòtà yà cijila ayi nè cintu nànsha cìmwè to ànu Nzambi Yèyè mwinè musòmbèle munda mwèbè amu, mu Mupèrsonà wa Nyumà Mwímpè. Dilonga dyà tulaasà, nkolèshèlù mulenga, diya kashààla wa mu maèkèleeziyà, dyamba ku mwoyi dyà twitabààyi, diya kashààla wa mu bwobùmwè kampàndà; bintu byònsò ebi’s mbímpè be, kàdi kakuyi mpatà to kabyàkwimanyika

cinyàànyà cyà cijila aci to, nyòòtà yà cijila ayi—ayi, èyowà's wè, kayàkupùwishakù nyòòtà yà cijila ayi to.

¹²⁷ Mwva munkaci mwà kutèeleja Billy Graham, mutangadiki munène awu, dilòòlò adi. Ndi nnwàmbila, ndi mmusambidila bikolè mpindyewu kutàmba munkaadiku mumusambidile. Ngàakamumòna menemene ùbàmbaci, mùshindù ùvwàbo bènza. Yèyè nè: “Musùmbà wa balombodi bàà èkéleeziyà bàvwà bènda bàpweka nè njila abu, nè nshingù yà nkoolò ayi!” Bàya kuntwaku kùvwàbo kabàyi nè cyà kuya aku, bàkadibwinka mu cintu kampàndà. Kàdi bàvwa bènda bàpweka nè njila, bàtuuta bikàshì nè bàtuuta makàsà panshi. [Mwanèètù Branham ùdi ùtuutakaja byanza—Muf.] Èè, bàvwa nè mmwènekèlu wa babunguluki bàà mu malaba bakooyike. Mpindyewu, nudi numòna's, kàdi bàdi nè cintu kampàndà cidìbo—cidìbo biitabuujà. Bàdi nè cintu kampàndà, cidì cìsalula musùukà. Bàvwa nè cintu kampàndà cìvwàbo basalùkile. Mukàji kampàndà kuyayè nè kuditwayè mu cintu kampàndà kuntwaku, nè kwelabò meeji nè ùvwa mufwile diitabuujà, pèndè kàvwa nè cyà kubwelakanamù to. Mpindyewu tudì tusangana nè bantu aba [Mwanèètù Branham ùdi ùtuutakaja byanza] bàvwa nè cintu kampàndà cìvwàbo mwà kutuucila nkàshì. Bàvwa nè disànka. Bàvwa munkaci mwà kwenza cintu kampàndà.

¹²⁸ Èè, wèwè mwà kwenza aci bwà díyì dikùlù kampàndà—kampàndà dyùdi wela meeji nè ndijaalàme mwab'ewu; nè pashìishe kwimana mu èkéleeziyà nè muntu kampàndà kutuuta bikàshì anyì kutwà dikàsà dyèndè, balami mbàfwànyine kumulombola pambèlù pàà ciibi. Nwamònu's, mbatàngije cisàmbà cyàbò ku ciinà cyà bukooyà cyà twitabàayi nè dngumba, pamutù pàà kubàdiisha Díyì dyà cijila dibèneshìibwe dyà Nzambì, dìdì difidiibwa ku Bukolè bwà dibìikà dyà ku lufù bwà Yesù Kilistò adi.

¹²⁹ Nwamònu's, bàdi bàteeta bwà, bàdi bàmana nyòòtà yàbò pa kwamba nè: “Mémè's ke Docteur *Kampàndà*,” anyì mupàtuke mu sèminère kampàndà anyì mu cilongelu kampàndà. Kàdi aci kacýèna nè cidìci cyùmvwija to, nànsha cimwè. Kàdi, nudi numòna's, bóbò, bàdi bàteeta bwà kudìsànkisha, bàmba nè: “Mpindyewu Nzambì neànjingùlùlè bwalu ndi mpaasàtà Wendè. Nzambì neànjingùlùlè bwalu mémè ndi Taatù wa cijila *Kampàndà*, anyì Mwèpiskòpò *Kampàndà*,” anyì—anyì cintu kampàndà bu nàнку. Bàdi bàteeta kusànkisha nyòòtà yàbò kuntwaku, pààbì kwèna mwà kwenza nàнку to. “Ndi nè Ph.D., LL.D. Ndi nè dipòlomè dyànyì dyà Licencié mu mamanya. Ndi nè cikampàndà.” Abi's mbìmpè. Kàdi, bwànyì mémè, aci cidì ànu cyùmvwija nè wèwè udi kule menemene nè Nzambì. Ncyà bushùwà. Ànu utàmba kuya kule menemene nè Nzambì, díbà dyònsò!

¹³⁰ Udi umanya Nzambì ànu ku dilabula. Kwèna mwà kubweja Eci mu wèwè ku dilonga dyà tulaasà to. Ncilediibwe munda

mwèbè! Ncintu kampàndà cidi Nzambì ùkupèèsha. Dilonga dyà tùlaasà kadyèna naaCì bwalu to. Umwe wa ku bantu bàà batàmbe bunène bàà mu Bible kàvwakù nànsha mwà kufùnda dìnà dyèndè to, Peetlò Munsantu. Ncyà bushùwà menemene, yèyè nè Yone, Bible mmwambè nè: “Bónsò bwàbò bàvwa bapangi nè kabàyi balongè mukàndà to.” Kàdi byàkasànkisha Yesù bwà kumupèèsha nsapì yà Bukalenge, bwalu yèyè ùvwa nè nyòòtà yà Nzambì. Amen. Kwikala nè nyòòtà yà Nzambì, bwobùmwe. Eyowà’s, mukalenge. Kaa, ekèlekèle!

¹³¹ Ndi mvùluka Yeshàayi, nsongàalùmè awu, kaa, nsongàalùmè mulenga wa dikèma, ùvwa usanganyiibwa mu ntempèlù mwàmwa, dínghà ditùkù.

¹³² Mfùmù munène awu, nè wàkatàngija mèsù ende kùdiye nè kwela meeji nè ùvwa umwe wa ku bantu batàmbe bunène. Bushùwà, ùvwa muntu munène. Ùvwa mukolèshìibwe kùdi, baledi bìmpè, maamù mwîmpè nè taatù. Kàdi pààkapàtukayè, cidiiidi cyèndè cívwa cikezùke, nè wàkenza maalù mu mùshindù mujaalàme kumpàlà kwà Nzambì. Ke Yeshàayi kumutàngila nè kwela meeji nè ùvwa muntu munène, kumwangatayè bu citembelu. Kàdi kanùtèèkikù (kashidi kèènu) muntu nànsha umwe bu Citembelu cyènu to, pa kuumusha Muntu Kilistò Yesù. Muntu yònsò ewu neàpangilè. Paanyimà pàà katanci kampàndà, kufikayè pa kaaba kampàndà; yèyè’s—yèyè’s ùvwa mfùmù, kàdi kuteetayè bwà kwangata kaaba kàà mwakwidi nè kubwela mu ntempèlù, kàdi kutuucikayè nè nsudi.

¹³³ Dìbà adi Yeshàayi wàkatàcishiibwa bikolè, ke kuyayè mu ntempèlù nè kutwàdijayè ku—kusambila, kudyàmbidilayè nè ùvwa mwà kupweka nè kusambilakù ndambu. Nènku mpindyewu, tàngilàayi, muntu awu’s ùvwa mupròfetà; kàdi mu ntempèlù amu bu nsongàalùmè, ùvwa ùdidila Nzambì, dínghà ditùkù, ke cikèèna—kumòna kupònaci kumpàlà kwèndè. Kàdi pààkenzàye nàнку, kumònayè Banjèlò, Bakèlùbà, nè mpàlà Yàbò mibwikila nè Àbò—nè mapwàpwà Àbò, nè makàsà Àbò mabwikila, nè bàbùuka nè mapwàpwà àbidi. Nènku Bàvwa bènda bàya bàtwa kumpàlà bàtwa paanyimà, bàbànda bàpweka mu ntempèlù, bèèla mbilà nè: “Wa cijila, wa cijila, wa cijila m’Mukalenge Nzambì wa Bukolè bwònsò.”

¹³⁴ Nènku Yeshàayi, nyòòtà minène yàkadiye naayi ayi, yèyè—yèyè ùvwa pàmwàpa mulongèshìibwe mu tùlaasà. Yèyè—yèyè ùvwa pàmwàpa mulonge kàlaasà bìmpè. Yèyè ùvwa nè—nè mmwènu mulenga wa cívwa cikèngela bwà Nzambì kwikala Yè. Ù—ùvwa mutèlèje baakwidi. Ùvwa mu ntempèlù. Ùvwa mukolèshìibwe bwà kwikala mwena—mwena kwitabuuja, kàdi, nudi numòna’s, kacya kàvwakù mwanji kutwilangana naaCì mpàla nè mpàla kwònsò aku to. Nwamònu anyi? Ù—ùvwa nè dijinga dyà kwenza maalù majaalàme. Ùvwa muswè kwikala mubingè, kàdi ùvwa yèyè ànu nè luseke lwa dilonga dyà tùlaasà. Ùvwa nè luseke lwaCì lwa tèlòlòjì.

135 Kàdi pààkabwelàye mu ntempèlù amu ditùkù adi, nè kumònayè Bakèlùbà aba bàpaapaja mapwàpwà awu bàtwa kumpàlà bàtwa paanyimà, nè kujingululayè nè Banjèlò aba bàvwà bakwàta mudimu kumpàlà kwà Nzambì (Nè Biine Banjèlò abu kabàvwà nànsha bamanyè nè mpèkaatù ncinyi to; kàdi bwà kwimana mu Bwikadi bwà Nzambì bivwa bìkèngela bwà bòbò kubwikila mpàlà Yàbò yà cijila, bwà kwimana mu Bwikadi bwà Nzambì.), pashiishe ke mupròfetà awu kwelayè lubilà nè: “Dyàkabi dyànyì, bwalu ndi muntu wa mishikù mibiipe. Tèlòlòjì wanyì yònsò, tèlòlòjì nè bintakanyi bìndì mulonge abi, mmwènenu wanyì yònsò mulengèle wùmvwà nèndè bwà Nzambì awu, ke mèmè ewu mukùngàmàngàne naaci mpàlà nè mpàlà mpindyewu.” Yèyè nè: “Ndi muntu wa mishikù mibiipe, nè ndi musòmbe nè bantu bàdi nè mishikù mibiipe.” Dilongesha dyàbò dyònsò dyà mikenji, nè bikwàbò bivwàbò benzè, kàbivwakù byànji kumufikishaa mu mwaba wàkabwelàye mu Bwikadi bwà Nzambì awu, nè kumònayè Nzambì nè èndè àbìdi to; nè kajila Kèndè, pàvwàYe musòmbe Kuulu apu, mu Maulu. Nènku’s ke yèyè awu mwaba awu, mukùngàmàngàne nè bulelèlè mpàlà nè mpàlà. Nènku kwelayè lubilà nè: “Ndi muntu wa mishikù mibiipe, nè ndi musòmbèlè munkaci mwà bantu babiipe.”

136 Kí pààkangata Mukèlùbà lukwàtù, nè dikàlà dyà Kapyà dyà ku cyoshelu, nè kulengayè mishikù mibiipe ayi. Nè kumukùdimuna kumuumusha ku muntu mutulùmùke, anyi ku muntu mulongè tùlaasà, mulongeshi, kushààla mupròfetà uvwa Díyì dyà Nzambì mwà kwakwila kùdiyè. Bushùwà’s, pàvwàye mu Bwikadi bwà Nzambì apu, Cìvwa ncintu cishiilàngàne. Nyòòtà yàkadiye naayi ayi, yàkafika mu kaaba aku dîbà adi, too nè mwàkuujiibwàye naaCì.

137 Kàdi lekèlè nkwbambilè, wèwè mulundà wanyì, nànsha wèwè mukashààle wa mu èkéleeziyà búngì kaayi, nànsha wèwè mufunde mènà búngì kaayi, njila kaayi úyaayà, nè nànsha wèwè mumyaminyiibwe màyi, mubàtùjiibwe, anyi cyònsò cyùdi aci; too nè pawàtwilanganà nè Mupèrsònà awu, Yesù Kilistò! Aci, s’ke cintu cimwèpelè cyàsànkishà bulelèlè ncyòci aci.

138 Disaluka kadyàkucyènza to; udi mufwànyine kutùpika kuya muulu kwalukila panshi nè kwela mbilà ntàntà yònsò wùdi muswè awu, anyi udi mufwànyine kunyeemakana kutwà eku nè eku panshi, nè udi mufwànyine kwakula mu myakulu búngì bùdi muswè. Nè bintu abi mbyà cijila nè bìmpè. Ncyèna ngàmba—ncyèna ngàmba cintu cibì bwàbì to. Kàdi ànu too nè paùdi utwilàngana nè Muntu awu, Cìtùpà cìdi cìsànkishà aci, Cintu kampàndà cìdi cyàngata kajilu kònsò kàà mubidi wèbè aci; kí nku disaluka to, kàdi ku disànkishiibwa!

139 Kale wàwa mvwa mmòna kaacimanyinu kakesè, kàmba nè: “Wèwè nè nyòòtà, ambà nè Parfay.” Kùvwà tumaalà tukese, pàncìvwà nsongàalùme, bàtùbiikila nè Parfay. Ndi mvùluka

pâmvwà ngènda mpweka nè njila, kaa, ngùumukila ku dilòba, mvwa mubànde ku dijiba aku, mâyi à kale à matèngèbèle awu. Kàdi mvwa nè nzala yàmba kunshipa, ke mèmè kumòna cimanyinu cyàmba nè: “Wèwè nè nyòòtà ambà ànu nè Parfay.” Mèmè kutwàdija kwamba nè: “Parfay, Parfay.” Mèmè kàdi kutàmba kwenda kuumvwa nyòòtà dibà dyònsò. Nènku ndi—ndi. . . Nwamònu’s, mèmè—mèmè—mèmè kufika mu mùshindù wà ne ncìwwa nànsha mwà kutwila matè to, paanyimà pàà katançi, mvwa nè—nè nyòòtà yà dikèma.

140 Èè, nudi numòna’s, aci kacỳàkucyènzakù to. Kakwèna cintu nànsha cimwè cyàcìsànkishakù to. Ncyèna ncyùka to, udi mwà kunwà Coca, udi mwà kunwà cintu kanà cyònsò cyùdi muswè kunwa àci, ciikàlè nè mâyi meela nsùkaadi nè carbone awu, nè bikwàbò, kakwèna cintu nànsha cimwè cyàjikija nyòòtà bu mâyi matalàlè, à cyashima à mu musùlù nànsha. Awu’s neikalè mwà kumana nyòòtà ayi. Bintu bikwàbò byònsò ebi mmipanganyi.

141 Kàdi mbwà cinyi butùdi baswè kwangata mupinganyi, pàdiku dibàtiiza dishùwashùwàlè dyà Nyumà Mwimpè didi disànkishà mijilu yònsò nè majinga munda mwà musùkà wà muntu? Dìbà adi udi wimana ànu mumpàlà mwà lufù, bu mwàkambà Mùpostolò munène Pòlò nè: “Wèwè lufù, kalonda kèèbè kàdi penyi? Nè, lukità, bucimunyi bwèbè bùdi penyi? Kàdi twasàkidila kùdi Nzambi, Udi utupèeshila bucimunyi ku Mukalenge wetù Yesù Kilistò!” Ke dilabula ndyòdi adi, mwanèètù, didi disànkisha cinyàànyà cyà cijila cidi. . . anyi nyòòtà yà cijila yidi munda mwèbè ayi. Didi diyisànkisha. Kwèna nè cikwàbò cintu nànsha cimwè cyà dyanza pa bwalu abu to. Èyowà, Didi dikezula mishikù.

142 Nènku kùdi, kàbidì, bantu bàdi nè mwoyi ànu ku disaluka, pa. . . Bàmwè bantu bàtu bàmba nè: “Èè. . .” Tudi nè byàbúngi byà nàнку abi mu nkwaka wetù wa cyena-Mpenta. Nènku nebàbwelè, cidi ànu cintu cimpè, nebàtuutè bikàshì nè kwimba mijiki. [Mwanèètù Branham ùdi ùtuutakaja byanza—Muf.] Mùjikì wùdi ànu wìmana anyi: “sh, sh,” mbicìkìjìlè bintu byònsò abi mbekeci wa mâyi, nwamònu’s. Mpindyewu tudi—tudi twenza nàнку, tudi—tudi tuditwa mu ciibidilu cyà kwenza nàнку. Tudi nè, tudi—tudi. . . Cidi ànu cishààlè cimwè cyà ku bilèlè byètù.

143 Lekèlaayi nnwàmbilèku cintu kampàndà. Paùdi ukuukwila Nzambi, mu Nyumà nè mu Bulelèlè, pàdici cishààla *cilèlè* bwà wèwè kucyènta, nè bwalu udi wela meeji nè udi nè *cyà* kucyènta; bwalu udi wela meeji nè, wèwè kùyì mwelà mbilà to, anyi mutùpìke muyè muulu mwalukilè panshi to, anyi mujè maja nè mùjikì awu, mwena mutumba webè ùdi mwà kwela meeji nè udi mutwè cimpingà; udi munkaci mwà kunwà ku musùlù wà mâyi matèngèbèle. Cyà bushùwà!

144 Too nè mùdiCi cyùja kajilu nè kajilu kònsò, too nè mùdi Nyumà Mwimpè Yèyè mwinè ùtùtuka munda mwèbè; nànsha

mùjikì mwikàle wimba, nànsha bôbò bimba musambu wà nè *Pèpì Neebè, Nzambì Wanyì*, anyì ní ncinyì cyònsò, Nyumà Mwímpè ùcidi ànu wèla ngonga yà butùmbi mu mwoyi wèbè. Aci cidi cisànkishà. Ke Citùpà cyà Nzambì cidi cisànkishà ncyòci aci. Bwà cyà cishàadile ku Cyòci aci, kwèbè nkujikè.

¹⁴⁵ Udi mufwànyine kwakula mu myakulu ànu bu bantu nè Banjèlò, udi mufwànyine kufila bintu byèbè byònsò bwà kudiisha bapèlè, udi mufwànyine kwamba cipròfeta, nè udi mufwànyine kwikala nè dimanya, kuumvwa maalu masokoka ónsò nè bintu byònsò ebi, kàdi wèwè udi ànu cintu cyanaàna (Kolintò wa Kumpàlà 13) too nè pàdi Cintu kampàndà cidi cisànkisha aci cidi nkààyaaci mwà kumana nyòòtà ayi aci.

¹⁴⁶ “Musùukà wànyì wùdi nè nyòòtà yà Nzambì udi nè mwoyi, ànu mùdi ngulungù ùjinga kasùlù kàà màyi amu. Ànu mème muMupeta, cyanaàna nembùtukè.” Paùdi ufika ku dipeta nzala yà Nzambì mùshindù awu, cintu kampàndà necyènzekè. Bikèngela bwà Nyumà Mwímpè àkulombòlè ku mpokolo minènè yà Nzambì ayi. Eyowà’s, mukalenge.

¹⁴⁷ Mpindyewu, ncintu cimpè, bwà kukuukwila mu Nyumà. Aci’s ncilelèlè. Kàdi misangu mikwàbò nudi nè Nyumà kakùyì Bulelèlè to. Yone Munsantu 4, mmwambè nè: “Tudi tukuukwila Nzambì, mu Nyumà nè mu Bulelèlè.” Nè Yesù ke Bulelèlè. Ncyà bushùwà menemene. Nè Yèyè ùdi Dìyì.

¹⁴⁸ Tusùlù twàkatùmà Nzambì bwà kunùsankisha, mu bufùki emu, Sàtaanà wàkakooyisha kònsò kàà ku tótù. Mmwelè dimata dyà mulungù mu kònsò kàvwayè mwà kubwelamù aku. Ncyà bushùwà. Wàkangata musùlù munènè, wà èkèleeziyà awu.

¹⁴⁹ Aci, ke civwà njila wa Nzambì. Yesù wàkamba nè: “Pa lubwebwe elu Nèngiibakilèpu Èkèleeziyà Wanyì, nè biibi byà ifèrnò kabyèna mwà kuMutàmba bukolè nànsha.”

¹⁵⁰ Mpindyewu kùdi makokyanganyi mashiilèshiiàngàne pa bwalu abu. Beena Loomò, beena Kàtòlikè bàdi bàmba nè: “Yèyè wàkaMwibakila pa Peetèlò.” Nwamònu’s, nènku byòbì biikàle nàнку, Peetèlò’s wàkatwà cimpìngà, mu matùkù makesè. Nàнку, Kabìvwa nàнку to. Ncyà bushùwà nè Kàvwa mwibakila pa Peetèlò to, *Petra*, lubwebwe lukesè. Nè pashiishe beena Mishòònyì bàdi bàmba, nè: “Yèyè wàkaMwibakila pa Yèyè mwinè, Yesù Kilistò.” Kabìyì bwà kupanganangana to, kàdi ndi mpangakana naabò. Yèyè kàakaMwibakila pa eci anyì cikwàbò to.

¹⁵¹ Yèyè wàkaMwibakila pa dibuulula dyà nè Yèyè ùvwa Nganyì. Yèyè nè: “Udi mubènèshiiibwe, Simonà, mwàna wa Yona, kí mmusunya nè mashi bìdi bikubuulwile eci to, kàdi Taatù Wanyì udi mu Dyulu ngudi mukubuulwileci.” Kí nku dimanya to! Kwèna muCilongèle ku mikàndà to. Kwèna muCilongèle ku diya kashààla wa mu èkèleeziyà to. Kwèna muCilongèle mu mbilà to. Uvwa...Kàdi Nyumà Mwímpè Yèyè mwinè

ngudi mukutwàdile Mupèrsonà wà Yesù Kilstò, dìbà adi: “Pa lubwebwe elu Nèngiibakilèpu Èkèleeziyà Wanyì, nè biibi byà ifernò kabyèna mwà kuMutàmba bukòlè to.” Nyòòtà yà cijila ayi mmisànkishiibwe mu Mupèrsonà wà Yesù Kilstò. Ki bwalu mbwòbù abu’s. Ke cintu citùdi baswè kukèba ncyòci aci, kusànkisha nyòòtà ayi nè Cyòci aci. Èyo, tudi tusangana nè tudi nè cyà kucyèna.

¹⁵² Dimanya? Kaa, ekèlekèlè! Dimanya’s ncintu cinène, citùdi bùjiibwe naaci, nè leelù ewu tudi bùjiibwe naadi tètè. Kàdi nudi numòna’s, dimanya . . .mùmvwà ngàmba ditùkù adi amu, pàmvwà ngàakula pa cyena-bwalu cyà dimanya aci. Kùvwa muntu mwimàne pabèlù apu, ùvwa wàkula nè mulundà wanyì kampàndà mwimàne mwaba awu, wàmba nè: “Muntu yèyè kàyì wítabuujà dilonga dyà tùlaasà, bwà cinyì ùdi ùbala Bible?” Bòbò . . .

¹⁵³ Mémè kudyàmbedila nè: “Èè, pìikalàbo kabàvwa buumvwe cìvwa Mukalenge Yesù mwambè, mmunyi mwikalabo mwà kuumvwa cinyonga bu mémè ewu’s, cìndi ngàmba aci?” Kabàvwa nànsha mwà kuumumvwa Yèyè to, nànsha mùvwàYe wàkula bitòòke tòò amu.

¹⁵⁴ Yèyè wàkamba mwaba awu dīngà ditùkù nè: “Nwènu kanùyì badyè mubidi, Mashi, banwè Mashi nè badyè mubidi wà Mwànà wà muntu, kanwèna nè Mwoyi munda mwènu to.” Yèyè kààkaCyùmvwija to. Wàkatùngunuka nè kuya. Ncyà bushùwà. Nwamònu anyi?

¹⁵⁵ “Èè,” mwàkambàbo, “Muntu ewu’s mmudi wa minyìinyi yà bantu. Tudi baswè bwà Yèyè . . .kudyà mubidi Wèndè, kunwà Mashi Èndè. Yèyè’s mmukishi munù wa mashi à bantu. Nwamònu’s, Yèyè mmuswè bwà twètù kulwa mikishi minù yà mashi à bantu.” Nwamònu anyi? Beena mamanya à mu mitù abu’s!

¹⁵⁶ Kàdi Yèyè wàkamba nè: “Mìkòòkò Yànyì yìdi yùmvwà Dìyì Dyànyì.” Nwamònu’s, Cìvwa mwà kulwa kùdi Basungula, Nzambi ùvwa musungùle ku didyànjlila-kumanya. “Nè aba bàdi Taatù . . .Muntu nànsha umwe kèna mwà kulwa kùNdi pàdi Taatù kàyì mumukòke nànsha. Nè bònsò bàdi Taatù muMpèèshe, nebàlwe, nebàCyùmvwè.”

¹⁵⁷ Bayiidi abu kabàvwa mwà kuCyùmvwà to, kàdi bààkaCìitabuujà. Nwamònu anyi? Ncyà bushùwà. Wèwè muCìtàbùùje’s! Ncyèna mwà kuumvwa bintu byàbùngì to. Ndi mBìitabuujà, nànsha bìshi, nwamònu’s, bwalu Nzambi mmwambè nè Bìvwa nànkù.

¹⁵⁸ Dimanya. Udi mumanyè’s, èvànjeeliyò wa Sàtaanà’s ndimanya. Nuvwakù bamanyè nànkù anyi? Wàkaciyyiisha mu budimi bwà Edèna, kùdi Evà, nè wàkaseeswishibwa ku èvànjeeliyò wa dimanya dyèndè. Mpindyewu, nè mmukooyishe bukwàbantu bwònsò nkòong, nè cyòci aci. Ncyà bushùwà

menemene. Mbangàtè ndongamu yà dilonga dyà tùlaasà, bayitèèke mu èkèleeziyà. Yidi ànu mimpè *kuntwaku*, kàdi kí mmu Dìyì dyà Nzambì to. To, mukalenge. Kwèna umanyina Nzambì ku dilonga dyà kàlaasà to. Kwènà umanyina Nzambì ku—ku—ku dimanya mùshindù wà, dilonga dyà makùmi nè dishindumuna myâkù minène to.

¹⁵⁹ Pòlò, yèyè ùvwa muntu wa meeji matwè. Kàdi pààkalwàye kùdi Kilistò, nè kupetayè Nyumà Mwímpè, kuya kùdi beena Kolintò, wàkamba nè: “Kacya ncyàkalwakù kunùdi nè mèyi à àkòkangana ntèmà à lungènyi lwà bantu nànsha,” nànsha mùvwàye mufwànyine kwikala mucyènzè amu. Yèyè nè: “Ndi mulwè kunùdi mu bukolè nè dimwèneshiibwa dyà Nyumà Mwímpè, bwà diitabuuja dyènù kwikaladi mu Nzambì, kí mmu lungènyi lwà muntu kampàndà to.”

¹⁶⁰ Mpindyewu misangu mikwàbò tudi twenza ndongamu yà èkèleeziyà, bàdi kàbìdi bàsòka mpaasàtà wabò—wabò. Pàkaadi èkèleeziyà ùsungula mpaasàtà, bàdi bàmba nè: “Èè, mpaasàtà ewu, mpindyewu, yèyè ùdi nè mapòlomè àbìdi à mu tùlaasà tutùmbùke. Wakayiila bidimu binaayi byà dilonga dyà nsòmbelu. Wàkangata *cikampàndà*, *cikansanga*, nè *cikankènga*.” Nè bóbò nebàsungulè muntu wa mùshindù awu (bwà cinyi?) pamutù pàà mpaasàtà udi witabuuja Dìyì dyà Nzambì nè ndisonsole nè dìdi Nzambì, nè wàyiisha Dìyì dyà Nzambì kàyi ùcyùka mùdi bantu bàdyùmvwa bwà bwalu bwàDì.

¹⁶¹ Nzambì wàkambila Yèhezèkèlè, nudi bamanyè’s, kwamba nè: “Yiishà nànkù nànsha bóbò baCítàbùùje anyi to. Wèwè ùCìyiishe, nànsha byà munyi.” Nwamònu anyi? Cyà bushùwà. Nànsha bóbò baCítàbe, anyi to, kí mmbwalu to. Kabàvwa biitàbe Yesù to. Wàkatùngunuka nè, kuMuyiisha ànu diyiisha. Nwamònu anyi?

¹⁶² Pamutù pàà mpaasàtà mulelèlè wíkala bulelèlè mwà kuyiisha Dìyì nè kwitabuuja Nzambì, bàdi—bàdi—bàdi bàteeta kutwala meeji à mu—à mu mutù, muntu udi nè dilonga dyà kàlaasà ditàmbe bwímpè awu; muntu udi mwà kwimana mu cyambilu kàdi wàngata ànu tusunsa tutwè ku dikùmi nè tùtaanu cyanààna, bwà bààmònakù mwà kwalukila kumbèlu lùkàsà, nè kuyabò (bàmwè) bààkenza cintu cikwàbò, nènku Ricky ùdi mwà kubwela mu kàshinyi kèndè kakesè aku, nè bóbò bàdi mwà kuya kasheetangana nè maja àbò mu mafetè nè bikwàbò byònsò. Nènku cìdi, kaa, cìdi—cìdi ànu—kacyèna—kacyèna cìngà cintu to ànu dikooyika disopakaja dyà dilonga dyà tùlaasà. Ncyà bushùwà. Ànu cìdici menemene. Ncyà bushùwà. Kàdi ncinyi aci? Cìdi cisànkisha mwenya wàbò, nwamònu’s, cìdi cisànkisha mwenya wà cidimba cyà èkèleeziyà wa pa buloba.

Kabyèna bisànkisha mwenya wà munsantu to. Yèyè neàngate Dìyì musangu wònsò!

163 Kàdi bôbò bàdi bàmba nè: “Kaa, èè mpindyewu, bantu abu’s bàdi ànu nè lungènyi lujimine ndambù. Nwamònu’s, kabèèna ànu, kabèèna bàcyùmvwa to, bàdi—bàdi bàteeta kwikala nè mwoyi mu ditùkù dimane kupìta.”

164 Kabyènakù bikèmesha anyi! Ndi mupàtùke mulwè mùnwemu mu Wesètè, nè ndi mujandùle nè bàdi bônso bàteeta kwikala nè mwoyi mu ditùkù dimane kupìta, bàtu misangu yònsò ànu baswè ngenzèlu wa cyena kale wa mu matùkù à baa-cowboys awu. Nè kupweka ku Kentucky kwàka, mu matùkù à cyena kale à bantu bàà ku mikùnà, bôbò mbaswè kwenza maalu mùshindù awu, kwikala nè ndongamu yà cyôci aci. Kàdi pàkaadibi bikafika ku Ntèndeleelelu wa cyena-kale awu, kí mbaswè kantu nànsha kàmwè pa Cyôci aci to.

165 Matùkù à Cyena kale awu anyi? Mvwa mpweka mwab’ewu mu cikondo cyà rodeo, mémè kumòna nè bàvwa nè mukàjì munène wa kuntwaku, mwikàle nè bintu byà màyi à matàmba mwínshì mwà mèsù èndè, nè nsuki mîpi mibèbula, mucì wà mfwankà ku mishiku. Mòna’s, bu nè bàvwaku bamòne cyôci aci mu matùkù à kale, nùnkù’s mbadyelèle meeji nè yèyè mmudyà mukunya kùdi kansère mwaba kampàndà. Bôbò, bàvwa—bàvwa—bàvwa bafwànyine kwikala bamubweje mu lùpitaadi. Ambàbi túng bu mamwèbè mwà kwikala mupàtùke, mulwàte bu mùdi wèwè nè mwanèèbè wa bakàjì balwàte leelù ewu emu, ncinyi cìvwà mwà kwikala cyenzèke? Nùnkù’s mbamwelè mu lùpitaadi lwà babùlùke. Bushùwà, yèyè mupàtùke kàyì mulwàte jipè wèndè to. Èè, mpindyewu vùlukàayi nè, ncintu cìmwècìmwè aci leelù ewu.

166 Muntu ùdi munkaci mwà kubola mwikàle nè mwoyi mu mubidi wèndè. Pìikalabo bapicile mu cikondo cyà bukùlumpe, pankaci pàà bidimu makùmi àbìdì nè makùmi àbìdì nè bitaanu, tubulù twàbò twà mashi twà bwongù atu s’tùdi twènda túbola pààtù. Kabèèna nè...Bantu mbafikè mu mùshindù wà nè kabèèna nè luumvu lukùmbàne to. Kí mbamanyè nè nsòmbelu wa kaneemu mbwena kwamba cinyi to. Kí mbamanyè dishiilangana pankaci pàà maalu mimpè nè maalu mabì to. Nè, kaa, nànsha nànkù, ndongamu wabò wa dilonga dyà tùlaasà awu, bôbò. . .

167 Nuvwakù bamanyè nè, dilonga dyà kàlaasà, ndi mwà kunùjaadikilaci, ndyà dyabulù anyi? Kí mbwà kubala nè kufùnda to; kàdi, ndi muswè kwamba nè, kutèeka dilonga dyàbò dyà tùlaasà mu èkèleeziyà wènu.

168 Communisme mmushindàmèène pa cinyi? Maalu à mamanya, dilonga dyà tùlaasà, ke nzambì wabò nyèyè awu. Sàtaanà, nwamònu’s, ke cyàkaleejàye kùdi Evà aci’s. Ke cyôci aci cìdibo ànu kacya bààkwàtakù.

169 Mpindyewu ncibwele mu èkèleeziyà yètù, cibwele mu ba-Baptistes, ba-Méthodistes, nè ba-Presbytériens, beena Mpenta,

nè bônso. Dilonga kampàndà dyà tulaasà, dyà mamanya à mu mutù, *cikampàndà* cinène nè cintu cyà mùshindù awu, cidi ànu cimusàka kule menemene nè Nzambi. Mbibi. Èyowà's, mukalenge. Mpindyewu, tudi tusangana nè, (bòbò) cidi cisànkisha dijinga dyàbò. Pàdi—pàdi—èkèleeziyà kampàndà mwà kusungulangana bwà kubwejamù cintu bu nàнку, bìdi bileeja cidi mu meeji à èkèleeziyà awu, cidi dijinga dyàbò, cidi nyòotà yàbò. Mbaswè kwamba nè: “Mpaasàtà wetù ùdi nè lungènyi lonzùlùke. Kabitu bimutàcisha bwà twètù kwowa màyi balùme nè bakàji pàmwè to, yèyè mwinè tutu tuya nendè.”

¹⁷⁰ Mwànà mukesè wa bakàji wàkambila Sarah wanyi, ditùkù adi. Mpaasàtà wendè ùwva muyè ku Áfriké; kàdi pààkaalukilàye, nsongàakàji kuvùla bilàmbà byèndè byònsò, dilòòlò adi, kulwàta tulàmbà tukesè tumònyè ncyòng, mwikàle ùmujiila maja à bàtuusi, bwà kumusànkisha bwalu yèyè ùwva muyè mu Áfriké. Bàtuusi ncifuku cyà kuntwaku, nudi bamanyè's. Balùmyànà wa yààyà, mèmè ewu ndikù mwà kuswa kumòna umwe wa ku bàna bàànyi bàà bakàji, bàà mu disangisha dyànyi emu, ùteeta bwà kwenza cintu cyà mùshindù awu's, bàtuusi?

¹⁷¹ Nwamònu's, s'bidì ànu bileeja! Nè mpaasàtà mufwànyine kusòmba nè kutàngila umwe wa mu disangisha dyèndè, mwànà mukesè wa bakàji (wa bidimu dikumi nè bisambòmbò anyi dikùmi nè mwandamukùlù) mudivùùle bilàmbà mùshindù awu, kàdi kumulekela wènza nàнку, aci's cidi cileeja nè yèyè mmupàtùkile mu ciinà cyà bukooyà, yèyè mwinè, muntu wa Nzambi wènza cintu bu nàнку. Cyà bushùwà.

¹⁷² Aci's cidi cyùmvwika cyà ciipanshì, kàdi ndi mumanyè nè ndi nyiisha mu ditungà dijimà, kàbidì. Kàdi udi mumanyè eci kàbidì, mwanèètù wa balùme, mwanèètù wa bakàji, lekèlè nkwambilè nè, aci m'Bulelèlè.

¹⁷³ Ciminyi citu ciswè bintu bifwè. Ncyà bushùwà. Nè cyòci aci's ncifwè! Ncyà bushùwà menemene. Cidi cileeja patòòke tòò, cidi cileeja ànu patòòke mwab'ewu cidi mutù wàbò nè cibùmbà cyàbò cyà bukòntononyi, cidiye ùbàpèèsha aci, nwamònu's, cidi mu musùùkà wàbò. Musùùkà wàbò wùdi wùjinga bintu byà mùshindù awu.

¹⁷⁴ Musùùkà wàbò wùdi wùjinga èkèleeziyà wa mamanya matùmbùke, mùdi bantu bàlwàta bilenga byà menemene, nè mpaasàtà wàngata tusunsa dikùmi nè tutaanu, anyi makùmi àbidì. Nènku wèwè mupicishe apu, bàvwa bà mukòkela paanyimà kùdi kasùmbù kàà balami. Nè yèyè kèna nè cyà kwamba kantu nànsha kàmwè pa bwalu bwà mpèkaatù to. Yèyè kèna nè cyà kwamba cintu nànsha cimwè pa bìdi bitàngila divwàlè dyà tùpùtulù to, nè kî mmufwànyine kwamba cintu nànsha cimwè pa bìdi bitàngila bantu bàdi bènza *cikampàndà*, *cikansanga*, anyi *cikankènga* to. Kèna nè cyà kucitèeja to

nànsha kakesè. Yèyè mudidinge mucitèèje, kasumbù nekàmwelè pambèlu. Nudi numòna cidici anyi? Ke kààbò kataacilu kàà muntu udi wela meeji nkòkò aku.

175 Bible mmwambè, mu Yone wa Kumpàlà 2.15 nè: “Wèwè munangè ndongolwelu wa buloba ewu, anyi bintu byà pa buloba ebu, mbwalu dinanga dyà Nzambi kadyèna nànsha mene munda mwèbè to.”

176 Mpindyewu bishi bwà lukutukutu lwònsò lùdìbo benzè leelù ewu elu, mu dinà dyà èkèleeziyà; bàja maja à bajingilàngàne mu citàngù mu èkèleeziyà, manàyi à mubèlà, manàyi à ambùlà-mfùmù ùdye mbonga, mafetè, maja à bidùndadùnda à bansòngà, disheta dyà maja, bintu byònsò abi! Tàngilàayi Elvis Presley ewu, démon mwimàne kumpàlà kwà bantu’s! Pat Boone, Ricky Nelson, cipùmbishi citàmbe bunène cikaadiku ditùnga edi dipetè kacya’s! Ncyà bushùwà. Bàdi bàmba nè: “Kaa, bòbò’s mbatèndeledi bàà dikèma, bàvwa bimba misambu yà beena Kilstò.” Kabìvwa bikèngela bwà kwimbabò to. E—ekèleeziyà kàvwa nànsha nè cyà kwanyishila cintu bu nànkù to! Bàmwè bàà ku balùmyànà aba bàdi bàpàtuka mwab’ewu, nè—nè dilòòlò edi bàdi mu binwinù byà—byà maalà pambèlu apa, bàja maja nè bimba mìjiki nè bikwàbò byònsò, nè dilòòlò didi dilonda bàdi bàlwa ku cyoshelu bàdila mwadi, nè dilòòlò didi dilonda bàdi munkaci mwà kwimba mìjiki ku cibùmbà cyà ku cyambilu. Kaa, luse wè, luse’s wè! Ntoo nè penyì pàdi bukooyà, ntoo nè penyì pàdi bukooyà mwà kuya’s, twamb’eku twamb’eku? Èyowà’s, mukalenge. Ànji àjaadikè yèyè mwinè dyàmbedi mùdiye muntu wa Nzambi, kí mbitàkanyì byònsò ebi ànu nè mbwalu ùdi mwà kwimba cindàlà cyà kale anyi cintu kampàndà to.

177 Ku dijinga dyèbè, udi mwà kumanya nè nganyi udi pa nkwasà wa butùmbi wa mwoyi wèbè. Ku cyùdi munangè, ke cidì cìcyàmba. Wèwè, udi wamba nè: “Èè, ndi ngèèla meeji nè bintu abi bidì ànu bìmpè, Mwanèètù Branham.” Èè, wavùluka mpindyewu ànu nè, mu mwoyi wèbè, udi mumanyè cidì muntwamu. Èyowà’s, mukalenge. Ku cidì cidìisha musùukà wèbè, cidì musùukà wèbè wùmwila nyòòtà, nè udi mwà kumòna nè cidì cisànkisha cyòci aci; cyòci kaciyi Dìyi edi to, dìbà adi kùdi cintu kampàndà cibì, bwalu Nyumà Mwìmpè ùdi nè mwoyi ànu pa Dìyi nkààyaadi. Nwamònu anyi?

178 Ndi muswè bwà numòne njiwù mikwàbò minène, ànu kumpàlà kwà twètù kujikija, wèwè kùyì—wèwè kùyì mupìilè ku nànsha cimwè cyà ku bintu bìndì mutèèle ebi to, nènku, mbwena kwamba nè, njiwù yà kulèngulula nyòòtà. Nwamònu anyi? Wèwè udi wamba nè: “Ndi nè nyòòtà yà cijila. Kàdi mèmè—mèmè ncyèna mupìile to, Mwanèètù Branham, bwà diya kashàala ànu wa mu èkèleeziyà, nè bintu byà mùshindù ewu.” Kàdi, nwamònu’s, kulèngulula nyòòtà! Wèwè mulèngulùle kusànkisha nyòòtà yà màyi anyi yà cyàkudyà, s’neufwe. Kàdi

wêwè mulèngùlùle nyòòtà ayi munda mwèbè, yà Nzambi, neùfwe mu nyumà.

¹⁷⁹ Udi ubiikidija matàbuluja, udi mwindile bwà èkèleeziyà webè kupetayè ditàbuluja. Èè, aci kî—aci kî nditàbuluja bwèbè wêwè to. Bivwa bikèngela bwà ditàbuluja dibangè ànu munda mwèbè amu, paùdi ubanga kupeta nyòòtà yà Nzambi. Nkufwànyine kwikala kakùyì cidimba cikwàbò, cyà èkèleeziyà, cijinga ditàbuluja adi. Dyòdi dibwayikè munda mwèbè, nedibwayikilè myaba mikwàbò. Nwamònu anyi? Kàdi, nwamònu's, wêwè ulèngulula nyòòtà ayi.

¹⁸⁰ Wêwè ulèngulula bwà kukàma mabèèlè à ngombe, pàdi ngombe mwikàle...dibèèle dipàtè nè mabèèle; kàdi wêwè mulèkèle ngombe awu ùshàala mùshindù awu, dibèèlè adi nedikamè. Ncyà bushùwà menemene. Wêwè mulèngùlùle kunwà mâyi, wamba nè: “Ncyàkunwà kàbìdi mâyi to,” neùfwe. Wêwè mulèngùlùle kudya cyàkudya, s'neùfwe.

¹⁸¹ Pa nàнку wêwè mulèngùlùle kupèèsha Nyumà Mwîmpè Dìyi dya Nzambi, neùfwe.

¹⁸² Nwènu beena Kilistò, nwènu ba-Baptistes, ba-Méthodistes, ba-Presbytériens, beena Mpenta, beena Assemblées de Dieu, ba-Unitaires, ba-Binitaires, ba-Trinitaires, cyònsò cyùdi aci, nwamònu's; kabyèna nè bwalu to, aci kacyèna nè musinga kùndi to, ncyèna ngèèla meeji nè cidi naawù kùdi Nzambi to. Nwamònu's, wêwè udi muntu-nkààya, udi cintu cijimà. Kwàdyàkuyakù mu Dyulu bu èkèleeziyà, anyi di—dingumba to. Neùye mu Dyulu bu muntu umwèpelè, mpankaci pèèbè nè Nzambi. Kwàjikì. Nànsha wêwè mwikàle wa mu èkèleeziyà kaayi.

¹⁸³ Kàdi wêwè ulèngulula kubala Bible nè kwitabuuja Bible, nè Nyumà Mwîmpè, bwà kudìilaKu, neùfwe. Yesù wàkamba mu Yone Munsantu 4.3, Mufùndu awu, ndi naawù apa mene, Yesù wàkamba nè: “Muntu kààkwikala nè mwoyi ànu ku dyàmpà nkààyaadi to, kàdi ku Dìyi dyònsò,” kí ng'ànu citùpà cyàDì to.

¹⁸⁴ Tudi twangata ndambu mukesè *kaaba aka*. Ndi mbiikila aci nè mmwena kubwela kulòpoka wa mu Bible. Bàdi bamba nè: “Èè, mèmè ndi ngiitabuuja *Cikampàndà*, kàdi mpindyewu tuyaayaaku lwà *kunweku*, wamònu's.” Nwamònu anyi?

¹⁸⁵ Bikèngela ùCyàngàtè, ku Dìyi nè ku Dìyi. Yesù wàkamba nè: “Muntu neikalè nè mwoyi ku Dìyi dyònsò didi dipàtukà mukana mwà Nzambi.” Nuvwakù bamanyè nàнку anyi?

¹⁸⁶ Nènu, nudi bamanyè's, tudi benzè—tudi benzè ditùkù ditùdimu nè mwoyi edi, tudi—tudi benze ditùkù edi... dinyangakaja dya—dya maalu à ntèndeleeleu.

¹⁸⁷ Mwanàanyi wa bakàjì ùwua mumbiikile bwà kubwela, àbìdi àdi pànshì aa, nè kungambila nè: “Papa,” ku luseke lwà nzùbu lùvwà lùlondà, yèyè nè: “lwilà lwà kunweku, netwikalè nè

ndongamu wa butèndeledi munkaci mwà kwenzeka.” Cìvwa ndimba dyà misambu, dimba dyà miyengà, nè kùvwa kaa Ricky kampàndà munkaci mwà kucyàmbulula kuntwaku. Kàdi ní nkààdikù mumòne nkwaka wa dinyangakaja cijila, ùvwa nyèyè awu’s! Balùmyànà abu kuntu kwàka, nè bantu, kutàmbabi kumwèka bu cibilù cyà kutembangana. Bìvwa bimwèka bu nè cìvwa cisàmbà cyà ba-Indiens, nè bàvwa bènza maalu à lukutukutu, nè—nè bàtùpika bàya muulu nè bàtuutangana mànkòmù muntu nè mukwèndè.

¹⁸⁸ Mwaba awu, ncinyi cidi cyenzèkèle meeji matòòke, misambu yà miyengà yà cyena-kale yitùvwà twimba kale wàwa ayi yidi penyì, nè tucyònkómoka mu Nyumà wa Nzambi, nè binsónji bitùpwekela pa matàma? Kàdi mpindyewu tudi tuteeta kulama mweyelu wètù too nè pàdi mweyelu wònsò wà munda wàmba nè kujika, too nè mùdi kwisù kùtùshààla bleu, bwà kuteeta kuleeja nè tudi bimbi bàà mùshindù kampàndà. Nwamònu’s, tudi batentùle aci mu Hollywood, nè ndongamu yònsò yitùdi tumwèna mu ngimbilù wa misambu wà mamanya à mu mitù ewu nè diibidija dyà dýi. Mémè—mémè ntu muswè kuumvwa ngimbilù mulenga awu; ntu muswè kuumvwa ngimbilù mulenga wa cyena kale, wa ùlenga mwoyi awu, ngimbilù wa cyenampenta awu. Kàdi mu bushùwà bwà bwalu ntu mukine dyela dyà mbilà nè mèyi matwè didibo bàbùkila leelù ewu nè nkwinba misambu aku. Ncyà bushùwà. Ndi mémè ngèèla meeji nè aci ncintu citàmbe kwikala cicimbè’s. Ndinyangakaja. Ncyà bushùwà.

¹⁸⁹ Mémè ntu muswè kumòna muntu mulùme mwikàle muntu mulùme. Ndi nkina kumòna muntu mulwàte bilàmbà byà mwínshì byà mukàjèndè pambèlu apa, nè biinè abi bisenyina ku luseke; nè—nè dilùmbalùmba dyà nsuki dimulembèlèle mumpàlà emu, nè dikusà dyà nsuki dyà kilò binunu bibidì mipwekè mùshindù ewu bu màlendà, mikòsa lwà mumpàlà emu. Aci, mémè—mémè ncyènàku mwà kubùkila aci nè mmuntu mulùme to. Kì mmumanyè nè nku luseke kaayi lwà buntu kùdýe usanganyibwa to. Nwamònu anyi? Ncyà bushùwà. Nudi numòna mukàji, tàngilàayi, mukàji ùdi ùteeta kukòsa yèndè nsuki, wènza nsuki yèndè bu yà muntu mulùme; muntu mulùme ùteeta kwenza nsuki yèndè màlènji, bu muntu mukàji. Mulùme ùvwàla bilàmbà byà mwínshì byà mukàjèndè; mukàji ùvwàla cìsalàbeetà cyà mulùme. Nwamònu’s, ànu dinyangakaja cyanààna, ewu nè ewu’s.

¹⁹⁰ Nènku’s ncintu cimwècimwè aci nè ditùnga, nè bantu, nè màkèleeziyà, nè bikwàbò byònsò. Èyi Nzambi! Ndekeelu wa cintu aci ùdi penyì? Dilwa dyà Mukalenge Yesù Kìlistò, ki ndekeelu waci nyèyè awu.

¹⁹¹ Pa nàнку, wèwè mulèngùlùle kudiisha Nyumà Mwimpè nè Dýi dyà Nzambi’s! Yesù wàkamba nè: “Dýi dyònsò nedùikale ku Nyumà Mwimpè.” Nènku tèèlejà, mpindyewu, wèwè muteetè bwà kuMudiisha cintu cibi, Yèyè mwikàle

nè n'Nyumà Mwîmpè mushùwashùwàlè munda mwèbè, Yèyè neàmányè cidi cishiilangane. Mpindyewu, vùlukàayi nè, Dìyi dyà Nzambi ke didi Nyumà Mwîmpè ùdya. Yèyè kènà ùdya cisànkasanka to. Kènà ùdya dilonga dyà kàlaasà to. Kènà ùdya diya dyà mu èkèleeziyà to. Kènà ùdya tèlòjì to. Kùdi dishiilangana dyàbùngì pankaci pàà cintu kampàndà cisonsola nè mmwènu wa tèlòjì wa cyòci aci.

¹⁹² Beena tèlòjì bônso abu mu matùkù à Yesù, èkèlekèlè, bàvwa nè mwàkù ku mwàkù, dibèji ku dibèji, byònsò byadija patòòke, Maasiyà ùvwa nè cyà kulwa mu mùshindù *kampàndà*! Ke civwàku menemene ncyòci aci. Kàdi bóbò, muntu nè muntu, bààkacipangila. Nudi bamanyè cyàkambà Yesù pàakalwàYe, wàkamba nè: “Nwènu nudi bàà tatwènu dyabùlù, nè byenzi byèndè ke binwènzà.”

¹⁹³ Civwà Dìyi dilelèlè aci kacivwa cibàbuulwila to. Nwamònu's, mbapangile matumba makesè awu, bu mùdìbo bapangile leelù ewu emu. “Bu wèwè mwà kwikala wa mu *cikampàndà* nè kwikala wa mu *cikansanga*, newikalè ànu bimpè.” Kwitabuujikù aci to. Bikèngela wikalè wa Kilistò. Nè kwòkò kwikàlè Cintu kampàndà munda mwèbè amu, ciikàlè nè nzala yà Kilistò!

¹⁹⁴ Vùlukàayi ànu nè, paùvwa mu twonyi twà tatwèbè, uvwa nendè dībā adi. Kàdi tatwèbè kàvwa mukumanyè mwinè musangu awu to, nè wèwè kùvwa mumanyè tatwèbè to. Kàdi byàkàkèngela bwà wèwè kulwa kulediibwa. Nzambi wàkàpandila njila ku mamwèbè, bwà kwikala—bwà kwikala buloba bwà kukùnyinamù dimiinu, nènku ke kulwadì. Nè dībā adi udi ulwa mulùme anyi mukàji, cyònsò civwàku aci, ke pashìishe wèwè kujingulula tatwèbè, nè tatwèbè ùvwa mwà kubwela neebè mu bwobùmwè.

¹⁹⁵ Mpindyewu, vùlukàayi nè, wèwè nè Mwoyi wà Cyendèlèlèlè, Mwoyi wèbè awu wàkadi munda mwà Nzambi ku cibangidilu. Nènku, Mwoyi awu, Nzambi ùdi Dìyi. Nè pashìishe pààkavwijiiibwà Dìyi mubidi mu Yesù Kilistò, Nzambi ùpweka bwà kusòmbela mu mubidi Wèndè Yèyè mwinè, kuDìvwija Mwànà wa Nzambi. Pààkapwekà Nzambi bwà kusòmbela mu wòwù awu, wèwè uvwa munda Mwèndè pààkapoopediibwàYe pa nkùrusè apu. Nè wàkapoopediibwa Nendè pa nkùrusè, nè wàkafwà Nendè ku Kàlvariyò. Wàkajikiibwa Nendè, pa mukùnà. Nè wèwè wàkabiilka Nendè ku lufù, mu dindà dyà Paasàkà. Nènku mpindyewu nudi basòmbè pàmwè mu myaba yà mu Dyulu, munda Mwèndè, nènku mpindyewu nudi mu bwobùmwè Nendè. Nwamònu anyi?

¹⁹⁶ Nzambi Yèyè mwinè wàkalwa umwe wetù. “Muntu nànsha umwe kàtukù mwanji kumòna Taatù, musangu nànsha wùmwe, Mulela umwèpelè (Mwànà) wa Taatù ngudi muMuleejè.” Mbwena kwamba nè, Nzambi wàkalwa Muntu, bwà Wàmòna

mwà kubwela neebè mu bwobùmwè bu muntu. Nwamònu anyi? Nènkù mpindyewu nudi—nudi mubidi, nè Yèyè ùdi mubidi. Nzambi mmuvwijìbwe mubidi munkaci mwètù, mu Mupèrsonà wa Mwan’Èndè, Yesù Kilstò. Kàdi munda Mwèndè mùvwa Nzambi. Yèyè ùvwa Nzambi, kàvwakù mushààdile kùdi Nzambi to. Yèyè ùvwa Nzambi. “Nzambi munwènèshìibwe mu Mwàna, Yesù Kilstò,” cyàkaMuvwija *Èmanùwèlè*, bu mwàkambà mupròfetà nè ncivwàYe mwà kwikala.

197 Mpindyewu nwamònu’s, dìbà adi, uvwa nè cyà kwikalakù kumpàlà kwà dyulu nè buloba kufùkiibwabi, dìnà dyèbè dyàkafùndiibwa mu Mukàndà wà Mwoyi wà Mwàna wa mùkòòkò. Nènkù dìbà adi cyùdi mwà kudyà ncinyi? Nyumà Mwìmpè ùdi nè mwoyi ku Dìyi dyà Nzambi. Nènkù mpindyewu mu Bwàkabuulwibwà 22.19, Bible mmwambè nè: “Ewu yònsò wadidìnga kuumushila Dìyi dìmwèpelè ku *Cyòci* eci, anyi wasàkidilaKù dìyi dìmwèpelè awu, cyèndè citùpà necyùmushiibwè ku Mukàndà wà Mwoyi.” Nudi numòna mùdìbi byà ndòndò amu anyi? Kanwèna mwà kucyènza to, Nyumà Mwìmpè kààkwikala nè mwoyi ku bintu byà pa buloba to.

198 Bu mùdi nyuunyi wa nkuci nè cikòlòlò. Cikòlòlò ncyena lubombo cinène. Cikòlòlò, mulùmnyàna awu wùdi mwà kupátuka pambèlu apa nè wùdi mwà kudyà blé ditùkù dijimà; kàdi kuya kuntu kwàka è kubùùkila pa cifwè, citàlù cyà kale cifwè, nè kucidyà kàbìdi. Yèyè ùdi mwà kusòmba mu budimi nè ùdi mwà kudyà blé, pàmwè nè nkuci, nè kuya kwàka kàdi kudyà citàlù cifwè aci.

199 Kàdi nkuci ùdi mwà kudyà blé ditùkù dijimà, kàdi kèna mwà kudyà citàlù cifwè to, bwalu yèyè n’nkuci. Kàdi nkuci kènà nè kanyònga to. Mwínù wùmwè cyanààna pa citàlù cifwè aci, mmufwànyine kushipa nkuci awu. Nwamònu’s, kèna nè kanyònga to. Nènkù mùshindù awu ke wùdìbi, bululu nànsha bùmwè.

200 Ke mùshindù wùdìbi nè mwena Kilstò mulelèlè, mushùwashùwàlè. Kí mmuswè bintu byà pa buloba to. Bàdyadya ànu Dìyi dyà Nzambi, nè ànu Dyòdi nkààyadi; ke cidì cikezùke, Kasengelu kàa muntu udi wela meeji. Nwamònu’s, bàdi bàpicila mu Kòkù aku, nè ànu Kòkù aku nkààyaakù. Bintu bifwè byà pa buloba, bìdi bìbànunkila bibì.

201 Tàngilàayi cikòlòlò cyà kale aci mu matùkù à kabùtù kàa mvùlà yà Noà, cibùùka cyùmuka ku mubidi ciya ku mubidi, cyènda cidya bitàlù byà kale bifwè abi, kacivwakù cyàlukile ku bwàtù to. Kàdi nkuci kàvwa mwà kupeta mwaba wà kwikishisha makàsà èndè to, nwamònu’s, wàkaalukila ku bwàtù kùvwàye ùpetela lutete aku. Nènkù mùshindù awu ke wutùdi twenza, tudì nè mwoyi ku Dìyi dyà Nzambi.

202 Mu Misambu 42. Davidi ùwva nè cyà kwikala mufunde Musambu ewu, Misambu 42, pàvwàye munyeemakanyi, pàakambàye nè: “Musùùkà wànyì wùdi nè nyòòtà Yèbè, mùtù ngulungù ùjinga kasùlù kàà màyi.” Tàngilàayi, wàkeela lubilà. Davidi’s ùwva munyeemakanyi. Yèyè ùwva. . . Ùwva nè maanyi à dilaabiibwa pambidi pèndè, ùwva mumanyè nè yèyè nguvwa nè cyà kwikala mfùmù. Mupròfetà ùwva mumwelè maanyi bu mfùmù. Mpindyewu mōnaayi, nènku ke yèyè awu’s, ùwva nè musumbà mukesè wà màsàlaayi, mwenza kùdi bàà Bisàmbà byà bendè, nè bikwàbò, kùvwa ku lusongo lwà mukùnà. Kwinè aku, mmu cimenga cyèndè cinangiibwe, bwà mpèkaatù yàbò, bàvwa banyungulukila bōnsò kùdi beena Pelèshèètè. Kàdi Davidi, mu ditùkù dyà luuyà lukolè adi, bìvwa nè cyà kwikala nànkù pàakafùndàye Musambu ewu nè: “Ànu mùdi ngulungù ùjinga kasùlù kàà màyi amu.”

203 Mōnaayi Davidi mu ngiikàdilù ewu. Kutàngilayè panshi, kutàngilayè cimenga cyèndè cinangiibwe aci. Nènku kuvùlukayè pàcivwàye mwànà mutèkète, ùwva nè ciibidilu cyà kuya nè mikòkò ku dijiba kampàndà edi. Civwa ditungà dinène, dinène dyà màyi, kàbidì ditungà dyà dyàmpà, kuntwaku. Mu bulelèlè, *Betèlèhèmà*, ùdi ùmvwija nè “nzùbu wa Dyàmpà dyà Nzambi.” Nè pashishe pàakavùlukà Davidi mùvwàye wènda ùpicila kuntwaku nè ùwva màyi malenga matalàle awu, kàdi’s ke yèyè ewu mulààle mwab’ewu mpindyewu, munyeemakanyi, kule nè bàà kwàbò sungasunga. Kàvwa nè mwaba wà kuya to, nè musùùkà wèndè ùwva nè cyà kwikala mwelè mbilà bwà màyi mimpè matalàle awu.

204 Ùwva nè basadidi kampàndà muntwamu bàvwà, ekèlekèle, dyèndè dijinga nànsha dyà ditàmbe bukesè òvwa ndiyi ditùma. Nènku bōbò, bàsàtù bajimà, bàakapanda njila kupicila mu mulongo wà beena Pelèshèètè awu; kilòmèètà makùmi àbidì nè yinaayi, kilòmèètà dikùmi nè umwe, anyi cintu kampàndà, mu kupweka nè kwalukila; bènda bàkòsolola njila wabò, bwà kumutwàdila màyi à kunwà. Kàdi musùùkà wùdi nè nyòòtà. . .

205 Mubidi wèndè, yèyè ùwva kuulu kwàka, pàmwàpa yèyè ùwva nè cyà kunwina mu cintu kanà cyònsò civwàye mwà kubàmbakaja aci, ndambù wa bisèbà byà mbùji byà kale nè bikwàbò, nè ndambù wa màyi à kale à kapyà munda amu, mu ditùkù dyà luuyà lukolè adi. Yèyè kudyàmbidila nè: “Ngikalakù ànu mwà kudyòlola panshi nè kumana nyòòtà yíndì naayi eyi! Bu mèmè ànu mwà kuya ku Betèlèhèmà kwàka nè kudyòlola ku musùlù wà màyi awu, kàdi kunwà’s!”

206 Kàdi díbà dyàkayàbo nè kusuna màyi, nè kuàtwàla, nyòtà yà musùùkà wèndè yivwa mitàmbe bunène, kabiyi bwà Betèlèhèmè to, kàdi kuumukila ku Yèlusàlèmà; ke kùvwà musùùkà wèndè. Ke kulàmbulayè màyi awu, kwamba nè: “Ncivwaku mene mwà kuànwà to.” Kuàpòngolwelayè panshi. Nwamònu’s, musùùkà wèndè ùwva nè nyòòtà yàbùngì bwà Nzambi, kutàmbe mùvwàbi

bwà kumana nyòòtà yà mîmpè...nyòòtà yèndè yà mubidi wèndè, nè mâyi mîmpè matalàlè. Yèyè kuàpòngolwelayè panshi.

²⁰⁷ Nwamònu's, Nzùbu wa Nzambi, mâyi à citaleela à mu Yelusàlèmà, udi kuulu awu! Yesù wàkamba, mu Yone 6.33 nè: "Mémè ndi, Dyàmpà dyà Mwoyi. Mémè ndi Dyàmpà dyà Mwoyi." *Betèlèhèmà*, "nzùbu wa Nzambi," èkèleeziyà wetù, èkèleeziyà wa pa buloba wa Nzambi, èkèleeziyà udi pa buloba apa ewu. Tudi banangè kuya ku èkèleeziyà pànu pa buloba apa, kàdi Yelusàlèmà ngudi mutàmbe bunène, udi ku dyulu, udi Nzambi awu. Yelusàlèmà wa kuulu, udi Nzambi awu! Nyòòtà yà musùukà awu mmitàmbe bunène, bwà kwikala Nèndè kuntwaku, kutàmba mùdìyi mwà kwikala ànu bwà kudisànkisha nkààyebeè bwà dikashààla wa mu èkèleeziyà kampàndà mwaba kasanga. Nwamònu's, diya kashààla wa mu èkèleeziyà kadiu dijikija nyòòtà ayi to. Davidi wàkacijaadika mwaba ewu, mâyi miikàlè àfùmina buludi mu nzùbu wa Nzambi, nwamònu's, yèyè wàkaàpòngolwela pa buloba; bwà kupetakù luse, bwà kupetakù mâyi mîmpè matalàlè à kunwà à kùdi Nzambi. Nànsha pa cyòci aci...Minène kutàmba nyòòtà yidi munda mwèbè, ke nyòòtà yà musùukà bwà Nzambi ayi.

²⁰⁸ Mònaayi Yelusàlèmà, mwàkù awu. "Yelusàlèmà ngwa ku dyulu," mùdi Bible mwambè, "bwalu twètù tudi... ke Mamwètù twètù bònso." Nènku Kilistò ke wetù Maamù. Tudi bamanyè nè Nzambi ke wetù Maamù, bwalu tudi balediibwe kùdiYè. Mwàkù awu wùdi ànu wùmvwija nè "ditalala," Yelusàlèmà, *Shalom*. Anyi, *Shalom*, udi umvwija nè "ditalala," Yèlu-shalom, nwamònu's, mbwena kwamba nè "ditalala."

²⁰⁹ Nyòòtà yà musùukà kanà wònsò ewu yivwa nè cyà kwikala mitàmbe bunène, bwà mâyi à Mwoyi, kutàmba kwamba nè ndi wa mu èkèleeziyà kampàndà; nyòòtà yà musùukà kayèena mwà kujika to, nyòòtà milelèlèlè ayi. Yidi mwà kunyangakajiibwa. Udi mwà *kudyàmbidila* nè udi bîmpè paùdi ukashààla wa mu èkèleeziyà, kàdi kí n'Cyòci to. Aci kacyàkujikija nyòòtà yà cijila mishùwashùwàlè bwà Nzambi nànsha. Kacyàkukumbanakù to. Cidi ànu...Kacyèna ànukù to.

²¹⁰ Mpindyewu Davidi wàkamba, mu Misambu 42.7 emu nè: "Pàdi ndòndò ùbiikila Ndòndò, ku mutooyi wà mâyi Èbè," dibiikila dyà musùukà's.

²¹¹ Tàngilàayi, nkàadi misangu yàbùngi mukwàte mudimu nè cyòci eci bu cifwànyikijilu. Kòkò kwikàlè mwalala pa mongo wa mushipa, wùvwa nè cyà kutèekiibwapù bwà kowela naawù. Wùdi wùwùkèngela. Mpindyewu kàdi bu yèyè mwà kwamba nè: "Nèngiikalè mushipa mushiilàngàne. Nèngiikalè mushipa wa meeji matwè, mulongè tùlaasà. Uh-huh, mémè—mémè ànu... Mémè nèngiitabuujè ànu tèlòlòjì kampàndà mulelèlè! Ngèèla meeji nè kabyèna bikèngela mémè kwikala nè mwalala awu to"?

Kí mmufwànyine kuya kule menemene mu mâyi to, mmwômò anyi? Nè aci ncyà bushùwà menemene.

212 Ambàâyibi túng bu mucì mwà kwamba nè: “Mpindyewu, ndi mumanye nè kùvwa nè cyà kwikala buloba dyàmbedi, bwà mêmè kutòlokamù. Ncyà bushùwà. Ndi nè cyà kutòloka pa buloba. Kàdi nêngiikalè mucì mushiilàngàne, ndi muswè ànu bwà bôbò kuntèèka mwab’ewu munkaci mwà mùsèèsù emu, bwà ngàmòna bwà kumwènèka?” Nwamònu’s, kí mmufwànyine kwikala nè mwoyi ntàntà mule menemene to. Nwamònu anyi? Ncyà bushùwà.

213 “Pàdi ndòndò ùbiikila Ndòndò”: Bikèngela cintu citàmbe cyà diya kashààla wa mu èkèleeziyà aci. Bikèngela cintu citàmbe dilabulangana dyà ku cyanza nè muyiishi. Bikèngela cintu citàmbe kwikala nè nsòmbelu mwimpè, mululàme. Bidi bikèngela cintu kampàndà bwà kusankisha munda mwèbè amu, cidi cipòngolokela kùdi Nzambi, cibwela mu musùkà amu. “Ndòndò ùbiikila Ndòndò, ku mutooyi wà mâyi Èbè, Éyi Mukalenge. Ndòndò ùbiikila Ndòndò’s!”

214 Nyòòtà yà mùshindù kaayi yitùdiku bafwànyine kwela meeji nè yivwa munda mwètù dilòlò edi? Twètù, bu beena Mpenta, kutùdi tukafika penyì’s? Nyòòtà yà mùshindù kaayi yidi munda mwètù? Nyòòtà yà mùshindù kaayi yidi munda mwànyì? Nyòòtà yà mùshindù kaayi yidi munda mwèbè? Kanùteecikù bwà kupùwisha nyòòtà yà cijila bwà Nzambi ayi to.

215 Kùkaadi bidimu, pàvwàbo nè ciibidilu cyà kupeta ngòlò mu mikùnà emu. Ngákabala bwalu bulonda kampàndà, kùkaadi bidimu byàbùngi, bùtu misangu yònsò ànu bundamàte. Bàdi bàmba nè kùvwa mu—kùvwa mukèbuludi kampàndà wákaya mwaba kampàndà dyàmwàmwà dyà mikùnù múnwemu, nè ùvwa wènda ùkèbangana nè ngòlò, è kufikayè pa mwaba wà bubanji. Ke kwalukilayè, wènda wèla meeji; pààfikàye mu cimenga, cìvwàye mufwànyine kwikala, ntàtù yèndè yònsò yivwa mijikè. Nènku—nènku yèyè—yèyè kuteeta bwà—bwà kwamba nè: “Maalaba mêmè nèmbwelè nè nêngiikale. . .” Ànu lwendu lwà ditùkù dimwèpelè, ùvwa mufwànyine kubwela mu cimenga, nè ùvwa mufwànyine kwikala nè ngòlò. Nè ùvwa nè mifuku minène mipàte nè ngòlò.

216 Ùvwa nè mbwa ku luseke lwèndè. Mpindyewu kí mfwànyikija mbwa nè Nyumà Mwimpè to, kàdi mündi ànu ngenza difwànyikija amu. Kàdi mbwa ewu. . .

217 Bufùku abu, mukebuludi ùvwa mulààle pa bulààlù bwèndè, ke—ke kubangayè kudyàmbedi nè: “Mpindyewu, màalabà mêmè—mêmè nèmbwelè nè ngòlò wanyì yònsò ewu, nè nèndwe ànu cìntù mèmè mujingèjinge bwà kwikala aci. Mvwa—mvwa—mvwa misangu yònsò ànu muswè kwikala muntu mubanji. Mvwa—mvwa njinga kupeta bintu bimpè, nè bikwàbò.”

218 Nènku—nènku díbà adi ke mbwa ewu kutwàdijayè kubùluka, nènku mbwalu mulwishì ùvwa wènda ùseemena. Ke yêyè—yêyè kupàtuka pambèlu apu, kwamba nè: “Bwikila mukana!” Nè mbwa awu kutuuyishayè cilunji. Nènku mmwenze ànu ùpingana kàbìdì mu bulààlu, è kwenzayè bu ukààvu ùdítwa mu tulù, ke mbwa kutwàdijayè kàbìdì, mwikàle ànu ùtupika ku mùnyòlòlò aku. Ke kuyayè ku ciibi kàbìdì, kwambayè nè: “Bwikilà mukana! Ndi muswè bwà ùmanyè nè mààlabà ndi muntu mubanji, nwamònu’s,” nènku aci’s ki cívwa majinga èndè manène; Kàdì mbwa wàkatwàdija kubùluka cyàkàbìdì.

219 Ke ndekeelu wa byònsò, kumutondabì bikolè, e kuyayè kangata cingoma nè kwasayè mbwa awu, nè kumushebeyayè. Yêyè nè: “Ncyàkwikalakù kàbìdì neebè bwalu to, wêwè mwinè. Mààlabà ndi muntu mubanji. Nèndwe muntu mubanji, mààlabà.”

220 Ke kutèekayè cingoma mu ditumba, kukomayè nyimà ku ciibi, è kuditwayè mu tulù. Nènku muntu ùvwa wènda ùmulonda awu, munda mwà matùkù, kudifindayè è kumushebeyayè. Yêyè kàvwa muntu mubanji to, nwamònu’s wàkiimanyika mutooyi wà didimwija òvwa diteeta bwà kumwambila nè mwoyi wèndè ùvwa mu njìwù.

221 Nènku, mwanèètù wa balùme, mwanèètù wa bakàjì, kwàdyàkukùmbanakù bwà...Kùdìdingikù kuteeta bwà kupùwisha dibìikila dyà cijila adi mu mwoyi wèbè to, wamònu’s, ku diya kashààla wa mu èkèleeziyà kampàndà, ku dyambulula dyà twitabàayi kampàndà, ku dikashààla wa mu bulongolodi kampàndà.

222 Kùdì cintu ànu cimwèpelè cìdì mwà kusànkisha cyòci aci, m’Mupèrsonà awu, Yesù Kìlistò. “Ànu mùdì ngulungù ùjinga kasùlù kàà màyi amu, ke mùdì musùùkà wànyì nè nyòòtà Yèbè, Èyi Nzambì. Musùùkà wànyì wùdì nè nyòòtà yà Nzambì udi nè mwoyi!” Nwamònu’s, kùdì cintu kampàndà munda mwèbè amu, cìdì ciswè kumòna dikwàtà dyà mudimu dyà Nzambì. Musùùkà wèbè wùdì nè nyòòtà yàDì. Kanwitabikù kantu nànsha kàmwe kashààdile ku Aci to.

223 Kùlekedikù mpaasàtà kampàndà ùkwambila nè: “Bikèngela ànu ùlabulanganè ku cyanza, ùshaalè wa mu èkèleeziyà, anyì wikalè wa mu bulongolodi *ebu*.” Kanùpùwishikù cinyàanyà cyà cijila aci to. Cìdì cikudimwija. Nekùlwe dīngà ditùkù diwàfikà ku ndekeelu kwà njila.

224 Byenze bu inàbànzà mutekète mu cimenga cyètù citùdì bapàtùkile. Kwambilayè...Mwànà wa bakàjì mutekète kampàndà kuyayè ku èkèleeziyà, nè mwànà mukèsè wa bakàjì mulenga wa dikèma. Nènku ùvwa wènda upweka nè mùsèèsù. Ùvwa nè nsukì mile, nudi bamanyè’s, nè nsukì yèndè mile mipwekesha paanyimà bu mùdì ditùngulù dilamuna bizubu, byenze ànu bu mùshindù awu, nè mpalà wèndè ùvwa ùmwèka

bu . . .kàyì mulaabè bilaabu to. Nènku mwànà wa bakàjì ewu ùvwa nè ciibidilu cyà kumwelulwila, wàmba nè: “Bu nè kùvwa nè muiishi wa mutù kabàsà wùdì nendè kuntwaku awu,” ùngamba mèmè, wàmba—wamba nè: “nùnkù’s uvwa mwà kumwèka bu cintu kampàndà cyà nsongu. Kàdi udi umwèka bu cintu cyà mu cisalu cyà maalu mantòndè.” Nènku, kaa, yèyè kàdi kumubùngulujayè mu makàlà, musangu wònsò wùvwàye mwà kumumòna mùshindù awu. Yèyè nè: “Wetù mpaasàtà ngwa meeji majikùke.” Yèyè nè: “Yèyè—yèyè—yèyè’s mmubimanyè. Aci, cyùdì wenzela nànkù ncinyì? Aci kacyèna nè bwalu to, mùshindù ùdì wèwè uvwàla anyì wela meeji awu.” Cìdì ne mushinga! Bible wa Nzambi ùdì wàmba nànkù. Netwikalè nè mwoyi ku Dìyì dyònsò!

225 Nànkù mwànà wa bakàjì mutekète ewu kààkatèyakù ntèemà kùdìye nànsha, wàkatùngunuka. Yèyè ùdì mpàndànjlà mpindyewu.

226 Nànkù dībà adi inábànzà mutekète ewu—ewu kupetayè disaamà dyà bwendèndè, nè kufwàye. Mulundà wanyi kampàndà wàkamwela bwanga bwà kubèngayè kubola pàvwàye ùpùnga nè lufù. Kungambilayè, wàmba . . . Paanyimà pàà yèyè mumanè kufwà, wàkatùngunuka nè kununka mupùuyà mubolè. Ùvwa nè disòsò mu lubadi lwèndè, disaamà dyà bwendèndà. Kabàvwa nànsha mene . . . Nànsha baledi bèndè mene kabàvwa bamanyè civwà cìmutàcisha to. Nènku wàkafwà. Kàdi kumpàlà kwà kufwàye . . .

227 Uvwa ùlongèsha kàlaasà kàà Dyàlumingu. Ke kasumbù kèndè kakesè kàà kàlaasà kàà Dyàlumingu aku kubwelakù, bàvwa baswè kumumòna pàvwàye ùya mu Dyulu, Banjèlò bàlwa nè bàmwambula bàya nendè. Nè mpaasàtà wèndè pambèlu, munkaci mwà kunwà mucì wà mfwankà, ùbànda ùpweka nè cibambalu mu lùpitaadi amu. Nè bàvwa bònsò mwà kwimba pàvwàye nè cyà kufwà apu, nudi bamanyè’s. Bàvwa bamanyè nè ùvwa nè cyà kufwàye. Bangàngàbukà bàvwa bambè nè ùkaavwa ùpùnga nè lufù, pa nànkù bònsò bàvwa nè cyà kumòna Banjèlò bàlwa, bamwambula bàya nendè.

228 Ke dyàkàmwè, pààkakùngamanganàye nè bulelèlè’s! Mpindyewu, yèyè ùvwa cidimba cyà lulamatu cyà èkèleeziyà, ùvwa mulongeshi wa kàlaasà kàà Dyàlumingu, nè cidimba cyà èkèleeziyà cyà lulamatu cyà èkèleeziyà mulenga munèna wa cyena-màngumba. Kàdi pààkabangàye kulwangana, lufù kumutuatalù; mèsù èndè matonona, ke kwambayè nè: “Ndi mujimìne!” Yèyè nè: “Ndi mujimìne! Ndàayi, nwàngatè mpaasàtà!”

229 Kujimayè mucì wèndè wà mfwankà awu, nè kubwelayè, wàmba nè: “Mòna, mòna’s! Mòna, mòna’s! Netwàmbilè ngàngàbukà bwà kukutwàye lushingì lwà ditùuyija naalù.”

230 Yèyè nè: “Ncyèna muswè lushìngì nànsha lùmwè lwà dintùuyija to.” Yèyè nè: “Wèwè mushimi wa bantu ewu! Nkàadi mfwa, nè nkaadi nya mu ifernò. Nè ndi mujìmine bwalu uvwa mupangile bwà kungambila Bulelèlà. Ndàayi nukatwàlè mwànà wa bakàji wa baa-Goodhue awu, nùmuntwàdilè mwab’ewu, nè lùkàsà lwònsò. Yèyè mmubingè.”

231 Indilà too nè pawàkùngamanganà nè cintu cyà bushùwà aci musangu wùmwè. Kùdidingikù kuteeta bwà kwimanyika cinyàànyà cyà cijila aci to. Kwikadi waCìtaayisha kuciyisha kule nè cingoma kampànda cyà mwambùuyi, cyà cyena leelù, cyà dilonga dyà tùlaasà aci to. Tèèlejà didimwija dyà Nyumà Mwimpè adi, dilòlò edì, didì dikudimwija adi nè: “Mémè ndi Njila, Bulelèlà, nè Mwoyi; muntu nànsha umwe kèna ùlwa kùdi Taatù to, ànu ku Mémè.” Nè Yèyè ùdi Dìyi.

Twìnyikàayi mitù yètù bwà katanci kakesè cyanàànà.

232 Ndi muswè kutèèlaku dikwàbò Dìyi dyà Mukalenge Yesù, panùcidi nwela meeji ku bwalu abu apa. Yesù wàkamba, mu Maatàayi 5 nè: “Bàà disànka ng’aba bàdi nè nzala nè nyòòtà.” Mbibènèshiiibwe mene bwà kwikala nè nyòòtà ayi munda mwènù. Ukàadi mufikè mu cipidi cyà nè webè—webè—webè ndongolwelu mujimà ùvwa mutàmbe kunyangakajiibwa bikolè kùdi bwena màngumba, nè tusùmbù twà ntèndeleeleu nè byòtà, nè bikwàbò, bulondyanganyi bukesè bwà èkèleeziyà, nsòmbelu wa bantu, bu mùdi kukashààla bàà mu maswa, nè bikwàbò, kuumuka ku èkèleeziyà kuya ku mukwàbò anyi? Dyabùlù ùvwakù mukùmbàne bwà kwela màyi à dinyanguka adi, nè udi wenda unwàngana naawù, bu mùdi ngulube mu cinwìnu anyi? Paùdi, kùyi nànsha mumanyè cidi dijikija dilelèlà dyà nyòòtà yà Nzambì to; bwà kuMumòna, bulelèlà kampàndà, ku Nyumà Mwimpè musòmbèle munda mwèbè, nè ùdimwènesha. Pawikalà—pawikalà mùshindù awu dilòlò edì, pawikalà ucidi ànu nè nyòòtà yà Nzambì, lekèlà nkwambilè nè:

Kùdi Mpokolo mùle nè Mashì,
 Makòka mu mijilu yà Èmanùwèlè,
 Mùdi bangènzàmpèkààtù biinyija mwìnshi
 mwà nkwaaka awu,
 Bàjìmija dikeji dyàbò dyònsò dyà dipiilà.
 Mwìvi uvwa upùnga nè lufù awu wàkasànka
 pa kumòna
 Mpokolo awu mu ditùkù dyèndè;
 Mwaba awu mémè pàanyi, nànsha mùndi mubi
 kumòna bu yèyè amu,
 Ngòweshiiibwè ku mpèkaatù yànyi yònsò.
 Kacya ànu ku diitabuuja ngàmòna musùlu awu
 Wùdi mpùtà Yèbè yidi yizòloloka ayi yitwàla,
 Dinanga dipikudi ndikaadi cyena-bwalu
 cyànyi,

Nè nêdiikalè nàнку too nè pangàáfwa.

²³³ Wêwè nè nyòòtà ayi dilòòlò edi, yà kumanya byàbûngi pa bidì bitàngilà Nzambì, nè kutàmba kuseemena pabwìpì Nendè, udikù mwà kwela ànu cyanza cyèbè muulu mpindyewu anyi? Pàdi mutù wònsò mwinyika apa, ambà nè: “Nsambìdilèku.” Èyi Nzambì, tàngilààku byanza!

²³⁴ Lwà mu ditùngà mùdì tudyòmbà tükafika mpindyewu, kuumukila ku Esètè, ku Nord, ku Wesètè, nè ku Sud, nwènú bàdì mu bibambalu abi, elàayi byanza byènú muulu kùdì bampaasàtà nè cyònsò cìdiku aci, nè nudi nujinga; wêwè, cintu kampàndà munda mwèbè amu, ciikàle nè nyòòtà yà Nzambì. Nyòòtà yà cijila ayi’s!

²³⁵ Kùcìsànkishikù... Kaa, wêwè udi wamba nè: “Mwanèètù Branham, mèmè—mèmè’s ngaakeela mbilà musangu kampàndà. Ngaakajà maja mu Nyumà.” Kùteeci, kuteeci, kuteeci kwangataku aci to. To.

²³⁶ Indìlaayi too nè pààlwà disànkishiibwa adi, Citùpà cidi cisankisha cyà kaabujimà kàà Nyumà Mwímpè pàbwelàci, dìbà adi tungonga twà disànka twà dyela dyà mbilà etu, nè dyakula dyà mu myakulu, nè dija dyà maja mu Nyumà, nebìlwe. Kabyàkukèngela bwà wêwè kucyènza ku mìjikì to. Neùcyènzè paùdì wenda uya mu njila, mu kàshinyi kèèbè amu. Neùcyènzè pawikalà munkacì mwà kukòmba mu nzùbu. Neùcyènzè pawikalà upoopa misonso mu cimanu, nè mudimu wènú wà mukooni yà mabaya awu. Mwaba wònsò wùdì awu, Disànka didì kadìyi kwamba nè dyùle tètè nè butùmbi adi’s!

Mpindyewu túsambilààyaaku.

²³⁷ Taatù wa mu Dyulu munanga! Mukenji mukesè wà dilòòlò edi, mule, mwangàte cipòòlù, wà munèngànèngà, kàdi, Nzambì Munanga, swàkù bwà Nyumà Mwímpè Webè àfilè dyu—dyumvwija kùdì mwoyi wònsò. Ànu munda mwà èkèleeziyà ewu, dilòòlò edi, kùvwa byanza bingyàbingyàlè bivwà byediibwe muulu, mu myaba yònsò mu bibweledi nè myaba yònsò. Tudi—tudi tulòmba, Nzambì munanga, bwàbò bòbò. Kaa, swàkù bwà Citùpà cidi cisànkisha cyà Nzambì aci (cidi ciikàle Kilistò aci, Ditèkemena dyà Butùmbi, Ditèkemena dyà Mwoyi, munda mwèbè), swàkù bwà Cilwe kùdì yònsò wa kùdìbo.

²³⁸ Mu ditùnga dijimà emu, kuumukila ku Californie, too nè mu New York mwàmwa mpindyewu, mùdìbo pa bwebwebwe mu dindà amu, bàdì munkacì mwà kutèèleja kuntu kwàka; lwà mu—mu New Hampshire mwàmwa, nènku lwà mu Boston mwàmwa, nè mu Texas mwònsò mwàmwa, mu Indiana mwònsò amu, too nè mu Californie, nè mu nyùngulukilu amu. Èyi Nzambì, tàngilààku byanza abi; tàngilàayi cidi mwìnshì mwàbì amu, Mukalenge, mwoyi awu wùdì nè nzala nè nyòòtà.

²³⁹ Ditùkù dinyangakaja edi, mùdì dyabùlù mufofòmije mèsù à bantu, ànu bwà kukashàala wa mu èkèleeziyà cyanààna,

kwamba nè: “Ke cyònsò cìdì cikukèngela ncyôci aci.” Kàdi bàcìdì ànu bàdìtàngìlã bóbò biinè nè bàmòna mùdìbo bènza amu, nè dìjinga dídìbo naadi dyà kwikala mùdì bàà pa buloba.

240 Pàdìbì nè, Bible ùdì ùtwàmbìla nè: “Twètù mene banangè maalu à pa buloba, dinanga dyà Nzambì kadyèna mene nànsha munda mwètù to.”

241 Anjì èlààbì meeji, Taatù, mushindù wùdiyi mwà kunyangakaja Dìyì dìlèlèlà adi, mùdìbo mwà kwamba nè: “Kaa, twètù tudi twitabuuja Bible, kàdi kí ng’Eci to. Katwèna twitabuuja *Cikampàndà* to. Tudi twitabuuja nè *Cikampàndà* cìvwa bwà cikondò cikwàbò. Tudi twitabuuja nè *eci* ke Cyôci aci,” bwalu, dìngumba kampàndà ndikònyàngàje meeji àbò mu ciinà cyà bukooyà aci.

242 Pààbì’s, Yesù wàkamba nè: “Ewu yònsò wadidìngã kuumushila Dìyì òmwè ku *Cyôci* eci, anyì wasàkidilaKù dìyì òmwèpelè awu, cyèndè citùpã necyùmushiiwbè ku Mukàndã wà Mwoyi.”

243 Nzambì munanga! Elàngànàbì meeji bwà dyediibwa dyà màyi ku makàsà dìkãla ku Cilumbulwidi kwàka, pàdì bantu nè nsòmbelu mwimpè, mukezùke, wa cijila, bayè mu èkèleeziyà ànu nè lulamatu nè mwàbò mwònsò, kàdi bajìmine.

244 Anjì elàbì meeji ku Bàfaalèsà abu, mùvwàbì’s, kwangacila ànu bàcìdì bàna bakesè bàà balùme, bàvwa balongèshiiwbwe mu Dìyì, bapìcile mu bilongelu nè bikwàbò byònsò, bàà cijila (bìvwa bikèngela kwikalabò nànkù, cyanàànã bàvwa bààshiiwbwa mabwe bàbàshebeya), kàdi Yesù wàkamba nè: “Nwènù nudi bàà tatwènù dyabùlù.”

245 Mùshindù mwinè wàkapweka Izalèlèlà kuntwaku’s! Nènku eci cìkalè didìmwija kùdì beena Mpenta, Mukalenge, mu ditùnga dijimã. Mùshindù mwinè ùvwã Mòsà, mupròfetã awu, mupwekè mu Èjiipitù, bwà kuuja Dìyì dyà Nzambì, bwà kubàtwàdìla bukènkè bwà dilòòlò’s wè! Mùshindù mwinè wàkamònabo bishimã binène byà Nzambì! Mwàkamulondàbo, kusabukabò Mbù Mukùnze, kubàtìijiiwbabò kùdiye, kuyabò mu cipèèlà nè kudyàbo cyàkudyà cyà Banjèlò cyàkamatã mu Dyulu aci. Nè pashiiishe kubèngabò bwà kwangata Dìyì dyònsò, pàakaalukilãbo ku Kaadèsã-baanèã...ku Kaadèsã-baanèã, kuumukila ku—ku buloba bulaya, nè kwambabò nè: “bàdi bu bantu bàà mfyondo; katwèna mwà kucyènza to.” Pààbì’s, Nzambì wàkamba nè: “Nkààdi mumanè kunùpèèsha buloba abu”! Mukàlu! Yesù wàkamba nè: “Bóbò, muntu nè muntu, bàakabùtuka. Mbafwè,” bajìmine, kabàyì Nzambì to, nànsha mùvwàbo benzè bintu byònsò ebi amu. Bààkamòna bishimã ebi; bààkasànka, kujã maja bàbànda bàpweka nè mwelelu wã mbù awu, nè Miliyãmã, pàvwàbo bàtuuta dikasa. Kàdi ànu bàsàtù cyanàànã, pa miliyò yìbìdì ayì, ke bàakabwelã.

246 Tudi bamanyè, Taatù, nè pàdi bilùmè, mifungù yà kùdi mulùmè nè mukàji, yidisanga pàmwè, kùdi ànu umwèpelè, pa mùliyò mujimà, udi mwitàbiibwe. Civuba cìmwè cyà kùdi mulùme cìdi cìsangana diyi dyà bufukè dyà mukàji, mukàji awu, nè mùliyò mukwàbò ùdi ùbùtuka.

247 Kùdi mùliyò mujimà, mìliyò yìbìdi, yàkapàtukà mu Èjiipitù; bàbìdi, Yoshùwà nè Kaalèbà, ke bààkabwela mu buloba abu. Umwe pa mùliyò mujimà. Taatù, ndi—ndi nzakala pàndi ngèela meeji ku bwalu abu. Anji elàbi meeji, pa buloba bujimà leelù ewu, beena Kilistò mìliyò nkàmà yitaanu, mbafwànyine kwikala nkàmà yitaanu bu Wèwè mwà kulwa dilòlò edi. Èyi Nzambi, lekèlè tùvùlukèku nè Diyì dyònsò dyà Nzambi dùtu diimane, bu civùlukilu. Tudi nè cyà kuDiitabuuya. Tudi nè cyà kuDitùmikila.

248 Nènku paWàkambà nè: “Nyingàlàlaayi, muntu nè muntu wa kunùdi, nè nùbàtijiibwè mu Dìna dyà Yesù Kilistò bwà dilekelediibwa dyà mpèkaatù, nènku nenùpetè kupà kwà Nyumà Mwímpè. Bwalu mulayi wùdi kunùdi, nè kùdi bânà bèenù balela, nè kùdi aba bàdi kule, mu búngi bwònsò bwàbiikilabo kùdi Mukalenge Nzambi wetù abu.” Nènku, Nzambi, Wèwè ucìdi ànu ubiikila, dilòlò edi, nè mulayi awu ùdikù pa Ùcìdi ànu ubiikila.

249 Nè balombodi bàà èkèleeziyà mbakònyàngàje meeji à bantu abu, nè kuciludikila ku cilongelu cyà tèlòlòjí bulongeshanganyi, cyà cyena-màngumba, ku cintu cyà kwamba nè: “Kaa, wèwè itàbùtùjã ànu cyanàànà.” Dyabùlù ùtu witabuuya pèndè, kàdi kèna mwà kupeta Nyumà Mwímpè to. Yudààsà Mpongoloki awu. . . wàkenza byònsò bì—bìvwà bakwàbò abu benzè, bayiidi abu’s, wàkayiisha Èvànjeeliyò; kàdi pààkalwà cikondo bwà yèyè kupeta Nyumà Mwímpè, yèyè wàkaleeja civwàye.

250 Nzambi, swàkù bwà bantu bàà mu ditunga dilòlò edi bàjingululè nè, kakùyì dilabula adi to, mbajimìne. Swàkù bwà byènzekeku dilòlò edi nè misùukà yàbò yisànkishiibwè nè Citùpà Cyèbè, Mukalenge, patùdi tubalàmbula mu cyanza Cyèbè apa. Mbèèbè Wèwè, Mukalenge. Twètù tudi bambùle ànu bujitu bwà Diyì. Ndi ndòmba bwà biitabuujè nè mwoyi wàbò wònsò, nè bùùjiibwè tètè nè Nyumà Mwímpè. Tudi tulòmba mu Dìna dyà Yesù. Amen.

Ndi muMunangè, ndi muMunangè
Bwalu Yèyè wàkannanga kumpàlà
Nè wàkampetela lupàndu
Ku mucì wà Kàlvariyo.

251 Kaa, Yèyè ke Citùpà cyèbè cìdi cìsànkishà aci anyi? [Disangisha didi dyamba nè: “Amen.”—Muf.] Kaa, ekèlekèle! Nudi baMunangè nè mwoyi wènù wònsò anyi? [“Amen.”] Mpindyewu, Mèyi awu mîngà misangu àdi àtapa, kàdi twìmbàayi ànu mu Nyumà mpindyewu, nwamònu’s, yònsò wa kutùdi mpindyewu. Tulabulanganàayi ku cyanza nè mwanèètù wa balùme udi musòmbè ku luseke lwèbè awu, nè mwanèètù

wa bakàjì, kàdi kwamba ànu nè: “Nzambi àkubènèshè, mwena lwendu,” patùdì tuwimba cyàkàbìdì apa.

Ndi . . . (. . . ? . . .)

²⁵² Mpindyewu tudi balabùlàngàne ku cyanza muntu nè mukwèndè. Mpindyewu tubwitàayi ànu kwìsù cyanààna nè twìmbàayi mu Nyumà, twelàayi byanza byètù muulu kùdiYe.

Ndi muMunangè, ndi muMunangè
Bwalu Yèyè wàkannanga kumpàlà
Nè wàkampetela lupàndu
Ku mucì wà Kàlvaryò.

Kaa, Yèyè kî mmulenga anyi?

Mukèmeshanganyi, mukèmeshanganyi, ke cidi
Yesù bwànyi mèmè,
Mubedyanganyi, Mfumu wa Ditalala, Nzambi
wa Bukolè n'Yèyè;
Kaa, ùnsùngila, ùndama ku mpèkaatù yònsò nè
ku bundù,
Mukèmeshanganyi mMupikudi wanyi, Dîna
Dyèndè ditùmbishiibwè!

Kaa, mukèmeshanganyi, mukèmeshanganyi,
ke cidi Yesù bwànyi mèmè,
Mubedyanganyi, Mfumu wa Ditalala, Nzambi
wa Bukolè n'Yèyè;
Ùnsùngila, ùndama ku mpèkaatù yònsò nè ku
bundù,
Mukèmeshanganyi mMupikudi wanyi, Dîna
Dyèndè ditùmbishiibwè!

²⁵³ Kaa, udi musanke bwà dilabula dyèbè nè Kilistò anyi? Yèyè kî mmulenga anyi? Yèyè kènà ùsànkisha anyi?

Kale wàwa mvwa mujimine, mpindyewu ndi
mupetùlùdìibwe, musùlùdìibwe ku dipiila,
Yesù ùdi ùfila budìshikaminyi nè lupàndu mu
kaabujimà;
Ùnsùngila, ùndama ku mpèkaatù yònsò nè ku
bundù,
Mukèmeshanganyi mMupikudi wanyi, Dîna
Dyèndè ditùmbishiibwè.

Kaa, mukèmeshanganyi, mukèmeshanganyi,
ke cidi Yesù bwànyi mèmè,
Mubedyanganyi, Mfumu wa Ditalala, Nzambi
wa Bukolè n'Yèyè;
Kaa, ùnsùngila, ùndama ku mpèkaatù yònsò nè
ku bundù,
Mukèmeshanganyi mMupikudi wanyi, Dîna
Dyèndè ditùmbishiibwè!

²⁵⁴ Nudi nwitabuuja nè aci ncyà mu Mifùndu anyi? Bible mmwambè nè: “Tuutàayi bikàshi. Enzèlaayi Mukalenge mutooyi wà disànkà.” Nudi bamanyè’s, mèmè ntu misangu yònsò ànu muswè kwimba mìjikì. Mwanàanyi wa bakàji, Rebekah, ùdi munkaci mwà kulonga pyànò. Mwanàanyi mukesè wa balùme ùdi munkaci mwà kulonga mpungi. Kàdi mvwa—mvwa mulongè cisanji cyà nshinga dikùmi.

Mukèmeshanganyi, mukèmeshanganyi, ke cidi
 Yesù bwanyi mèmè,
 Mubedyanganyi, Mfumu wa Ditalala, Nzambi
 wa Bukolè n’Yèyè;
 Ùsüngila, ùndama ku mpèkaatù yònsò nè ku
 bundù,
 Mukèmeshanganyi mMupikudi wanyi, Dîna
 Dyèndè ditumbishiibwè!

Nudi baMunangè anyi?

Netwèndelè mu Bukènkè, Bukènkè bulenga be,
 Bùlwa mwaba wùdi mamata à lumuma à luse
 àbàlakana;
 Kenkèshàku mu nyùngulukilu wetù mwònsò
 muunya nè butùku,
 Yesù, Bukènkè bwà bàà pa buloba.
 Netwèndelè mu Bukènkè, m’Bukènkè bulenga
 be,
 Bùdi bùlwa mwaba wùdi mamata à lumuma à
 luse àbàlakana;
 Kenkèshàku mu nyùngulukilu wetù mwònsò
 muunya nè butùku,
 Yesù, Bukènkè bwà bàà pa buloba.

²⁵⁵ [Mwanètù Branham ùdi wimbila mu matàma *Yesù, Bukènkè bwà bàà pa Buloba*—Muf.] Kuukwilà Nzambi nè byònsò byùdi naabi.

Pààyà bansantu kabwela,
 Pààyà bansantu kabwela,
 Mukalenge, ndi muswè kwikala mu umwe
 wabò
 Pààyà bansantu kabwela.
 Kaa, pààMwasàbo cifulu cyà butùmbi bu
 Mukalenge wa bònsò,
 PààMwasàbo cifulu cyà butùmbi bu
 Mukalenge wa bònsò,
 Mukalenge, ndi muswè kwikala umwe wabò
 PààMwasàbo cifulu cyà butùmbi bu
 Mukalenge wa bònsò.
 Kaa, pàdi dîbà dibènga bwà kukenkesha apu,
 Pàdi dîbà dibènga bwà kukenkesha apu,
 Mukalenge, ndi muswè kwikala umwe wabò

Pàdì dībà dībènga bwà kukenkesha apu.

²⁵⁶ Nudi banangè aci anyi? Ndi ndikonka nè makàsà ènù ní mmakùdimùke, nè kanùcyèna nujà kàbìdì maja to, pambèlu apu bwà maalu à bàà pa buloba? Nwamònu anyi? Tùtwayi makàsà ètù, bwà Mukalenge, bwà Mukalenge. Wèwè, byanza byèbè abi mbikùdimùke anyi, kùcyèna wiba kàbìdì anyi? Mishikù yèbè mmikùdimùke, kwèna ushima kàbìdì anyi? Kwikadi ànu nè ntèndeleelelu mu mutù wèbè to, ikàlà nendè mukubwikile wèwè yònsò. Ke bwalu abu's. Bìdì bìkèngela muntu mujimà. Ncyà bushùwà. Mpindyewu tùtwayi makàsà ètù.

Pààyà bansantu kabwela,
Pààyà bansantu kabwela,
Mukalenge, ndi muswè kwikala umwe wabò
Pààyà bansantu kabwela.

Kaa, pààyà bansantu kabwela,
Pààyà bansantu kabwela,
Mukalenge, ndi muswè kwikala mu umwe
wabò
Pààyà bansantu kabwela.

Mpindyewu twèlààyì ànu byanza byètù muulu cyanàànà.

Pààyà bansantu kabwela,
Pààyà bansantu kabwela,
Éyì Mukalenge, ndi muswè kwikala umwe
wabò
Pààyà bansantu kabwela.

PààMwasàbo cifulu cyà butùmbi bu
Mukalenge wa bònsò,
PààMwasàbo cifulu cyà butùmbi bu
Mukalenge wa bònsò,
Mukalenge, ndi muswè kwikala umwe wabò
PààMwasàbo cifulu cyà butùmbi bu
Mukalenge wa bònsò.

²⁵⁷ Kanwènaayikù baMunangè anyi?

Pashiishe netwèndelè mu Bukènkè (Yèyè ùdì Bukènkè, nudi bamanyè's.), M'Bukènkè bulenga be,
Bùdì búlwa mwaba wùdì mamata à lumuma à luse àbàlakana;
Èè, kenkeshakù mu nyùngulukilu wetù mwònsò muunya nè butùku,
Yesù, Bukènkè bwà bàà pa buloba.

²⁵⁸ Nudi nwitabuuja nè Yèyè ke Bukènkè bwà bàà pa buloba anyi? [Disangisha dìdì dyàmba nè: "Amen."—Muf.] Mmwômò anyi? Pòlò mmwàmbè nè: "Pàndì ngìmba, nèngìmbè mu Nyumà. Mèmè nkuukwila, nènkukwilè mu Nyumà." Nwamònu's, cyònsò cyùdì wenza aci, ùcyènzè cyònsò mu Nyumà. Ncyà

bushùwà. Nè Nyumà ùdi ùtwàla Dîyi ku Mwoyi. Ncyà bushùwà anyi? Ncyà bushùwà. Èyowà's, mukalenge.

Nwênù bansantu bônso bàà Bukênkè
 kobolàayi nè:
 Yesù, Bukênkè bwà bàà pa buloba;
 Ngàsà nè luse mu Dîna Dyèndè,
 Yesù, Bukênkè bwà . . .

Dìbà adi citùdi twenza ncinyi?

Netwèndelè mu Bukênkè, Bukênkè bulenga be,
 Bùlwa mwaba wùdi mamata à lumuma à luse
 àbàlakana;
 Kenkèshàku mu nyùngulukilu wetù mwônso
 muunya nè butùku,
 Yesù, Bukênkè bwà bàà pa buloba.

²⁵⁹ Mfwilaayikù luse bwà kunùbwejakaja nwênù bimbi bàà bisanjì, mùshindù awu, kàdi ndi ànu ngàngaciibwa's. Ncyèna mumanyè cidì citàmbe bwîmpè to ànu kukuukwila. Ke mùshindù wunùdi nucyènza awu's. Èyowà's, mukalenge. Ndi nè kusàkidila bwà mpùngà ewu, Mwanèètù Mack, bwà kulwa kubwela neenù mu bwobùmwe nè èkèleeziyà wenù mwab'ewu dilòlò edi, bantu balenga bônso aba.

²⁶⁰ Nè nwênù bèdi byanza muulu bwà dibàtiiza dyà Nyumà Mwîmpè abu, Ndi mutwishìbwe nè nenùtwilanganè nè Mpaasàta Mack mwab'ewu, anyi bàmwè bàà kùdìbo, nè kubwela mu cibambalu kampàndà kaaba aka. Nènkù vùlukàayi ànu nè, pààkaakulà Nzambi Dîyi ku cibangidilu, nè kwamba nè "kwikalè," bivwa bikèngela kwikalakù! Nènkù Yéyè wàkamba nè: "Bàà disànka ng'aba bàdi nè nzala nè nyòòtà yà bwakàne, bwalu bóbò nebùukucishiibwè." Nwamònu's, cidi nè cyà kwenzeka. Nulwe bwà kukùmbula mpaasàta wenù ewu, nè kwimana ku luseke lwèndè pàdiye ùyiisha Èvànjeeliyò apu.

²⁶¹ Mpindyewu twîmbàayi cyàkàbìdi musambu mwîmpè wà kale awu, ntu ànu munangè awu nè: "Netwèndelè mu Bukênkè."

²⁶² Yesù wàkamba nè: "Mémè ndi Bukênkè," nè nwênù nudi munda Mwèndè. Nwamònu anyi? Nudi nubwela munda Mwèndè bìshi? Diya kashàala wa mu Yéyè anyi? To. Mu dizakala anyi? To. Ku dibàtiiza dyà mu màyi anyi? To. "Ku Nyumà umwe nkutùdi bônso babàtìjìbwe mu Mubidi wùmwe, wùdi Mubidi wà Kilistò awu." Nè mu Mubidi awu mùdi mapà citèemà à Nyumà àkwàta mudimu mu mubidi wà pa kaaba, èkèleeziyà wa pa kaaba. Aci's ncyà bàpostòlò, ní nkàadikù mucimanyè. Ncyà bushùwà.

Pa nànkù netùtùngunukè mu Bukênkè, mu
 Bukênkè bulenga amu,
 Bùdi bùlwa mwaba wùdi mamata à lumuma à
 luse àbàlakana . . . (Èyo! . . . ? . . .)

Kenkèshàku mu nyùngulukilu wetù mwònsò
muunyà nè ku . . . (Cìvwa ndisànka dilelèlè's!)



65-0919 Nyòtá
Grantway Assembly Of God
Tucson, Arizona États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org